

Rapports ord la pressa dil 19avel tschentaner ed autras notizias

1800 – 1870

Naven da 1800 tochen 1870 inclusiv, eis ei barschau giu en **Tujetsch**, cun sias 132 casas en 70 onns, 17 casas, denter quellas 15 tiel barschament dil vitg da **Camischolas**, ils 11 da fenadur 1822; auters dian 14 casas! – e lu aunc treis, nua?

(Notizia da pader Baseli Berther)

1801

La claustra possedeve aunc igl onn 1802 beins a **Selva**, ch'ins haveva survegniu lubientscha da vender durant la sedisvacanza 1801 - 1804.

(pader Placi a Spescha)

1803

Sin il capetel dils 12 da fenadur 1803 ei vegniu concludiu dils revendissims paders dalla claustra da Mustér da vender „bona quaedam in Selva justo pretio parata pecunia“

(Notizia da pader Baseli Berther)

1804

Ils 13 da fenadur, sin in capetel dils paders: „Post haec quaesitium al Cels^{mo} est, an fundos in Selva sitos, e quibus solvi census „ 20 dividere consultum esset, nec? Annuere R.R.D.D. Capitulares, si cum lucro divendi possint,“ Acta Capitularia, pag. 17.

(Notizia da pader Baseli Berther)

1804

„Circa finem Novembris (1804) post comitia Magistratus Disertinensis renovata est per publicum instrumentum sigillo, et minori Conventuali roboratum, et al Altefato Abbate ac Decano subscriptum, Locatio Alpium in Tavetsch sc. Vall e Vallgiuf pro annuo censu 600 cren. Casei grassi in natura, et cum antiquis privilegiis solvendi.“ Acta Capitularia 1799-1813, pag. 82. (Notizia da pader Baseli Berther)

1806

„Die 8. Januarii (1806) Cels^{mus} ad mensam retulit, advenisse festo S. Silvestri duos Aethuatiensisi Vicinitatis Deputatos sc. D. Ministralem Gieriet et Str. Mucli, et Vicinitatis nomine exposuisse, non velle Vicinos denuo ut anno elapso, et prout antiqua ferebat consuetudom cargar ad Alp generalmeing, sed quemlibet privatim, ut per aliquot annos contigerat: ac proinde velle se Harbarium non in natura a 600 cren. Gischiel grass, sed per pecunias solvere, aut curare, ut Monsaterium caseum habeat, licet non iuxta antiquam consuetudinem cum privilegio eligendi locum, ubi vellet incipere etc. aut tandem paratos se esse censum hunc ex toto predimere etc. Quaesivit Cels^{mus} quid Aethuatiensibus sit respondendum?

In varias itum est opiniones, speciatim vero R.P.Benedictus animadvertit, Negotium hoc maioris esse momenti, quam ut absque convocatione tozius ven. Capituli aliquid statui possit. Quare statuta est Dies 15. Jan., et absentibus Capitularibus aut ore tenus, aut scriptores est communicata. Ad praefixam vero diem 15. nemo expositorum adfuit praeter R.P. Gallum, ubi denuo ad mensam hac super re actum est. Mentem suam Revmus Abbas ita aperuit, existimare se optimum factum, si Aethuatiensibus daretur responsio talis ut negotium protraheretur potius, quam per absolutam categoricamque responsionem vel di..imeretur, vel ansam praeberet litium etc. Autumarunt nonnulli nostrum, fore fortassis occasionem, qua Monsaterium posset liberari al

onere Merenda in die s. Martini. Tandem die 19, Januarii Aethuatiensi Vicinitati scripto est Declaratio sequentis tenoris.

1806

15 da schaner 1806

Alla ludeivla vischnaunca da Tujetsch,

la proposiziun fatga da monsignur avat il di da Silvester, en num dalla ludeivla vischnaunca da Tujetsch entras il bein sabi signur mistral Gieriet e signur stalter Mucli, ei vegnida mess avon ad in venerabel capetel dalla Casa da Diu, il qual suenter ver madiramein reflectau sur tala nova proposiziun, en consequenza dalla quala ei vegness buca cargau ad alp en general, ha viu en che tenor exprienza massi quei en pregiudezi dallas olmas, sco ins era da quei avisaus buca mo dad in u l'auter spiritual, sunder er'ina gada d'in entir venerabel capetel dils pasturs dallas olmas staus admonius cun entardar ni tralasar il survetsch da Diu dumengias e firaus, nua che nies stan spiritual laschi buca tier da concuorer ni cooperar leutier entras novas convenziuns che gidassen tier tal intent.

Sche ha in venerabel capetel concludiu buca per siu interess, sonder per buca dar caschun tier talas inconvegnietschas e cheutras sefar particeps dil mal, da reservar il temps ad uras da consultar ses pli aults superiors e prender giu da maun da quels en tgei e con lunsch ins seposs schar en a siu temps e denton garegiar dalla ludeivla vischnaunca il sulet arvè en natira suenter dretg diever ed instrument cun rugar augurar, ch'igl altissim Diu vegli era quest onn dar sia grazia e benedicziun sin tuttas alps e schurmegiar igl onn vegnent il s.h. muvel da tut mal e dils tiers nuscheivels, sco el ha preservau gl'onn vargau.

Actum Die et Anno ut supra

P. Basilius veith Cap. Secret.

Acta Capitularia 1799-1813, pag. 95 e 96. (Notizia da pader Baseli Berther)

1807

Die 27 Septembris hujus anni per tres dies tanta nivium copia cecidit, ita ut intras tres hebdomadas nix vix liquifacata ac diffugerit. Medelli ac Aethuaty in colac ad falcem maturis aristis supponendam, nivium moles manibus ex agris amoverer ac divellere cogebantur.

Acta Capit. Pag. 102

1808

Unglück von Selva im 13ten Tag des Christmonats 1808

Selva, il secund davos liug dalla **Val Tujetsch** ella **Cadi**, schai odem in plaun-paliu e buca lunsch naven dallas fontaunas dil **Rein Anterior**. - Siu num deriva dal vegl retic, che vul dir: uaul (selva) e vegn aunc oz numnaus dals **Uranes** tudestgai: „**Zum Holz**“, pertgei quei vitget era baghiaus egl uaul. - Il vitg da **Selva**, ch'era strusch serefatgs dapi il barschament da 1785 e ch'era dapi lu vegnius baghiaus tut da niev, veva ussa 13 casas-lenn e gest tons clavaus cun buns nuegls. Il vitget schischeva silla riva settentrionala dil **Rein** sin in rieven; el possedeva surasiviars in trit e rar uaulet. **Selva** ei in beneficiat cun baselgia.

Da neueneu ei il vitget staus smanatschus da duas lavinas; d'ina encunter mesanotg e da l'autra encunter miezdi, da surengiu e da sutensi. Quella dal **Rein** sutensi stremblava e spurlava si il vitg bunamein onn per onn; ella tementava ils vischins e schizun sderlava per tiara quels che vegnevan memia datier; vargava denton il pli savens senza caschunar pli gronds donns che rumper en finiastras, derscher entuorn chischners e scarplir las slondas dils tetgs. - Quella dalla **Val dil Plaun** encuntercomi, quella da surengiu, mava savens cun baghetgs, cuvrevava vi glied e biestga e quei malgrad ils cugns-crap construi sur ils baghetgs per rumper la lavina, sco igl ei era stau il cass avon dus onns.

Ins sperava denton silla protecziun da Diu ed essend ch'ei deva gest el liug dil vitg ina bun'aua, bunas pastiras e tut il cumadeivel per in'existenza da glied e biestga, cartevan ins d'astgar viver en prighel.

Gliez unviern era la neiv in um aulta; ei suflava e cuflava senza fin e misericordia. Stgirezia e sclaridas anetgas sebrattavan giu e la fin finala fageva ei ton da selvadi, ch'ils habitonts han buca ughiau da semuentar ord casa quella sera, gnanc da perver e buentar.

Ei schabegia schiglioc buca da rar, cunzun a **Tschamut**, ch'ei sufla e cufla aschi vehement, che las cuflas, pugnond ina cuna l'aua, petgan fiug. Mo quella sera fagev'ei tondanavon, che tgi che leva buca stenscher e vegnir tschocs, steva a casia. La lavina meridionala, che schulava giud las palas dil **Ruinatsch** e vegneva giu bunamein onn per onn, temevan ils da **Selva** buca quellas caussas, ed ein per quei motiv fugi lezza sera ellas casas giudem il vitg, ch'eran bein pli maneivel da quella, mo pli allontanadas dalla lavina sura, settentrionala.

Per carezia e quitaun pil beneficiat dil liug: Peter Weller, han ils vischins supplicau el da vegnir cun els; el sappi gie bein aunc seregurdar, ch'avon dus onns, la lavina hagi cuvretg sia casa, la baselgia e sfraccau la casa vischina. El ha denton snegau quei beinmanegiau invit e replicau zun modest a sias nuorsas: La divina providentscha hagi destinau quella casa per el; el sappi subir il prighel cun ses vischins e banduni buca siu post.

Tgei sgarschur e stgiraglia notg; ils suffels burlevan e scadenavan cun vehemenza encunter las casas; talmein, che la cufla sefuritgava dalla pli stretga rusn'en. Ei veva dau las dudisch e stuschava encunter l'ina dalla notg. Ils vischins eran tgi iu a letg, tgi scheva rusari, tgi vegliava - che la disgrazia ei stada cheu!

La zun extendida, profunda e teissa **Val Ruinatsch** sedestacca e sesfuola cun vehemenza giadora - e cun quella era l'aschi numnada lavina da **Benaus!** Omisduas sederschan giadora cun stermentusa ramur, entochen giuaden el **Rein**, e leu s'entupond cun forza e sfraccass nundescribibil, sesiettan ellas burlend ed urlond dal rieven **Rein** siadora. La davosa dat ina menada nunspitgada all'emprema, enviers mesanotg per liung ora; ellas contonschan domisduas il **Plaun** e sederschan cun vehemenza sul vitg en. Semanond ell'ussa aunc dalla vart meridionala suranora, ei la catastrofa completa. Tut quei ch'ei en via va en scalgias e vegn el medem temps satrau. La tschaguola dalla tuor-baselgia e la crusch sgolan tras l'aria ensemblamein cun slondas e tetgals, che vegnan purtai entochen si egl uaulet sur il vitg.

Sis casas ein sfraccadas ensemen diltuttafatg; ina ei donnegiada ed in'aua ha buca fastitg da tetg pli. Tschun clavaus ein destrui radicalmein e ston vegnir baghiai da niev dal sulom alla crusch-spitg; dus sulets ein restai senza donn. 42 persunas, pia la mesadad dils habitonts ed in affon aunc buca naschiu, 37 armauls e circa 200 tiers manedels ein satrai sut la neiv e las ruinas dils baghetgs.

Il beneficiat cuora immediat giadora, va vin baselgia e tucca il zenn da stuornas; quei um spir forza e vertid, che fa bunamein miracles per libeberar sias nuorsas satradas vivas!

Ils Tschamuters che han udiu il rumplanem ed il zenn da stuornas, cuoran sut agen prighel da veta atras l'altezia nevada ed ein ils emprems silla piazza da disgrazia. Mo tgei ston els veser immediat? Treis da lur vischins cun biestga e tut sturni per plaun e senza enzenna da veta.

Plirs umens da **Selva** pervesevan lur muvels sillas aclas da **Caspausa**, ina mes'ura sur **Selva** encunter mesanotg ed han udiu nuot. Per l'auter di la damaun han ins pudiu dar sinzur ad els e scochemai ein ei curri tras las nevas dallas plauncas teissas neu encunter **Selva**, senza schar dar el tgau, che era els pudessen mintga mument vegnir satrai dalla lavina.

Il medem di, che fuv'ina mesjamna, ei il plevondalla **Val Tujetsch**, sur Luregn Schmed, cun tschuppel umens da leuora, semess sin via encunter **Selva**, mo essend la via stupada ed aunc adina periclitada dad ulteriuras lavinias, ha er'el stuiu ir a **Caspausa**, e per la medema via dils perveseders eis el finalmein arrivaus a **Selva** plein quitaun e premura per sias paupras nuorsas. El era in um grev da sisonta onns e suava tut en in'aua, sco dis da stad ella pli gronda calira.

Treis umens ed in mattatsch han pudiu sedeliberar da sesez ord la lavina; 13 personas ein vegnidas excavadas vivas e buca fetg donnegiadas; las autras han ins anflau mortas.

Rest Giusep Riedi, in um sil meglia e sia entira famiglia han stuiu passentar 15 uras sut neiv e crappa e senza saver magliar la minima caussa. El era mo en camischa. Els fagevan oraziun, seconsolavan, grevan ed udevan in l'auter bein e scoiauda, schebi separai in da l'auter. Plaunsiu han ins udiu lur vuschs, grend tuts el tact tgei ch'ei mo pudevan - ed els sezs en lur fossa udevan uss era ils cavaders. Ed uss han ins entschiet a cavar, mo vonzeivi ein ins stai necessitai da schar ira giuden ina resgia vid in sughet, sinaquei ch'il cau-casa sappi gidar a trer ella per arver ina ruosna, ch'ei possien siadora.

La tradiziun raquenta, ch'in buobet muncavi aunc; ins ha clamau el pil num epi hagi ei rispundiu frestgamein: „Ju sun ain pegna ad ai tgaud e bien!" Il buf veva pia bess il plat-pegna pli lunsch ed il pign che durmeva sin quella, ei daus lien - e nuota schelaus!

Gion de Plaz, in um da sisonta onns, zugliaus mo en in lenziel, ha luvrau uras ora ella neiv per liberar sesez e sia dunna, mo ha tuttina stuiu schar schelar ella. Anflond el miezmorts, tut steris e senza vusch, semigliants ad in moribund, han ins purtau el en sia stiva caulda, scaldau si las solaspei cun plattas-crap bunamein burnidas, epi eis el puspei vegnius neu e vivius. Naven dil mardis endamaun, che la disgrazia ei succedida, entochen il venderdis-sera, han ins excavau 16 morts. Mo co satrar tontas baras, cu ins saveva ni purtar ni menar ellas a **Caspausa** e la via anora era serrada e pli prigulusa che mai? La finfinala han ins fulau e cavau via en tut prighel da veta, e lu transportau las baras: tgi zugliai en lenzeuls e tgi mess danter aissas, cargai sin pliras sliusas da maun.

La sonda han ins satrau 19 e la dumengia las davosas 6 baras. Ins po cumprender cun tgei dolor e tristezza els cors dils presents! Cuolms e vals rebattevan dallas lamentaschuns dils zenns ed ils mirs santeri dal bargir e plirar dil pievelun en malencurada. E la ferdaglia era aschi recenta, che las larmas schelavan sin fatscha!

Pader Placi concluda allura sia descripziun cun ils plaid: Vegli po Dieus, il buntadeivel e misericordeivel, emplenir il cor dils concarstgauns cun commiseraziun ed ils habitonts dil vitg cun prudientscha, sinaquei ch'ils ins gidien els ed ils auters seresolvien da transportar lur habitaziuns en in liug segir. (mira 16.147 tudestg)

1816

Die 21^{ma} Septembris. Aethuatiensis cum supplicationibus desertinam venerunt, serenitatem acris petizuri.

Acta capit. Ac Cronica 1814-1820; pag. 119

1834

Tenor quen prius si dil ludeivel magistrat e dau en alla Confederaziun han las vischnaucas dalla **Cadi** pitii donns vid praus e baghetgs entras la gronda malaura da 1834, odem igl uost sco suonda:

Tujetsch	21'983	renschs	grischuns
Medel	20'507	renschs	grischuns
Mustér	42'332	renschs	grischuns
Sumvitg	24'195	renschs	grischuns
Trun	59'608	renschs	grischuns
Breil	15'616	renschs	grischuns

1836

Ei vegn pli u meins generalmein lamentau dalla gronda penuria da fein; mo si la Surselva duei esser

tuttavia gronda miseria. Ils avdents da **Tujetsch** portan fein ch'ei cumpran, naturalmein per in exhorbitant prezi, neu dad **Ursera** sur in ruh e da quest temps buca praticau cuolm.

(Il Grischun Romonsch 1836, nr. 11, 10 da matg)

1836

Lavina

La lavina da **Giuv** digl onn 1836, ils 25 da december. Vegniu per la veta dus giuvens umens, era circa 30 armauls smacchau suten cun ils baghetgs.

Cronica da Vigeli Giusep Beer, scrinari Sedrun

1837

... Ei vegn era detg ch'en **Tujetsch** a **Sogn Giachen** hagi la lavina priu dus giuvens. Ei fuss d'augurar, che quella nova seconermass buc.

(Il Grischun Romonsch 1836, nr. 45, 3 da schaner)

1837

.... Ariguard il donn pigliaus a **Tujetsch** entras la lavina, eis ei vegniu ordinau d'entras ils signurs geraus da **Tujetsch** prender si il donn e tarmetter tier il resultat al signur mistral regent e quel duei far public quel ora sin las vischnaucas.

(Protocol dil cumin dalla Cadi)

1837

Sin la tschenna dalla surselva, numnadamein en **Tujetsch**, han las uolps, e bein exprimiu quellas da quater combas, semultiplicau sin ina moda veramein stermentusa. Ei vegn scret, cc cun bein, ch'ei vegni sittau, sturniu e pegliau quantitat, possien ils purs buca scompentar lur tiers manedels dallas uolps. Trops entira selaian veser da bi di. ei quei bein igl effect dil niev tschentament dalla catscha? L'idea ei ussa da sedeliberar da quella calomitat cun metter tissi. Ha aber quei buc'autras periculusas inconvenienzas?

(Il Grischun Romonsch 1837, nr. 48, 24 da schaner)

1837

Copia d'entelgientscha pervia dils tiarms e cunfins sin il **Cuolm d'Ursera**. Archiv da cumin nr. 853 ed 854, 22 da november 1837.

(Notizia da pader Baseli Berther)

1837

En in artechel dil Grischun Romonsch 1837, nr. 50, ils 7 da fevrer, vegn ei lamentau sur il schliet uorden dallas scolas dalla Cadi e ch'en biaras vischnaucas, priu ora **Tujetsch**, vegnien ils cudischs da scola, dai ora dalla societad catolica per meglieras scolas, buca duvrai etc.

(Grischun Romonsch 1837, nr. 50, ils 7 da fevrer)

1838

Tujetsch – En nossa cuminonza entscheiva a flurir ina nova frastga d'industria e commerci. Schon dis ed onns ha la patria grischuna tarmess naven grevas summas daners per vischala ed outras facturas da tiaracotga. Ussa aber havessen nus ina fabrica da semeglionts artechels denter nus. Passa in onn ei tscheu in figulant (luvrer da tiaracotga), che ha baghegiu si fuorn e luvratori, e producescha da tuttas sorts facturas da tiaracotga sco vischala, quadrels per pegnas etc. Sche sias lavurs tegnan la prova vinavon - sco ins sa ver speranza – e buontad e qualitat da ses artechels arrivan adual allas manufacturas jastras: sche per ton pli fuss ei da cuir il gudogn a nossa gliued, ton per patriotissem, sco era per motiv, ch'ils daners restassen en la tiara, e l'industria, la quala ei schiglioc tier nus zun manca, vegness destadada si ed alzada. Ei fuss per quella fin bein ludeivel, sche buns patriots e sez la regenza encuressen da sustener quella e semegliontas interpresas cun ina ni l'otra favur, ed aschia fagessen anim e bien spert tier novas interpresas d'industria;

sinaquei che ferton, che novas vias da commerci e communicaziun vegnan planisadas e menadas ora, era commerci ed industria fluessen en nies interiur. Ei muncass a nus buca la situaziun, buca ils duns e buca las materialias tier diversas manufacturas; aber ei manca per bia loghens gl'emprem impuls, ed il ver spert industrial. Quei duegien pia savieivels e bus patriots encurir da vivificar e semnar denter nus per promover il beinstar public.

1840

Emigraziun

Riedi Johann Anton von Rueras, Tavetsch, studierte im Kloster Disentis, zog dann nach München, wo er Bayerischer Finanzrat wurde. Als solcher findet er sich viele Jahre im bündnerischen Staatskalender. Er starb um das Jahr 1840.

1841

Cavorgia in hof da paucas casas en **Tujetsch** duei haver concludiu da baghegiar ina casa da scola. In exempel che mereta imitaziun. Contas grondas vischnaucas dat ei, nua ch'ins ha negina casa da scola.

Amitg dil Pievel (I) 1841, nr. 50

1847

Tujetsch ... Era en **Tujetsch** spetgav'ins in meglier regulament da scolas, denton par'ei ch'ei seigi vegniu refretg pia vinavon plaunsiu?!

Il Romontsch nr. 10 da 1847

1847

La vischnaunca da **Tujetsch** ha ils 30 da matg 1847 unitamein tschentau si in fondo da scola da 11'000 flurins, ditgel endisch melli. In bi e zun legreivel progress e segiramein mai seudius ellas annalas tuatschinas suenter la mort dil glorius Pieder de Putnengia.

Il Romontsch nr. 23, 1847

1848

Sin **Cadruvi** a **Sedrun** duei vegnir baghegiu in stupent casament per las scolas da **Sedrun**. Per treis outras casas da scola, eis ei schon ussa lenna sil plaz. **Tujetsch** sestauscha pia cun honor vinavon.

Il Romontsch nr. 15, 1848:

1850

... Alla giuventetgna auda igl avegnir e sche la vischnaunca da **Tujetsch** ha dacuort baghegiu ... treis casas da scola ed ha presentamein emploiau treis scolasts, gl'emprem cun ina paga da 350 flurins, il secund cun 80 ed il tierz cun 50 flurins (ils dus davos mo pigl unviern), sche sa mintgin concluder, ch'ella hagi il dretg quitau per l'educaziun dils affons ...

Amitg dil pievel nr. 13, 1850:

1850

Direcziun da polizia ariguard quei skelet d'in um anflaus si l'**Alp Tschamut**. Archiv da cumin nr. 1075, 26 da zercladur 1850.

(Notizia da pader Baseli Berther)

1850

Selva. Lavina, donns e corrispondenza cun la cassa d'agid da quella. Archiv da cumin nr. 1049.

(Notizia da pader Baseli Berther)

1851

... Ils Tuatschiners, ch'ei plein premura per scolas, uauls e vias e ch'ei era gia vegni encorunai cun differents premis cantunals, han questa primavera puspei entschiet a midar lur via encunter Mustér en in formal stradun, ed igl ei remarcabel, cun tgei tschaffen ed entelgientscha che la glied lavuran vid quell'interpresa. Ei fuss giavischeivel, che las autras vischnauncas dalla Cadi imitassen silmeins empau quei bi exempel; ualvess che lur lavurs stoppien pitir per mundar empau la crappa ord via, che glied ed animals sappien ir senza dapertut scarpitschar en e mintga ton toc da en venter ..

(Amitg dil Pievel 1851, nr. 31, 1. d'uost)

1851

Nos aults dueien aunc haver ina grondissima massa neiv, la quala metta en gronda tema ils habitonts muntagnards. A **Rueras**, ella **Val Tujetsch**, ei avon pign temps vegniu giu ina gronda lavina e fatg cauld als habitonts, nunditgond la fortezia fatga per defesa encunter la lavina. (Amitg dil Pievel 1851, nr. 16, 18 d'avrel)

1853

Clavau a **Sedrun** ch'ei barschaus giu, dau en donn. Archiv da cumin nr. 1051.

(Notizia da pader Baseli Berther)

1857

Publicaziuns

Cloms da quen

Concessiun dil Cussegl Pign ils 20 da fevrer. Cumin dalla **Cadi**. Cloms da quen: Sep Antoni Giacomet retschevider da quen signur assistent Giachen Antoni Schmet, omisdus da **Tujetsch**.

Nova Gasetta Romontscha, 1857, nr. 10, 6 da mars

1857

La fiera da **Trun** ei stada frequentada da bia glied e tiers. Vaccas, stiarls e vadials eis ei vegniu vendiu e zuar per bials prezis. Era la mendra caura ei vegnida sin in marenghin. La dretga fiera da cauras vegn denton tenuta mardis proxim a **Tujetsch**, nua ch'in sulet pur ha quest matg vendiu cauras per 340 frs. Silla fiera d'**Ursera** eis ei uonn catschau zun paucas vaccas. Ils purs fussen bein narradira, sch'els massen cun lur tiers sur cuolm, cura ch'els san vender quels en nuegl per stupents prezis.

Nova Gasetta Romontscha, 1857, nr. 23, 5 da zercladur

1857

Ins ha schon legiu vi e neu da sventiras daventadas cun affons tras tassis da mustgas. Quels dis vess era gleiti in affon da **Tujetsch** saviu vegnir per la veta sin quella moda. Ses geniturs vevan rasau ora en stiva pupi da mustgas che cuntegn era arsenic e per giavinar las mustgas pli fetg vevan els bess empau zucher sissu. Fertion ch'els eran occupai, va la buobetta vid il pupi, pren quel en bucca, il gust dulutsch plai, ed ella maglia in ton. Per ventira ha ella cuninaga stuiu render ed entras spert agid medicinal eis ella mitschada dalla mort ed il geniturs culla tema. In niev exempel ch'ins sa mai esser precauts avunda el survigilar ils affons.

Nova Gasetta Romontscha, 1857, nr. 30, 24 da fenadur

1857

Ina descripciun dalla **Val Tujetsch**, sco habitonts e products, mira feuilleton: „Impressiuns da viadi I“.

Arrivaus silla collina da **Mumpé Tujetsch** va lura tut alla grada vinavon silla davosa terrassa dalla **Partsura**, ell'amureivla **Val Tujetsch**. In stupent selvadi cun cuolms pitorescs, oreifras pastiras, fritgeivels funs ed in bi, activ, svelt e legher pievell!

Encunter miezdi sesarvan las vals **Nalps**, **Curnera** e **Maighels** provididas cun bials glatschers. Viers gl' **Uri** sesaulza il **Badus** ni **Sixmadun** culla fontauna dil **Reinsura** e visavi l'aulta stgeina dil **Crispalt**, enamiez els igl jarvus cuolm da **Milez** cul pass ad **Ursera**; encunter nord dus hazers coloss da 11'000 peis altezia: il **Culmatsch** ed il **Pez Tgietschen**; denter en il **Tgiern dil Ritzli** cun in carpus ed unfiseivel trutg giu ella **Val Maderana**, che sbucca giul **Steg**.

Il **Bostg**, igl ault denter **Tujetsch** e **Mustér**, che schai a mesa val e porsch'in oreifer prospect, paress d'esser destinaus per rinforzar signurs e signuras cun frestg'aria e scotga caura. Duess la viafier menar plaunsiu miez il mund tras la **Surselva**, sche po il **Bostg** survegnir in renomé europeic, ual sco il magnific **Tgiern Maler** ella **Val Nalps**, che fuss tenor las expectoraziuns dils inschigners, che lavuran vid la renomada carta da Dufour, schi remarcabels da muntar sco

il **Rigi**, **Faulhorn** e **Pilatus**. Mo donn che nossa biala tiara e sias remarcablads ein buca pli enconuschentas, schiglioc targessen ellas neutier tut in auter diember da viandonts.

Ual schi bials sco ils cuolms da **Tujetsch** ein, ual schi bials ein era las pastiras. Quellas porschan buca mo savurus pastg ad in grond diember da tiers, mobein culla fanada, ch'ei vegn cheu segau ora, enviarna **Tujetsch** 100 armauls! En neginas vischnaucas ei il fein a pastg da schi gronda impurtonza sco cheu. Senza negins funs ein ins el stan d'envernar ina vacca ed ina roscha cauras e forsa aunc vender empau fein. Buca per nuot eis ei vegniu pretendiu dalla cumissiun catastrofala dil circuit "ch'en **Tujetsch** stett'in pur bein cun nuot rauba". Igl ei la tiara nua che latg e mèl flessegian sco gia siu vegl num cheltic "**Tavaech**" (habitaziun el plaun da pastg) dat d'entelgir. Il temps ch'ei vegn fatg fein a pastg ei tut si ella greppa, umens e femnas ein armai cun carpialas e bia bleissas ein schi prigusulas ch'in sulet pass falliu betta en bratscha alla mort. Ils spirituals bandunan quels dis buca la casa, nunsavend qual mument ch'els vegnien clamai per provider in sventirau. E tonaton lavura tut cun grond ardiment, ed ei seschass dar ina zun interessanta descripziun da quella veta. Ils prauscasa ein fritgeivels ed ins paga pils legi ora tochen miez taler il fest! Salin vegn ei mess ora pauc, persuenter vesan ins ils pli stupents segals, strom da 6 - 7 peis lunghezia cun grondas e bialas spigias; il dumiec crescha aunc si **Tschamut**, 5300 peis sulla mar, il pli ault vitg ella **Europa**, nua ch'ins anfla èrs; il strom vegn zuar buca liungs, mo las spigias ton pli pleinas. Il glin en **Tujetsch** ei renomaus, el ei tochen in bratsch e miez liungs e dat bia sem. Dad ina curtauna semglin eis ei vegniu fatg tochen 20 curtaunas – ina buna rendita. Ei dat denton onns nua che la purgina lavaga tut ils èrs; aschia legian ins egl urbari dad in purgina el gissiatavel tschentaner, che ha totalmein giu ruinau la raccolta, taluisa che 80 personas, babs da famiglia cun dunna ed affons, han gl'atun stuiu emigrar giu viers l'**Ungaria** per buca murir dalla fom.

Enconuschent ei il bien humor e l'aulta e clara vusch dils Tuatschins. Els ein adina da buna veglia ed amatur d'empau canera; schi'ins auda a grend els, sche ston ins tuttina buca tertgar, ch'els seigien malperina ed aunc bia meus ch'els secarghien. Els sedattan ora sin tuts mauns e plirs fan stupentas fatschentas egl jester. Las bialas frestgas mattauns setilan bugen el dumiest, ed in proverbi di, ins sappi mai nua las mattauns da **Tujetsch** ed ils cavals laschien lur ossa. Ina profana cumparegliaziun!, schegie ch'il cavagl ei il pli niebel animal da casa; denton ei quei proverbi ina viva emprova che las Tuatschinas hagian dapertut bien esit.

Ils turists, che admiran cheu la biala natira el ravugl da maiestusas muntognas primitivas ed ils naturalists, che fan en quels cuolms ina preziosa raccolta da mineralias, anflan ellas ustrias da **Tujetsch** bien tractament. Negins viandonts passan spell'ustria dalla Cruna a **Sedrun** vi, senza star eri e considerar l'admirabla flora, che ornescha si las finiastras dall'entira fatschada; mo era negins viandonts han bandunau quella schitta e schubra casa senza remarcar el "Fremdenbuch" lur cumpleina cuntentientscha.

Basta nus stuein prender cumiau da **Tujetsch** ed ir sur cuolm. Igl ei las treis e mesa dalla damaun e nus lessan la sera esser a **Berna** ed igl ei aschia buca da piarder temps. Nus essansemess sin viadi ed arrivai a bun'ura ell'**Alp Tiarms**. In stavel plein vaccas e dus pedagogs, vulgo "schulmeisters",

che mulschan. In tschaler cun plunas curters e silla cruna speras tractats romontschs sulla pedagogia e metodica. Tgei remarcabel cuncontrast! Tgei curiosidad per in pedagog tudestg, ch'enconuscha buca la veta romantica da nos scolasts! Fuss quei stan, al qual ils geniturs confidan lur pli grond scazi, salarisaus tenor merets, nus lein buca pretender a proporziun dils emploiai federals, lura stessen nos scolasts ella **Bassa** sper lur affons, e stuessen buc encurir la stad lur paun sco pasturs e signuns. Denton ha quella mala circumstanzia tuttina era entzatgei bien. L'aria alpina, las bunas latgiras e l'emperneivla distracziun ein franc adattadas da consolidar la sanadad dil scolast e mantener sia buna luna.

Rinforzai tras in bien refrestg alpin, bandunein nus vaccas e pedagogs e semettein en tutta cufla sin viadi encunter il lag sil **Cuolm d'Ursera**. Nus arrivein ad **Ursera** las otg, el medem mument sco la posta semettein en crotscha, che meina nus tut a galopp tochen **Flüela**. In viandont, che vul ver e guder nuot, quel dueigi seserrar ella posta!

Nova Gasetta Romontscha, 1857, nr. 38, 18 da settember

1857

Signur assistent Gion Ludwig Bèr *Beer* da **Tujetsch** ch'ei morts la jamna vargada, ha fatg si als paupers dalla vischnaunca in legat da 1000 frs. Milsanavon duei ei vegnir partiu ora ad els ina buot sal. Per rugalar si ina baselgia ch'era en decadenza ha el per plirs onns testamentau il tscheins d'ina acla. Ultra da quei ha el era seregurdau da dus paupers orfens da siu vischinadi per ton pli tgunsch gidar quels tier in mistregn. *Il cudisch da mortoris noda: 17-9-1857 D. Assistentes Joannes Ludovic Beer, fegl da statalter Jacob Martin Beer e Maria Margarita Rueras e la remarca: Foutor pauperum/nescio, 37 onns*

Nova Gasetta Romontscha, 1857, nr. 39, 25 da settember

1857

Dallas treis medaglias d'aur partidas ora per products agricols, ha era la societad agricola da **Cuera** survegniu ina per siu grond e bi assortiment da tuttas sorts fretgs, nominativamein eis ei vegniu dau ad ella per puma tosta e per mèl (da **Tujetsch** e **Medel**).

Nova Gasetta Romontscha, 1857, nr. 42, 16 d'october

1857

Las elecziuns dil cusseglier naziunal han dau ella **Cadi** il sequent resultat: ... **Tujetsch**: Dr. Condrau 127, C. Latour 1; ...

Nova Gasetta Romontscha, 1857, nr. 44, 30 d'october

1857

Cloms da quens.

Ils quens dil defunct signur assistent L. Bèr *Beer* dueien vegnir dai en a signur assistent Tumaisch Schmet, omisdus da **Tujetsch**.

Nova Gasetta Romontscha, 1857, nr. 47, 27 da november

1857

La jamna vargada ha finalmein era signur pader Sigisbert Monn da **Mustér**, che veva schon questa primavera survegniu la lubientscha d'extrar ord igl uorden claustral, bandunau per adina la claustra da **Mustér** e surpriu ad interim la caplania da **Sedrun**.

Nova Gasetta Romontscha, 1857, nr. 48, 4 da december

1857

L'ordinaziun dil Cussegl Pign, che constrenscha ils vitturins dalla **Surselva** dad ir silla via nova mo cun sliusas d'in bratsch e miez ladezia, ha fatg schliet saung en bia vischnauncas. Ils vitturins dils loghens giud via, sco **Lumnezia** e **Tujetsch** etc. san nunpusseivel duvrar quels maltschecs carpiens sin lur stretgas vias ed aschia stuessen els mintgaga brattar giu sliusa cura ch'els vegnan silla via nova. Quei fuss in grond discumet e caschunass dubels cuosts. ...

Nova Gasetta Romontscha, 1857, nr. 49, 24 da december

1858

Cloms da quens. Concessiun dil Cussegl Pign 1. schaner 1858: **Cadi**. Bistgaun Deflorin da **Tujetsch** ei concediu il concuors ed ils quens dueien vegnir dai en a signur statalter Stiaffen Schmet da leu.
GR 16.1.58 nr. 3

1858

Il marcau da **Glion** ei quellaga buca staus frequentaus sco quel dil december. Ils capomarcadonts da stiarls muncavan, ed aschia eis ei aunc restau dabia da quels tiers sin piazzafiera. Cun quella marcanzia „dalla cua“ ei lura in da **Trin** serendus a **Tujetsch** per vegnir sura da quels tiers – in cass aunc mai s’udius!
GR 23.1.58 nr. 4

1858

La tratga da biestga ha el novissim temps fatg bials progress, schegie ch’ils premis cantunals per s.v. bos han calau si e ch’ils geraus da vischnaunca han buca pli in bov per lur honorific uoppen da dignitad. Sco ins auda vegn ei ussa teniu pli e pli bials bos e la razza da biestga vegn pli e pli biala. – Era **Tujetsch** ha uonn vuliu far in’emprova e cumprau in per 14 marenghins. Sch’igl ei uonn vegniu vendiu a **Mustér** in vadi da siat jamnas per 85 frs. – in cass aunc mai s’udius en quella vischnaunca – sch’eis ei quei era da perscriber tier al meglier indrez da bos. Tgei grir e selamentar, cura ch’ils geraus han tenor lescha cantunala stuiu vegnir liberai da tener bov, sco sch’igl entir mund bestial stuess cheutras ir sutsura! Ed ussa vesa tut en, che quei ei stau in grond avantatg pella tratga da biestga.

GR 1858

1858

Las medaglias da premi, partidas ora dall’exposiziun industrialia ed agricolana a **Berna**, ein arrivadas. Survegniu han: La medaglia d’aur: 1) La societad agricolana da **Cuera** per in beinregulau sortiment da puma, fretgs dil funs, mél da **Tujetsch** e **Medel** etc.

GR 30.1.58 nr. 5

1858

La vischnaunca da **Tujetsch** survescha per muster d’in bien uorden d’uauls e baghegiar si spirontamein clavaus da crap. Igl ei aschia da capir, che glieud sedattan ora per biala crappa, denton fuss ei tuttina da giavischar, ch’ins schanegiass las venerablas reliquias dil bien temps vegl. Ei fa mal d’udir, che las cantunadas dalla biala ruina dil casti da **Putnengia**, ch’ornescha l’entira val, vegnan disfatgas per duvrar la crappa vid in clavau. Igl ei memia prosaic, gie empau barbaric d’applicar las cantunadas dil casti dil fundatur da nossa Ligia Grischa vid in nuegl! Videant consules ne queid detrimenti capiat res sacra!

GR 13.3.58 nr. 5

1858

Putnengia. Nossa critica sul disfar la biala ruina da **Putnengia** ni **Pontaningen** ha provocau reclamaziuns. Buca ch’ins hagi astgau snegar la barbarica commessa, na nus vein cun nos agens eglis saviu seperschuader da quella, cun profunda indignaziun observau, che la tuor porscha tuttavia buca pli il romantic aspect da vivon. Bein aber eis ei vegniu pretendiu, che quella ruina derivi dil temps dils Romans, seigi buca stada ina possessiun da Pieder da Putnengia, ed in secreigi buca da meritar il num da barbars per disfar las ruinas, nua che tirans habitavan vivon. Nus dein tier, ch’ils Romans hagian baghiau bein enqual casti per lur garnischuns e per segirezia dallas vias, sco il Spinöl e Maretiöl a **Cuera**, mo paucs han surviviü l’emigraziun dils pievels ed umens savieivels declaran da bunamein negliu saver observar il stil roman vid nossas ruinas. Nus dumbrein en nies cantun circa 170 castials ni ruinas ed ins po dir, che quels tuts seigien cun pintg’exceptiun vegni fundai en differentas periodas dil temps miez, pli tard vegni construi autruisa e biars puspei alzai

ord lur ruinas. Muort sia situaziun denter igl imperi **German** e l'**Italia** veva **Rezia** da gliez temps in gronda impurtonza militar e buca mo mercantila e schon per quella raschun eis ei vegniu menau si bia castials.

Ins sto buca tertgar, che tut quels castials seigien stai ignivs da tirans che mudergiavan il pievel. En biars habitavan nobels signurs ch'eran en temps da pasch ed uiara babs e menaders dil pievel. Bein enqual niebel baghegiava si da quels forts per porscher alla glieud in asil en temps d'uiara ni invasiuns. Aschia han era plirs uestgs da **Cuera** cumprau ni baghegiav castials per protecziun da lur subdits. Auters ein vegni baghegiav per schurmetg dallas vias e dil traffic, en in temps nua che perfin cavaliers sedevan giu cun engular e sblundergiar, aschia anfl'ins tals monuments en aultas cuntradas, nua che negina noblezia fuss schiglioc sedomiciliada, sco en **Stussavia**, **Avers** etc. Las famiglias noblas che vivevan en quellas tuors ein pella gronda part mortas giu ni emigradas. Aschia eis ei era iu culla respectada famiglia de Putnengia. L'**Acla Putnengia** ch'ei damaneivel dil „casti“, sco ils Tuatschiners numnan la ruina e segiramein porta era quel il num **Putnengia**. Per motiv ch'el era il sulet casti ella val, sche vegnev'el per ordinari numnaus cuortamein mo „casti“, gest sco quei ch'ils habitonts da **Mustér** e **Sumvitg** numnan aunc ozildi lur capitalas mo „vitg“. Sch'ei exista en **Tujetsch** in casti da Putnengia e sch'il fundatur dalla Ligia Grischa senumnava Pieder de Putnengia, avat da **Mustér** ed oriunds da **Tujetsch**, sche pon ins tuttina concluder cun buna raschun che quella tuor udevi a sia parentella. Nus pretendin mo quei, che Röder e Tscharner dian, dus umens che han legiu atras tuttas cronicas grischunas. Era Mohr numna en siu archiv quella tuor **Putnengia** ni **Pontaningen**.

Tuts viandonts che passan tras **Tujetsch** considereschan cun veseivel plascher la ruina da **Putnengia**, igl ei la pli gronda remarcablada historica, che l'entira val posseda e tier quei pitoresc ornament da quella cuntarda. Legian ils viandonts en lur viadè da quella renomada tuor, duessen ei aber buc anflar pli ella ed udir tgei tresta sort che sia miraglia hagi giu, sche vegnan els segiramein a far curvien sur in tal barbarissem. Il ministeri da **Württemberg** ha dacuort relaschau in avis allas suprastonzas, als plevons e scolasts, ch'els dueien haver quita che tuttas antiquitads vegnien bein reservadas e sin quei lessan era nus haver fatg attents las valladas romontschas. Denton schein nus suandar cheu in inserat tarmess tier a nus ord la capitala cantunala. Ils da **Tujetsch** vulan ornar lur val cun bials clavaus da crap e destrueschan denton lur pli bi e renomau ornament – il casti da **Putnengia** ni **Pontaningen**. Tgei nova revolta eis ei rut ora encunter las tuors e castials ella **Rezia**? Il temps dils tirans ei vargaus! En nies temps eis ei pintga honor pli da ragischar ora las veglias ruinas, quels monuments sepulerals, che fan memoria dalla decadenza da tuttas forzas humanas; sunder plitost da mantener e schanegiar ellas schi ditg sco pusseivel. Era en lur decadenza ein ellas aunc adina remarcablas pils historiografs, viandonts e habitonts dil liug, nua ch'ellas existan. Igl ei pia ina enzenna da pauca stema ed honor encunter venerablas antiquitads, sche habitonts dalla tgina dil **Rein** entscheivan en moda vandalica a sespogliar sesez da lur veglias reliquias! Ins duess buca crer d'anflar schi freid patriotissem sco la glatscha dil **Badus**. Ei tutta simpatia per nies renomau avat Pieder de Putnengia svanida? Nus tertgassen, ch'ei fuss adual schi cunvegnent als Tuatschiners d'esser empau loschs silla miraglia da quei um gigantic per l'entira **Surselva**, che sin in bi clavauet niev, fabricaus da mauns temeraris, che schanegian gnanc las trestas ruinas dil fundatur dalla libertad sursilvana! La glienda sper **Trun** ha tiegl engirament digl onn 1424 viu g'avat Pieder de Putnengia sco cau dil pievel. Fuss ei pia buca dueivel da tener en honor las davosas reliquias da quei um meriteivel per nossa patria, sch'ins posseda aunc zanza ina sbrenzla senn patriotic e senn d'engraziament; pertgei quel san ins mussar encunter las meffas ruinas da quei romantic casti **Putnengia**.

GR 27-03-1858 nr. 13.

1858

Cull'avertura dalla viafier san ins ir tschun gadas a di da **Cuera** a **S.Gagl**. Il cuors dallas postas vegn

mess en connexiun cugl ir e vegnir dalla viafier, taluisa ch'ins sa lu arrivar en in di da **Tujetsch**, **Mesauc**, **Giadina Su** etc. a **S.Gagl**.

GR 1.5.58 nr. 18

1858

Strusch ha ei giu dau la davos'ura digl avrel, sche ha il matg spert bess anavos nus el pli sgarscheivel unviern. Quels che tegnan sin striegn sesmarveglian buca giud la sgarscheivla nevada. L'aura ei gie secavestrada la notg da Walburga, dils 30 d'avrel sigl 1. da matg, nua che las strias tegnan da vegl enneu in solemn barlot cul demuni ... sche ha ei entschiet a never e neviu 55 uras, bunamein treis dis e duas notgs! A **Mustér**, **Medel** e **Tujetsch** seregordan umens da siatonta onns e varga onns buca da quellas nevas. Egl emprend liug er'ei 9 – 10 quartas neiv, ella **Val Medel** e **Tujetsch** 11 – 12 quartas. Ellas vischnauncas da **Sursassiala** ei tutta comunicaziun stada interrutta per treis dis, als perveseders er'ei in grond sforz per arrivar en nuegl e tiella scartezia da fein, stuevan ei aunc semudergiar per survegnir aua. Per ventira ha igl Altissim pertgirau da grondas disgrazias. Ils habitonts da **Selva** ein fugi a dretg temps en **Novaselva**, la lavina da cauld ei vegnida giu, mo senza far donn al vitget. La bun'aura luenta la neiv cun ualti bien ried ed aschia eis ei da sperar ch'ins possi scappentar ils tiers.

GR 08-05-1858 nr. 19.

1858

Publicaziun.

La fiera da **Tujetsch** vegn tenuta mardis proxim, ils 15 da quest e zvar a **Sedrun**.

Tujetsch, ils 10 da zercladur 1858

Igl actuaritad da vischnaunca

GR 12.6.1858 nr. 24

1858

La fiera da **Tujetsch** ei stada la pli viva da tuttas fieras ch'ei vegnidas tenidas questa primavera en **Surselva**. Dil cumin da **Rueun** e dalla **Cadi** eis ei vegniu catschau bia biestga, ch'ei vegnida vendida per bials prezis, schegie ch'ils d'**Uri** fagevan la fiera d'**Ursera** mo beffas cun quellas. Igl ei era vegniu schau via da bia cavals per tscheins als Tudestgs. Els han pagau 24 – 30 talers per cavagl, aber enviau anavos il rufid. Il bia han ils numerus Tudestgs marcadau, ils marcadonts da **Tujetsch**, ch'ei schiglioc plein fiug, miravan mo tier, sulet el consum dil gustus bier da **Glion**, han ils Tuatschiners fatg concorrenza culs jasters. – Las nuorsas da piazas han uonn tratg mal e biars manegian perquei tenor in vegl proverbi, ch'era ils stiarls vegnien d'atun buc a trer bein. GR 19-6-1858 nr. 25

1858

Trest'aura. Dumengia vargada eran las muntognas vestgidas en alv, ed ella **Cadi** era la neiv tschentada tochen viers **Trun**. Tras quei ein ils èrs vegni terrai aschizun sco sch'ins vess zulau els. Tier tutta sventira han ins silmeins giu la ventira, ch'igl ei vegniu neginas scheltiras sissu, sco ins vess pudiu temer silla serenezia da dumengia sera. Oz venderdis, ein ils cuolms puspei nevi giu e silla dracca da quels dus dis eis ei strusch da sperar pli, ch'ils èrs levien puspei si. Igl ei da temer ch'els encaglien e ch'en bia loghens vegn ins a far pauc graun ni nuot diltut, tonpli ch'ei sedi: „Gl'uoost mett'il paun en canaster“. Ils truffels vevan aunc biala pareta, mo ins auda tscheu e leu, principalemin a **Trun**, a selamentond sulla veglia malsogna. Ellas alps, nua ch'ei flessegiava uonn tschelluisa pauca latgira, pon ins cumprender ch'en tala ruha aura „mondi il latg els corns“. Schi grondas ruhas egl uost han ins da bia onns enneu mai giu; duess aunc la biestga buca trer bein, sche vein nus in onn da miseria avon esch, ed il stupent avrel ha menau nus egl avrel.

GR 28-08-1858 nr. 35

1858

Era dus catschadurs da **Tujetsch** han sittau igl emprend di da catscha quater camutschs e zvar era

dus cun in siet. Ei vegn selamentau, ch'ils catschadurs dil **Tessin** ed er'enqual d'**Uri**, hagian fatg catscha da camutschs sin territori grischun e lu aunc d'in temps scumandau. Il meglier fuss ei, sch'ei vegness dalla Confederaziun anora scumandau diltut la catscha per entgins onns.

GR 11-9-1858 nr. 37

1858

La cumissiun federala ch'urenta ils uauls ei ier arrivada tochen **Tujetsch**, ella ha aunc d'inspectar la **Lumnezia, Valrein, Mesauc e Calanca**. Sco ins auda renconusch'ella, ch'ei seigi ils davos onns vegniu empau meglier cul regulament da nos uauls, mo deplorescha, che quels vegnan aunc adina buca cultivai scosauda. Tuccont tier la correcziun dil **Rein**, duei ella esser dil meini, ch'ei tuchi d'entscheiver quella ellas valladas grischunas e buca per giu **S.Gagl**, sco nos vischins da leu vulan catschar atras sin quen dalla Ligia.

GR 11-9-1858 nr. 37

1858

... En **Surselva** vegn la tratga d'aviuls pli e pli impurtonta e rendabla; il renomau mèl da **Tujetsch** e **Medel** vegn da fetg biars viandonts prius egl jester sco per ina raritad. ...

GR 25-09-1858 nr. 39

1858

Ina vacca taissa cun in fildirom ell'ureglia dretga e corna agrad ora ei sepiarsa la fiera da **Trun**. Tgi che sa novas da quei armaul vegn supplicaus da far da saver a Giachen Martin Curschellas a **Tujetsch**.

GR 30-10-1858 nr. 44

1858

Stalter Sigisbert Monn da **Tujetsch** ei sedeclarau insolvents e sin quei ei il concuors vegnius concedius. Ugau signur gerau Stiaffen Monn da **Sedrun**.

GR 11-12-1858 nr. 50

1859

Cloms da quens. Cadi. Ugadai ein ils treis affons da signur mistral Venzin p.m: Rudolf, Duri Battesta e Lisabet Venzin da **Tujetsch**, ugau: signur capitani Tumaisch Condrau a **Mustér**.

GR nr. 6 1859

1859

Las vischnaucas dalla **Cadi**, che han da pagar alla claustra da **Mustér** il tscheins fier datier da 1000 frs., vessen cumprau ora quel, mo insistend il convent sissu da far pagar ils 25avelis dil tscheins annual, ein las contractivas puspei interruttas.

GR nr.14, 1859

1859

Il cumin dalla **Cadi**. ed aschia ein elegi ora (sco derschaders) ils signurs dr. Decurtins da **Trun**, actuar Cajacob, Lucas Cavegn da **Tujetsch**, T. Condrau, assistent Caduff da **Breil**, assistent Pali da **Medel**. Sco deputai per dus onns ein vegni numnai: 1. Il president regent, 2. signur dr. Decurtins, 3. signur actuar Cajacob, 4. signur stalter Gion Andriu Berther da **Tujetsch** e 5. ils signurs dr. Condrau e professor Condrau, in onn per in.

GR. 12-05-1859 nr. 20

1859

Collectas pil Ritli. A. Ellas scolas dil district Reinsu.

Rueras	contribuents 21	1.71 frs.
Selva	18	2.85 frs.
Cavorgia	13	0.95 frs.
Sedrun	45	1.90 frs.

1859

Avis. Ei vegn cheutras fatg da saver che la fiera da **Tujetsch** vegni tenuta gievgia proxima, ils 16 da quest e zuar a **Rueras**.

La suprastanza da **Tujetsch**.

GR nr.24, 1859

1859

La fiera da **Tujetsch** ei uonn stada frequentada da bia glieud e tiers. Digl **Uri** era ei vegniu neu ina massa umens e femnas. Las cauras – il capoartechel da quella fiera – mavan l'entschatta tut el luft per aults prezis, mo cura ch'il caver da **Medel** ei arrivaus sin piazzafiera, han ei entschiet a dar sut en e tgi che ha buca vuliu turnentar, ha stuiu vender in taler pli bienmarcau ch'avon. Era da bia vaccas eis ei vegniu marcadau per fetg andants prezis. – Il davos han Tudestgs perfin giu commiseraziun culs cavals e priu si enzacons a tscheins, bein aber per pauc pli che pella mesadad dils prezis d'onn.

GR nr. 25, 1859.

1859

Sco remarcablada dalla presenta vegetaziun remarchein nus, ch'ei duei da **S.Antoni**, ils 13 da quest, esser vegniu anflau spigias salin a **Tujetsch**. (?)

GR nr. 25, 1859

1859

Dumengia vargada ein sis teologs grischuns vegni benedi ora a **S.Pieder**, numnadamein ils revendissims signurs: Monn da **Tujetsch**

GR nr. 35, 1859.

1859

Nus havein schon relatau ch'ils selvadis secuntentien zun fetg culla raccolta dils fretgs. Denter quels ventireivels ei era la **Val Tujetsch**, che seregorda darar d'in aschi fritgeivel onn. Siu glin, renomaus ell'entira **Surselva**, para da dar ina splendida rendita. In particular ha giu semnau ina curtauna semglin e fatg 27 curtaunas e mesa. El ha giu mess stubla e fretg suravia cultem da tiers manedels. Tiella reha fenada e risdivada han ils Tuatschiners aunc fatg – sco ei vegn segirau – da mellis buordis fein a pastg ellas muntognas, ed aschia pon ins spitgar, ch'ils stiarls vegnan quest unviern ad esser tschercai sils marcaus da **Glion**. – Tuccont tier la fiera da **Ligiaun** vulan ei pretender, ch'ei seigi ussa buca pli schi bunas tunas.

GR nr. 38, 1859

1859

Nus vein en in da nos davos numers giu fatg menziun dil destinguu glin da **Tujetsch**. In um da fei ord quella vischnaunca ha ussa raquintau a nus ina secunda raritad sur da quei fretg. El hagi giu en siu iert ina teglia ni plonta da glin che vevi 137 borlas! Da quintar sco solit per ina borla 11 cauls, vess pia quella teglia purtau ina raccolta dils 1507 dubels.

GR, nr 40, 1859

1859

Cloms da quens. **Cadi**. Statalter Giachen Martin Biart da Tujetsch, **Cavorgia** ei puspei el concuors; ses quens ein da tarmetter tier a signur gerau Duri Venzin da **Rueras**.

GR, nr 41, 1859

1859

Marcadonts da Tujetsch ein i cun vaccas silla fiera da **Meiringen** e cun quellas, che els han buca saviu vender ad **Altdorf**, ein els sembarcai pil cantun **Lucerna**. Beinenqual renconuschiu pretenda ch'ei seigi buca schi grond gudogn, sco ins manegi, da vender ora tontas dallas bialas vaccas, schegie ch'ellas paghien bein, per motiv che la razza piteschi memia fetg cheutras; mo speranza

che las vaccas, che restan anavos, vegnien tenidas ton meglier e ch'ins hagi da quellas la dubla rendita.

GR, nr. 43, 1859

1859

In stierl culla marca P. A. ei sepiars; tgi che sa novas da quel, ei supplicaus da schar saver signur Paul Schmet a **Tujetsch**.

GR, nr. 43, 1859

1859

Ier ei vegniu satrau a **Tujetsch** igl aultreveriur sur Giusep Deplaz, ch'ei staus varga 40 onns caplon egl isolau e per la lavina prigus vischinadi da **Selva**. El er'in um d'ina exemplara conduita ed in fideivel survient dil Segner, che veva da far zun pauc cul mund. R. I. P.

GR, nr. 44, 1859

1859

Annunzia da mort

En profunda dolor fan ils suttascrets da saver a parents ed enconuschents, ch'ei hagi plaschiu agl Altissim da clamar ord questa veta, speranza tier ina megliera, nies car frar

Sur Gion Giusep Deplaz

Caplon a **Selva**

El ei morts la notg dils 25 sils 26 da quest suenter ina malsogna da 15 dis, en ina vegliadetgna da 73 onns, provedius culs s. sacraments. Ins recamonda il defunct alla pia memoria da tut ses enconuschents, cunzun allas s. oraziuns da ses confrars spirituals.

Tujetsch, ils 26 d'october 1859

Ils fargliuns en malencurada

GR, nr. 44, 1859

1859

Cadi. Ugadadas ein sequentas personas: 1) Gion Martin Peder (vegl) ugau statalter Stiaffen Schmet, omisdus da **Tujetsch**. ...

GR, nr 44, 1859

1859

Cloms da quen. Ils quens digl emigrant sehelmeister Gion Banadetg Deragisch da **Tujetsch** ein da dar en a signur assistent Giachen Antoni Schmet da leu.

GR, nr. 48, 1859

1859

Altezia dils divers vitgs en **Surselva**. En pign temps vegn ei puspei a cumparer in niev blatt dalla gronda carta federala da general Dufour; quel cuntegn l'entira **Surselva** cun pliras parts cunfinontas. Sco nus vein schon remarcau inaga, ei quei la pli gronda, bial'ed exacta carta, ch'exista sulla **Svizra**, gie neginas autras tiaras han da mussar si ina semeglionta. Quei stupent blatt vegn a far plascher a scadin Sursilvan. Nus vein denton copiau giu las altezias dallas vischnaucas sursilvanas, per far veser il successiv sbassament da nossa vallada. L'altezia ei dada en meters sulla mar, in meter ei 3 ½ peis ni 5 bratscha nova.

Pass d'Ursera:	sur Tiarms	2154 meters
	sur Tschamut	2052 meters

Pass sul Crizli	2350 meters
------------------------	-------------

Tschamut	1660 meters
-----------------	-------------

Selva	1540 meters
--------------	-------------

Rueras	1360 meters
---------------	-------------

Camischolas	1424 meters
--------------------	-------------

Sedrun	1398 meters
---------------	-------------

GR, nr. 49, 1859

1859

Cloms da quen. Cadi. Gion Florin Riedi da **Tujetsch** fa da saver ch'el paghi dacheudenvi negins deivets da siu fegl Gion Rest. Tgi che ha d'haver dil fegl duei dar en a signur gerau Duri Venzin. GR, nr. 53, 1859

1860

Pauperesser

....**Tujetsch**, nua ch'ils paupers pudevan vivon mirar tier co il terment muvel dils beinstonts sbutlava giu las stupentas pastiras ed alps cuminas, ha ussa encuretga da bonificar ils „murdius“ cun dar ora ad els tocs pastira per schar semnar truffels e graun. Cun quellas sorts han gia bia vischnauncas segidau, ed aunc biaras savessen far il medem.

Nova Gasetta Romontscha nr. 1, 1860

1860

Quels dis ha la nunmisericurdeivla mort separau a **Tujetsch** ina letga da 62 onns, 2 meins e 2 dis. Probabel la pli veglia letga dall'entira **Cadi**, sche buca dall'entira **Surselva**. Igl um ch'ei ussa morts, veva varga 88 onns e la dunna che viva aunc, ha cumplenu ils 93 onns. Sch'enzatgi duess dumandar co quels seigien vegni vegls, sche san ins rispunder: cun viver en pasch e buna veglia, esser activs, setener vid la broda e tschagrund fiers e buca cun tudi sevilar, esser lischents e slavidrar caffè. *Ei setracta da Simon Fidel Decurtins fegl da Gion Antoni e Riedi Margreta Catrina, Rueras, remarca: Senilites, vegliadetgna: 88 onns; naschius 1773; maridau 1798 Maria Catrina Berther (1767-1960)*

Nova Gasetta Romontscha nr. 1, 5 da schaner

1860

Uauls

... Per ina emprova, che nos meinis cheu allegai selaschien tgunschamein exequir, alleghein nus igl exempel dalla vischnaunca da **Tujetsch**, che ha segiramein in dils megliers uordens forestals, ch'ei dat tier nus e nua ch'il quitau e l'energia dalla suprastanza spargna tut cumandar e dictar dils bostgers. En quella vischnaunca vegn ei pagau per in lenn tochen 20 francs. Quels onns eis ei vegniu baghegiu leu in grond diember da stupents clavaus da crap e vid sias classenas vesan ins spirontamein lenna fendida enstagl lattas. Persuenter aber ei la cassa da vischnaunca en bien stan ed ils uauls serefan ch'igl ei in plascher.

Nova Gasetta Romontscha nr.2, 1860

1860

Questa jamna eis ei stau per la **Surselva** si marcadonts da vaccas tochen **Medel** e **Tujetsch**. Ei han cumprau si dabia tiers e pagau fetg bein. Vaccas danvons eis ei zuar fetg paucas, mo ils bials prezis caztgan da vender.

Nova Gasetta Romontscha nr. 5, 4 da fevrer

1860

Ils 23 d. q. eis ei serimnau a **Mustér** 22 amatur d'aviuls, spirituals e seculars ord las vischnauncas da **Tujetsch**, **Mustér**, **Medel**, **Sumvitg** e **Trun** ed han concludiu da constituer ina societad per promover la cultivaziun d'aviuls. Sco president ei signur farrer Durgiai da **Sedrun** vegnius numnaus.

...

Nova Gasetta Romontscha nr. 8, 25 da fevrer

1860

Cadi. Ugdai ein: Ils dus absents affons dad Alois Decurtins p. m., ugau: signur gerau Duri Venzin, omisdus da **Tujetsch**. Onna Maria Berther, feglia da Martin Felici p.m., ugau signur Giachen Antoni Giossi, era da **Tujetsch**.

Nova Gasetta Romontscha nr. 8, 25 da fevrer

1860

Il fevrer ei vargaus e satraus. El ei buca mo staus pli liungs ch'igl ordinari sonder era pli ruhs. El ha entschiet cun cufla ed ha ballistrau tochen il davos di. Gie, bia casas e clavaus vessen negin tetg pli, sche quel fuss buca staus fermaus giu entras ina brava neiv. El ha fatg siu duer cumpleinamein e tonaton parev'ei ch'el lessi aunc far bien ils davos dis, sch'el vess giu schau muncar enzatgei. Da plirs mauns aud'ins da sgarscheivels suffels dils 27 e 28. Enta **Medel** ha el buca mo rut en l'escha e bess las grundas da tetgs-londas pli lunsch, sonder perfin ruinau ina grunda da tetg cun plattas. Calonda mars ha purtau stupenta serenezia da 4 grads calira e favugn.

Nova Gasetta Romontscha nr. 3, 3 da mars

1860

Essend ch'il secretari ella canzlia cantunala, signur Cristian Muggli da **Tujetsch**, ei morts il fevrer vargau, sch'ei sia piazza scretta ora el Fegl Ufficial. *Il cudisch da mortoris noda: 20-02-1860 D. assistentes Gion Cristian Muggli, fegl da statalter Martin e Degonda Maria Cristina, Rueras ? 38 onns.*

Nova Gasetta Romontscha nr. 10, 10 da mars

1860

Cloms da quens. Cadi. L'absenta Cristgina Andriuet da **Selva**, ugau gerau Gion Andriu Berther, fegl, era da **Tujetsch**.

Nova Gasetta Romontscha nr. 16, 21 da mars

1860

Cadi. Ugadai ein: ... Giachen Mudest Deragisch, ugau gerau Lucas Cavegn, omisdus das **Tujetsch**.

Nova Gasetta Romontscha nr. 23, 9 da zercladur

1860

Ils 12 e 13 d. q. ei stada la fiera d'**Ursera**. Cumpraders eis ei stau zun negins auters che Uranès. Sin las vaccas ha nossa glied gudignau pauc. Era cun las nuorsas han ei fatg pintgas fatschentas, schegie ch'ins sa dir che 22 – 23 frs. il pèr seigi pagau pial e quagl dallas nuorsas, sche han ils marcadonts gudignau nuot. Il pli fetg eran ils cavals tschercai. In da **Tujetsch** dueigi ver vendiu in cavagl da siu tratg per 35 marenghins, per da nos cavals in prezi maisudiu. A tscheins per treis meins predevien ei si cavals per 30 – 35 talers. – Ils 19 ei la fiera da **Tujetsch**, la davosa tier nus avon cargar ad alp.

Nova Gasetta Romontscha nr. 24, 16 da zercladur

1860

Questa jamna ei vegniu satrau a **Tujetsch** ina femna da 94 onns e 3 meins. Ella gudeva tochen il davos buna sanadad corporala e bien appetit, era aber totalmein sespiarsa dil spért e mava fetg en fanzegna. Veva ella per exempel gentau bravamein, sche era ella suenter in'ura puspei el stan da dumandar il gentar e sesmarvegliava, cura ch'ins scheva ch'ella hagi schon gentau. Essend siu um morts quest unviern, vegn ei in temps suenter fatg ad ella la damonda dad ina femna jastra, sche siu um seigi morts ed ella rispunda sissu: "Po schon esser, ch'el seigi morts." *Il cudisch da mortoris noda: 29-6-1860 Maria Catrina Berther, feglia da Gion Giachen e Berther Maria Elisabeth, Rueras, remarca: senilites, 93 onns,*

Nova Gasetta Romontscha nr. 27, 6 da fenadur

1860

Il fenadur ei staus in ruh gast, pli adattaus pigl unviern che per la stad. In'alp da **Tujetsch** ei vegnida cargada da s.Giachen, *ils 25 da fenadur*, ed ha ils emprems otg dis mintga damaun giu la neiv el stavel. Fein vess ei dau pli bia che quei ch'ins manegiava, mo igl ei gleiti da temer ch'el fetschi catschar pauc latg igl unviern.

Nova Gasetta Romontscha, nr. 31, ils 4 d'uost

1860

Il pugn da recapitulaziun pervia da sminuir il temps dalla catscha sin camutschs ei ella **Cadi** vegnius enviaus anavos cun in grond pli e zuar a **Tujetsch, Medel e Trun** unanimamein. Ils catschadurs ein sedustai sco liuns e declarau per ina malgiustia da vuler scursanir ad els il temps da catscha per schar vegnir neu ils Tudestgs e Talians e sittar naven nos camutschs. Ins vesa denton con necessari ch'igl ei da sentelgir cun nossas vischinontas tiaras sur dad ina generala fermada dalla catscha per enzacons onns. ...

Nova Gasetta Romontscha nr. 31, 4 d'uost

1860

Cloms da quen. **Cadi**. Ugadai ein: ... Ils dus absents Alois e Gion Antoni Gieriet, ugau gerau Duri Venzin, tuts da **Tujetsch**.

Nova Gasetta Romontscha nr. 31, 4 d'uost

1860

La gronda malaura dils 17 d.q. ha caschunau gronds donnns ella **Cadi** ed egl **Uri**. Sil **Lucmagn** ein treis armauls vegni pella veta, denter auter ei in bov vegnius menaus leu dil **Rein** giu e satraus enzanua en ina buola. Las punts da **Perdomat e Surrein-Sumvitg** ein dadas pell'aua ora. A **Sedrun** savevan ei buca qual'ura ch'il **Run** menassi naven ils morts en santeri. ...

Nova Gasetta Romontscha nr. 34, 25 d'uost

1860

Ina vegetaziun mai sudida! Ins temeava schon ch'il fein, ch'ins ha mess en uonn pudessi selevagar, mo dil sequent cass daventaus en **Tujetsch** vess negin semiau. Sin tut ils ladretschs dil **Dulezi** eis ei carschiu ord il fein bulius (parisols) dua, trei detta liungs! Il fein era suren ell'altezia d'ina mesas quarta tut bletschs e marschs.

Nova Gasetta Romontscha, nr. 37, ils 15 da settember

1860

... Las auas ein carschidas, cunzun ils reins da Tujetsch e d'Acletta. ...

Nova Gasetta Romontscha nr. 39, 29 da settember

1860

... Per quella gada han ei aunc segidau cun brevs, che han lu mess ella Cadi en grond moviment ils marcadonts falla secunda classa; perfin Tudestgs ein vegni neu da Ursera e han cumprau si stiarls a Tujetsch e Medel. ...

Nova Gasetta Romontscha nr. 40, 6 d'october

1860

Tenor novas metereologicas da **Medel** eis ei stau leu 8 grads ferdaglia ed oz 8 zolls neiv, mo per ventira fan ils selvadis da **Medel e Tujetsch**, inaga ch'il temps ei neutier, buca aschi ditg baselimann culs fretgs, sco ils da **Mustér**.

Nova Gasetta Romontscha nr. 42, 18 d'october

1860

L'elecziun dil cusseglier naziunal ha dau ella **Cadi** sequent resultat:

Tujetsch: 136 votants per Latour 14; Toggenburg: 122; Vieli: 0

...

Nova Gasetta Romontscha nr. 44, 1 da november

1860

Cloms da quens. **Cadi:** Agl absent Giachen Martin Deflorin, fegl da Giachen Plazi, eis ei dau assistent ella persuna da stalter Vigieli Jagmet da **Sedrun**, omisdus da **Sedrun**. Per Giachen Plazi Deflorin da **Sedrun** ei gerau Duri Venzin da **Rueras** numnaus sco assistent.

Nova Gasetta Romontscha nr. 48, 11 da december

1860

Posteriuramein remarchein nus ch'ei seigi quest atun tras Tuatschiners vegniu catschau en duas gadas circa 130 vaccas sursilvanas ella **Baviera Bassa**. Schon avon in per onns vevan ei catschau giu leu dabia vaccas ord la **Partsur**, ils cumpraders ein fetg cuntents da quellas e laudan ch'ellas dettien bia latg inaga ch'ellas hagian tuchiau il strom grischun.

Nova Gasetta Romontscha nr. 49, 8 da december

1860

Il resultat definitiv dalla votaziun sul pugn da recapitulaziun ariguard la viafier e las vias da communicaziun ei a nus aunc buc enconuschents, mo carteivel vegn el ad esser acceptaus tras la majoriad dils votants. ... Ella **Cadi** han **Medel, Mustér, Sumvitg, Breil e Schlans** acceptau el, **Tujetsch** (muort il manteniment) e **Trun** refusau. En tut en quei circuit 484 vuschs persunter e 187 encunter.

Nova Gasetta Romontscha, nr. 50, ils 15 da december

1860

Cadi. Ugadai ein: Statalter Gion Rest Monn ei ugau da Gion Antoni Deflorin, omisdus da **Tujetsch**.

Nova Gasetta Romontscha, nr. 51, ils 22 da december

1861

Ord la dumbraziun dalla populaziun grischuna. **Cadi**.

	casas	casadas	habitonts	umens	femnas	burgheis
Tujetsch	132	206	863	417	446	827

Nova Gasetta Romontscha, nr. 1, ils 5 da schaner

1861

El novissim temps eis ei vegniu alla glisch in project per ina fusiun dallas rivalisontas viafier sul **Gottard e Lucmagn**. Tenor quel duessen ins menar la viafier alpina naven dil **Lag da Lucerna** tochen sur **Amsteg**, da leu ella **Val Maderana** e tras in tunnel da 7-8 kilometers, circa in'ura e mesa, sut il **Pass Krüzli** a **Sedrun** e da leu sul **Pass Lucmagn**. Sin quella moda savessi ins unir la **Svizra Meridionala e Centrala** cull'**Italia** tras ina viafier che custassi 14 milliuns pli pauc che quella sul **Gottard**. Ei para ch'ils Tuatschins, che vulan „nuet“ survegnan tut: la via sul **Cuolm d'Ursera** e la viafier cun in stupent „bahnhof“ el **Plaun Sedrun**.

(GR 1861, nr. 1)

1861

Tscho ei nairas

Ina gasetta raquenta, tge la regenza vagi era tarmess tier a nossa vischneunca in formular per far suttascriber de surprender l'expropriaziun dil sulom ed il mantenimain della via ad **Ursera**. Ella segirescha tge quei segi per nus blutain ina formalidad, per raschun tge nus vaien schon deuas jedas suttascret claramain e noncondizionadamain de surprender il matenimain tochen sil quolm e di alla fin: Quei ei lu uschè!

Ben, sche quei ei usché, sche drov'ei betga de suttascriber quater jedas la madema tgaussa; ins laschi cun quei tge ei schon suttascret, ne ei quei betg avunda?? Al gasettist cusseglissen nus de far suttascriber igl emprem a Bern ils 12 tschien melli francs, tg'el maniava de ver enta pugn, sianter dei el vegnir tiels a **Mustair** e pér il davos tiels Tuatschiners, tg'an fatg nuet e teman nuet. Tgapeschas. Denton nueta per mal.

Tujetsch a Sumsassi,

nua che las uelps dattan ina l'otra la

buna notg

Giachen dellas Stgellas

Nova Gasetta Romontscha, nr. 1, ils 5 da schaner

1861

Publicaziuns

Tiers jasters.

La suttascretta suprastonza fa cheutras enconuschent ch'ella vischnaunca da **Tujetsch** sesanflien ils sequents tiers jasters:

1) Ina ansola che ha tagliau giu da sum l'ureglia dretga e duas furclettas davos en ella seniastra.

2) Ina ansola nera che ha dus snezs davos en ella dretga.

3) Ina ansola che ha ina furcletta ora sum l'ureglia dretga ed in snez davos en ella seniastra.

En termin da 15 dis ein ils proprietaris da quels tiers supplicai da vegnir e retscheiver quels en lur mauns.

Tujetsch, ils 30 da schaner 1861

J. A. Berther, genau

Nova Gasetta Romontscha, nr. 5, ils 2 da fevrer

1861

Clom da quens. **Cadi**. Giachen Plazi Deflorin da **Sedrun**, ugau genau Duri Venzin a **Rueras**.

Nova Gasetta Romontscha, nr. 5, ils 2 da fevrer

1861

Dumbrada dalla biestga ella **Cadi**:

	Tujetsch
Vaccas	401
Genetschas	191
Stiarlas e muias	72
Bos	-
Stiarls	236
Taur	4
Vadials	190
Cavals	35
Cauras	1420
Nuorsas	1060
Pors	259

Nova Gasetta Romontscha, nr. 6, ils 9 da fevrer

1861

Sco igl ei enconuschent ha il davos Cussegl Grond concludiu da mintg'onn applicar 4000 frs. vid premis a s.h. taur per cheutras megliurar la razza armentiva. ... Per reparter ils premis che vegnan sin 50 – 120 frs. in, legia il Cussegl Pign ora ina cumissiun da treis experts. ... Il davos Fegl Ufficial cuntegn quellas nominas: ... pella **Cadi** ils signurs: mistral Jacob Casura a **Falera**, capitani Mucli a **Tujetsch** e genau Pl. Derungs a **Breil**. ...

Nova Gasetta Romontscha, nr. 7, ils 16 da fevrer

1861

Sventiras. En **Tujetsch** seglian dus umens vid ina buora per retener ella. In carga cul maun, l'auter vul fitgar en la sigir e taglia giu dus dets agl εμπrem.

Nova Gasetta Romontscha, nr. 8, ils 23 da fevrer

1861

Gion Fidel, Giusep Antoni ed Onna Maria Peder, affons da Gion Martin Peder han ugau assistent Giachen Antoni Schmet, tuts da **Tujetsch**.

Nova Gasetta Romontscha, nr. 9, ils 2 da mars

1861

Tujetsch 149 votants.

Nova Gasetta Romontscha, nr. 11, ils 14 da mars

1861

Ella **Val Tujetsch** eis ei rut ora ina gronda emigraziun – aber mo denter la biestga armentiva. Per munconza da fein han ei leu stuiu tarmetter tschiens armauls pella **Cadi** giu “ell’ustria”. Il pli frequentau ei il grond hotel da **Laus**, nua ch’in brav pur ha vendiu fein per varga 800 frs. e zuar mo per 7 frs. il fiertel, ferton ch’ei vegn pagau en auters loghens tochen 10 frs. ... Malgrad tutta bun’aura va ei aunc in per gievias avon ch’ils stiarls sappien pastgar en **Tujetsch**. Ei era leu avon 8 dis ina nevada da varga 10 quartas altezia, gie ina part pretendan ch’ei eri ual aschi bia neiv sco il matg 1858. Per ventira han neginas lavinas fatg donn. Denton san ils Tuatschiners seconsolar cul vegl proverb: “Dad ina gronda nevada e numerusa casada duei negin sestermentar”.

Nova Gasetta Romontscha, nr. 13, ils 30 da mars

1861

Pertuccont ils bos. ... Ils da **Sursassiala** vessen pli bugen che l’urentada dils bos daventassi amiez liug dalla **Cadi**, a **Sumvitg**, buc a **Trun**. Tschelluisa ston ils bos da **Tujetsch** e **Medel** far in viadi da 5 uras, ch’ei per els in pregiudezi da trer premi. ...

Nova Gasetta Romontscha, nr. 15, ils 13 d’avrel

1861

Il Tagblatt cussegia allas femnas da tener en honor la pera tosta, las sneclas e zuescas, essend ch’ei selaschi spitgar pauca puma uonn. Bia pumera veglien buca flurir ed il matg vegnien ils baus a far grond donn vi dad ella. – Nus stuein denton remarcar, ch’il tscherscher da **Tujetsch** fetschi ina ludeivla excepziun, quel ei ussa decoraus cun tschereschas e zuar – tostas!

Nova Gasetta Romontscha, nr. 15, ils 20 d’avrel

1861

Sco ei tuna ha il pievel dalla **Surselva** buca grond tschaffen da separticipar vid la viafier cun in milliun francs, schegie ch’el ha cun resalva da 5 vischnauncas giu offeriu 1853 da schenghegiar tut ils funs e pastiras, ch’il sulom dalla viafier drovi! Ferton che **Tujetsch** ha secartiu da nuot entrar en quella damonda, ha la vischnaunca da **Mustér** concludiu da prender aczias pellas pastiras, pil material ch’ella sa dar e pella indemnaziun dils donns ch’ella sco tala savess pigliar. Sco ins auda eis ei pliras vischnauncas che vulan far las medemas offerats.

Nova Gasetta Romontscha, nr. 22, igl 1. da zercladur

1861

Per il barschament dil marcau da Glaruna, l’emprema dumengia da matg 1861, ha la vischnaunca da **Tujetsch** dau 105 frs. en daner.

Nova Gasetta Romontscha, nr. 23, ils 8 da zercladur

1861

Fuss ei buca pli adattau da destinar la fiera da **Tujetsch** sin in di fix che da mintg’onn stuer leger el calender, ch’ella crodi 8 dis suenter quella dad **Ursera**, dalla quala negin sa cura ch’ella vegn tenuta tochen ch’ella ei buca neutier? Era l’alteraziun da quella fiera denter **Sedrun** e **Rueras** savess calar si senza che la **Val Tujetsch** pitess cheutras il minim donn. Ins duei mirar sin la cunvegnientscha dils biars jasters che vegnan sin fiera e cheu sa scadin seperschuader che **Medel**, **Mustér** e **Sumvitg** furneschan pli bia glied e tiers ch’ils Tudestgs e per quella raschun duess la fiera vegnir tenuta a **Sedrun**. Tgei lessan ils Tuatschiners far encunter, sch’ils vischins da quellas treis vischnauncas declarassen, nus mein buca pli lunsch che **Sedrun**. Nus lessen lu uardar, nua che la gronda fiera vegness tenuta, schebein ils da **Rueras** vegnessen buc o **Sedrun**, ni silmeins tochen **Camischolas**, nua ch’ins vess ina pulita piazza-fiera, ustrias e caffès en abundanza. Denton veies nuota per mal vus da **Rueras**.

Nova Gasetta Romontscha, nr. 23, ils 8 da zercladur

1861

Avis

Ei vegn cheutras fatg da saver al respectiv publicum che la **fiera da Tujetsch** vegni tenuta ils 18 d.q. a **Rueras**.

La suprastonza da **Tujetsch**

Nova Gasetta Romontscha, nr. 23, ils 8 da zercladur

1861

La fiera da **Tujetsch** ei stada frequentada ualti bein da glied e tiers ed igl ei vegniu marcadau pli bia vaccas e cauras per pli bials prezis che la fiera da **Trun**. Tudestgs eis ei stau neu da biars ed ein turnai envi cun ina roscha cauras, muias e da bia cavals pri si per tscheins. Els han cheu pagau meglier che sch'ins fuss ius leura culs tiers. Al sribent che ha giu fatg tscheidi beinfundadas remarcas en nossa gasetta sur da quella fiera, stuein nus rapportar la legrevla nova, che siu giavisch pervia da tener inaga e per adina quella fiera a **Sedrun** vegni fetg probabel ademplier. Ils Romontschs eran malidis da stuer ir a catschergnond lur tiers en tutta calira pli lunsch che necessari. Ils Tudestgs han medemamein declarau, ch'els seigien fetg cuntents da vegnir a **Sedrun**. In Romontsch ha a nus expressivamein supplicau da notificar, ch'el hagi spendiu 4 frs. dapli cun ir pli lunsch e sper pli bia ustrias ora, che sch'el vessi stuiu ir mo tochen **Sedrun**. Sco ei vegn detg vulan ils da **Rueras** sez semussar genus e meriteivels pil publicum e sill'emprema vischnaunca voluntariamein resignar sin lur piazza-fiera.

Nova Gasetta Romontscha, nr. 25, ils 22 da zercladur

1861

... A Sedrun ei il **Drun** da biars onns enneu mai staus aschi vehements sco quei di, numnadamein ils 13 d'uost 1861.

(GR, 1861, nr. 33)

1861

... Ils mises ni cuolms han dau bia fein ed ultra da quei han las vischnauncas sco **Tujetsch** e **Medel** fatg ina gronda quantitat fein a pastg, taluisa ch'ils avdents da leu ston speronza igl unviern proxim buc ir ord vischnaunca cun lur muvels. Ei vegn quintau ch'in um pudevi far in fiertel fein a pastg a di e che sia schurnada purtavi aschia in taler. ..

Nova Gasetta Romontscha, nr. 36, ils 6 da settember

1861

Ils 22 d.q. ein nos marcadonts da **Tujetsch** e **Medel** semess sin via pella fiera da **Ligiaun** cun lur tiers cumprai si la primavera. Els han per ventira pintgas roschas e buca sefidau da comprar si enzatgei da num. Ils Glarunes ch'ei uonn stai sentardai per 2 dis muort il sbagl dil calender culla fiera da **Glaruna**, han passau il **Lucmagn** ils 25 d. q. cun circa 400 tgaus, era cumprai si il bia la primavera.

Plirs famus marcadonts dalla **Cadi** prefereschon uonn da star a casa enstagl frequentar l'emperma fiera da **Ligiaun**. Ils mulissiers han aunc mai tarmess aschi schliatas novas sco uonn. In da quels ha giu scret, ch'ins dueigi nuota vegnir uonn cun tiers, ni cun biars ni cun paucs. Speronza che la pintga catschada seigi empau scompa.

Nova Gasetta Romontscha, nr. 39, ils 27 da settember

1861

Publicaziun

La ludeivla vischnaunca da **Tujetsch** tscherca in **spazzatgamin** sut fetg favoreivlas cundiziuns per el. Da s'adressar tier la suprastonza.

Nova Gasetta Romontscha, nr. 39, ils 27 da settember

1861

La neiv dil davos settember ha tut anetgamein dau a nossa tiara gl'aspect d'unviern. Igl ei stau ina nevada da quei temps mai sudida da regurdientschas da glied. ...

Nova Gasetta Romontscha, nr. 40, ils 4 d'october

1861

Nuorsas jastras

Tiel suttascet sesanflan las suandontas nuorsas vanzadas ella zavrada da nossa vischnaunca da **Tujetsch**.

1) In alv che ha ell'ureglia dretga ina furcletta davos en ed aunc 3 strehs sil nas barschau.

2) Ina grischa, ella ureglia dretga ina furcletta ed in snez davos en ed in davos en, la seniastra tagliau giu da sum e fess.

3) In alv, ella ureglia dretga in snez davos en, la seniastra duas ruosnas, ina ei aber fessa ora, ed aunc ella medema in snez davos en.

4) Ina furcletta orasum l'ureglia dretga ed in snez davos en, la seniastra ina furceltta orasum l'ureglia, era in alv.

5) Ina tggisch alva, che ha ell'ureglia dretga dus snezs davos en, la seniastra tagliau giu mesa l'ureglia.

6) In ner grond che ha tagliau giu da sum dall'ureglia dretga e dus snezs davos en.

Ils proprietaris dallas sura numnadas nuorsas san quellas prender tier sesez cun pagar las spesas idas si e quei tochen ils 12 d'october. Da leu naven vegnan ellas a vegnir vendidas.

Tujetsch, igl'emprem d'october

Duri Wenzin, genau

Nova Gasetta Romontscha, nr. 40, ils 4 d'october

1861

Nossa Wochenzeitung setegn si sul pareri dalla cumissiun dil stan pervia dil manteniment dallas vias. Ella sa denter auter buca capir, co il cantun selaschi en da mantener il **Cuolm d'Ursera** schon naven da **Sedrun**. Mo nus savein capir aunc bia meins, cun tgei dretg ch'il cantun vul far pagar **Mustér** e **Tujetsch** l'entira expropriaziun ed el lu metter en sac las duas tiarzas che la Confederaziun paga da quella summa, sco da tuts auters cuosts che van si per quella via. Ei quei giustia e dueivladad?

Nova Gasetta Romontscha, nr. 42, ils 19 d'october

1861

Cloms da quens.

Cadi. Hans Giachen Berther da **Tujetsch** ei en concuors; ugaus da massa ein: assistent Giachen Antoni Schmet (giuven) e Tumaisch Huonder, omisdus da **Tujetsch**.

Nova Gasetta Romontscha, nr. 43, ils 25 d'october

1861

Il november 1861 figurescha **Tujetsch** cun ina facultad da 941'300 frs. ... Cun dar en igl avanzament ad quels 5 onns eis ei generalmein iu vess tier, tuttina dat ei bravs purs a **Tujetsch** e **Medel** che han en quels onns recaltgau lur facultad per 4 – 10 000 frs. Respect da tals casarins!

Nova Gasetta Romontscha, nr. 44, igl 1. da november

1861

La projectada via sul **Cuolm d'Ursera** vegn da miez october enneu stagiada giu e prida si da plirs inschigniers sut direcziun da signur Depuoz; ella survegn ina munta da 5 procent.

Nova Gasetta Romontscha, nr. 44, igl 1. da november

1861

Cloms da quens.

Cadi. Ils quens da Greta Catrina Caduff da **Tujetsch** ein da dar en a siu ugau scarvon Benedetg Rothmund a **Schlans**.

Nova Gasetta Romontscha, nr. 46, ils 16 da november

1861

La nova via sul **Cuolm d'Ursera** vegn naven dil vitg da **Mustér** tochen sils cunfins d'**Uri** 20'926 meters liunga ni 4 uras e 20 minutas. Da **Tschamut** munta ella sil cuolm mo cun 8 procent. Nova Gasetta Romontscha, nr. 46, ils 22 da november

1861

In per plaids a **Mustér** e **Tujetsch** ariguard la via sull'**Alpsu**.

Silla fin december sto nossa Regenza declarar al Cussegl Federal, schebein nus laien surprendre da baghegiar la via sull'**Alpsu** ni **Cuolm d'Ursera** encunter ina bonificaziun federala da 200 000 frs. Nies Cussegl Grond ha da sia vart acceptau quella generusa offerta e per levgiar ed animar las vischnaucas da **Mustér** e **Tujetsch**, ha el aunc concludiu, che quella nova via dueigi en sia entira extensiun dil vitg **Mustér** tochen sils cunfins d'**Uri** vegnir mantenida dil cantun anora. Essend che quei cuolm sto buca vegnir tenius aviarts gl'unviern, sche han las duas vischnaucas mo da menar la galera, che vegn preparada e bess ora sin quen cantunal. Il manteniment dalla via – la pli gronda grevezia – ei aschia prida giu ad ella ed ei resta mo aunc l'expropriaziun, quei ei il pagament pils beins, ch'ins drova tiel sulom dalla via. Ellas han ussa en cuort da rispunder al ludeivel Cussegl Pign, sche era ellas veglien da lur vart ir en la cunvenziun ni buc.

Aunc buca daditg vegneva ei insinuau da far surprendre **Mustér** e **Tujetsch** duas grevezias:

L'expropriaziun ed il manteniment. Sut quellas cundiziuns vessen nus buca saviu cussegljar da retscheiver la via, dapi aber che la pli greva cundiziun ei curdada naven, essan nus decisivamein per l'acceptaziun da quella biala offerta.

Ei sedamonda ussa mo: *Vus da **Mustér** e **Tujetsch** leis surprendre l'expropriaziun, sch'ei vegn baghegiu e manteniu a Vus ina stupenta via che porscha a Vus ina tut pli avantagiusa*

*communicaziun denter Vossas duas vischnaucas e la **Svizra Interiura**?* Sch'ins ponderscha ils avantatgs ch'in stradun porta als vivents ed allas suandontas generaziuns: **gie**. En mintga cass ponderei e turnei a ponderar avon che dir na, pertgei quella favoreivla occasiun vegn forsa mai a turnar pli e gronda ei en quei risguard Vossa responsablada visavi a vos vegnetsuenter.

...

Vus da **Tujetsch** aber che smuldis ton sulla schliata via sil territori dils da **Mustér** e smanatscheis da tgisar els alla Regenza, patertgei ch'ei seigi il mument da survegnir ina oreifra via. Patertgei ch'il cantun stoppi baghegiar e mantener las punts e vias sur vos prigulus druns e vegni perquei ad encurir da tener quels empau meglier a frein, duront ch'els smanatschan ussa d'ir cun vossa baselgia e vos morts. Vus che scheis adina, che vus survegnessies ad **Ursera** la rauba bia pli bienmarcau ch'ensi, sch'ei custassi mo buca ton da purtar neu. Bien, quellaga vegn ei fatg a vus ina via che vus saveis menar neu ella cun pintga spesa. Co sa l'expropriaziun tementar giu vus che saveis dar ora pastira per in grond capital e senza pregiudezi. Contas muschnas vegnan a vegnir schubergiadadas giud ils praus denter **Mustér** e **Tschamut**; tgei reha resursa da fadigias arva la construcziun dalla via nova?

Visavi aschi considerabels avantatgs svanescha la summa da 30 – 40 000 frs. che l'expropriaziun po custar a **Mustér** e **Tujetsch**. Quella tucca ei da pagar mo inaga, ferton ch'ils avantatgs cuozan adina. Meditei madiramein la causa senza pissiuns e pregiudezis, patertgei buca mo vi da vus, sonder era vid vos affons, beadis e sutbeadis; reflectei che l'entira **Surselva** giavischa l'avertura dil **Cuolm d'Ursera** e seigi spanegiada sin vossa decisiun e prendei lu vossas conclusiuns vengonzas ad in liber e saveivel pievel.

Sco ins auda duei il niev prelat *avat* da **Mustér** esser fetg importaus per la via dall'**Alpsu** e la claustra prompta da purtar tuttas dueivlas unfrendas.

Gasetta Romontscha, nr. 48, ils 29 da november

1861

La via sill'**Alpsu** avon la vischnaunca a **Mustér** e **Tujetsch**.

Allegrai tras il bien success a **Mustér** ein ils signurs cumissaris aunc il medem di serendi a Tujetsch. Essend pli datier dils glatschers e la contrada, priu ora las suleglivas spundas da **Sedrun** e **Camischolas**, aunc cuvretga cun neiv, han ei gleiti sentiù ch'ei seigi cheu in pli ruh clima che a **Mustér** e ch'ei drovi perquei gronda forza per sgargliantar ils pregiudezis e che lur vuschs vegnien bia pli tgunsch raucas che quellas dils Tuatschins. Gliendisdis – nua che l'entira val ei vegnida inundada da bulletins che purtavan igl unanim conclus da **Mustér** ed il plaid da monsignur avat, - eis ei vegniu tier fermas debattas en repetidas conferenzas. Fertion che plirs respectai vischins han cheu plidau e luvrau en favur dalla via ed in per perfin offeriu da garegiar negina indemnisaziun pils orts ni funs che quella prendi naven ad els, era ei denteren da quels che levan saver nuot dil grond schenghetg ch'ins offereva ad els. Il success era aunc dubius e buca senza tema e passadetgna han ils signurs delegai spitgau silla vischnaunca fixada sin s. Leci, *2 da december*. Igl impurtont e decisiv mument ei arrivaus. Ils umens da **Tujetsch** ein serimnai sin publica piazza, serrada en dil prigulus **Drun**, dalla periclitada baselgia cun santeri, dalla casa da scola e dalla via imperiala ed ual en fatscha al bi **Cuolm d'Ursera** – tut facturs che plidavan cun aulta vusch en favur dalla via. Dentuorn era ei plirs vischins da **Mustér**, ch'eran oz ual aschi plein marveglias sco las feglias dad Eva che formavan in bi rudi entuorn la radunonza. Il president arva la vischnaunca cun relatar l'impurtonta questiuon pella quala ei setracti oz e cun recumandar ruaus e prudientscha, senza aber cheutras vuler pregiudicar il liber votum. Sin formala invitaziun dalla vischnaunca cumparan ils cumissaris dalla regenza, dalla **Surselva** e dalla **Cadi** enamiez il pievel, buca senza grevadetgna che lur aulta missiun vegni oz buc a reussir. Il cumissari guvernativ, signur Latour pren il plaid. El fa attents il pievel sil legreivel resultat a **Mustér**, co il niev monsignur avat hagi leu cooperau cun el, tgei la harmonia denter spiritual e secular vegli dir, el vegni a far il pusseivel pil manteniment da quella e dalla claustra. El hagi cheu encunter era speronza che **Tujetsch** vegni oz tras siu conclus a consolidar quella biala harmonia. Il Cussegl Grond hagi fatg tut pusseivel per levgiar la vischnaunca da **Tujetsch** cun prender giu il manteniment. El alleghescha ils gronds avantatgs che la via sull'**Alpsu** porti e per ton pli tgunsch gudignar il pievel per quella idea lai igl oratur aunc leger avon il plaid da monsignur avat.

Tut nunspitgadamein e senza ch'enzatgi a **Mustér** e **Tujetsch** vessi saviu, arriva cheu monsignur avat, *Paul Birker (1861-1877)* el vitg da **Sedrun**. Ina honorifica deputaziun envida en el da prender part dalla deliberaziun. Sia cumparsa e siu discuors han fatg buna impressiun: „Jeu vewel questa damaun negin ruaus a **Mustér**,“ di el denter auter, „tochen che jeu sun buca seresolvius da vegnir tier Vus en Vossas bialas muntognas e da dir a Vus ch'ei setracti cheu d'ina impurtonta questiuon per quella vallada.“ El fa attents sin lur responsablidad visavi agl avegnir e di lu, ch'el vegli aunc dir in per plaids en romontsch, essend ch'ils biars capeschien buca siu lungatg. „Jeu prendel la libertad da vegnir tier Vus e supplicar Vus, da ariguard il generalbeinstar purtar ina unfrenda pella realisaziun dalla projectada via. Il tshiel benedeschi vus persuerter!“

Il plevon ed il conventual che veva accumpignau gl'avat, sustegnan ils palids da quel e sin quei plaidan ditg e bein signur cusseglier naziunal Toggenburg e bundsstalter Seeli. Els fan attents che las vischnauncas da sut hagian suttascret da surprender il manteniment e la expropriaziun sin lur territori mo cun la speronza, che ils cuolms vegnien aviarts. Il mument seigi ussa cheu ed ins spetgi che **Tujetsch** vegni buc a resister al general giavisch – **Tujetsch** che hagi quels onns tras sias bialas reperaziuns da vias mussau, ch'el sappi preziar tgei ch'ina buna comunicaziun vegli dir. Suentar ch'il signur president dalla **Cadi** ha aunc giu fatg attents sillas ligiontas cunvenziuns, vegnan ils officials dalla vischnaunca dumandai si per lur meinis. Gl'emprem genau, *Hans Giachen Beer, Gonda*, e secund genau, *Gion Andriu Berther, Camischolas (1805 - 1887)*, recamondan al pievel da prender si la via; il tierz, *stalter Duri Venzin, Rueras*, – gl'um dalla buorsa – vul saver nuot da

quella. Ils purs dueien mirar bein tgei ch’ei fetschien, las taglias seigien schon ussa grevas e vegnien tras la via nova a vegnir nunsuportablas, il sulegl, che seigi oz levas bials, pudessi ir giu stgirs. Quels plaids han dau anim alla opposiziun che sereghegliava pir che mai. Mo suenter quei fegl dat siu bab, *statalter Paul Wenzin*, **Rueras**, giu il meini – in respectau um da 68 onns – „Jeu sun pella via, mo buca tonta tema per quei deivet, ei va schon, mo curascha, curascha ed uniun!“ Quels plaids ein pli u meins vegni susteni dils suandonts votums, priu ora in ex-gerau, che ha bugen ses meinis aparti. Suenter ditg haver plidau vi e neu e segirau ch’ins vegni a far tut pusseivel per vegnir culla via giu el vitg da **Rueras**, vegn ei finalmein priu si il pli – circa duas tiarzas han votau pella via ed ina tiarza encunter. Deplorabel eis ei stau d’observar ch’ils mats che han il pli grond avantatg dalla via, eran fetg biars encunter e remarcabel ch’era las bia femnas, che van tschelluisa buca nuidis per las vias, eran cun peis e mauns encunter la via, gie ina feglia ha cun sia malaveglia declarau da buca dar tscheina al bab che veva plidau en favur dalla via. – Speranza che quellas antipatias vegnan tuttas a svanir cul temps.

Nova Gasetta Romontscha, nr. 49, ils 6 da december

1861

Sco ins auda ei la fiera da s. Andriu, *dils 30 da november*, a Ligiaun buc ida bein. Ei seigi stau fetg bia tiers, mo vegniu vendiu pauc, perquei han plirs stuiu vargar giu. Tuttina han dus stiarls da **Tujetsch**, ils pli bials ch’ein i sul **Lucmagn**, in favega 7 quartas e massa m. v. pagau 8 dublas in sur tuttas spesas.

Nova Gasetta Romontscha, nr. 49, ils 6 da december

1861

Clom da quens.

Cadi. Vigieli Josef Walier da **Tujetsch (Bugnei)** lai ir scussiu. Tut ses quens ein da dar en agl ugau da massa assistent Giachen Antoni Schmet da **Tujetsch**.

Nova Gasetta Romontscha, nr. 50, ils 14 da december

1861

Havend in marcadont da **Tujetsch** ed in da **Medel** instradau la jamna vargada ina roscha vaccas da maz per passar il **Lucmagn**, han ei dadens **Varghera**, il cuolm denter **Mustér** e **Medel** schau ir surengiu duas da quellas, ina ei stada ventschida cun inaga, l’altra han ins l’auter di stuiu far giu. Il miserabel pass denter **Mustér** e **Medel** ha schon laguttu bia unfrendas ed igl ei bien ch’igl onn 1864 ei gleiti neutier, nua ch’ei sto vegnir baghegiau ina viafier sul **Lucmagn** ni in stradun che vegn baghegiaus e mantenius sin quen cantunal. L’expropriaziun vegn cheu franc buc a dar tontas difficultads sco igl ei il cass tiel **Cuolm d’Ursera**.

Nova Gasetta Romontscha, nr. 51, ils 20 da december

1861

Las petiziuns da **Mustér** e **Tujetsch** pervia dalla direcziun dalla via ein surdadas al signur capoinschignier per schar dar in pareri.

Nova Gasetta Romontscha, nr. 52, ils 24 da december

1862

Culla vegnida dil tscheiver ha era gl’unviern vuliu dar in segn da veta. La cufla dils 6 da schaner ha interrut il regular cuors da posta ed era enviau bia cauras en nuegl, ch’eran digl atun naven manidas ora. En **Tujetsch** eran ils bufes schi stermentus ch’els han pudiu fierer entuorn femnas, per ventira purtavan ellas neginas crinolinas, tschelluisa havess ei pudiu dar tut pli grondas sventiras.

Nova Gasetta Romontscha, nr. 2, ils 6 da schaner

1862

Publicaziun

Ei vegn cheutras fatg da saver ad in ludeivel publicum ch’ei vegni ils 15 dil meins current mess egl

ingant a **Rueras** la casa, ils funs e baghetg, sco era igl entir mobiliar digl ustier Hans Giachen Berther. Tuts che han plascher d'in ni l'auter da quels effects, ein envidai en da cumparer sin quei di a **Rueras**.

Tujetsch, ils 4 da schaner 1862

La cumissiun pella liquidaziun da massa

Nova Gasetta Romontscha, nr. 2, ils 6 da schaner

1862

Tiers jasters a Tujetsch

1. In'ansola alva fess l'ureglia dretga ed in snez davon en.

2-5. Treis ansolas ed in buc culla sequenta nota: fess l'ureglia dretga e dus snezs davos en.

6. In'ansola nera, l'ureglia dretga tagliau giudsum e fess anenagiu, dapli en mintga ureglia in snez davos en entraviers.

7. Ina nuorsa nera buca tundida, ell'ureglia dretga orasum in denresgia ed in snez davos en, ed ella seniastra ina furcletta orasum l'ureglia. – Ils proprietaris da quels tiers, dueien s'adressar tier signur gerau Duri Venzin a **Rueras**.

Nova Gasetta Romontscha, nr. 2, ils 6 da schaner

1862

Tenor novas d'ina gasetta d'America, dil „Wahrheitsfreund“, ei ils 27 da schaner spartius el Segner igl aultreveri pader Lucas Cavegn, gesuit, el marcau **Buffalo** ell'**America**. Tuts catolics da quei grond marcau, cunzun la vischnaunca da s.Michael, fundatur dalla quala el ei staus, condoleschan zun fetg la sperdita da lur carezau pastur. El ruaussi en pasch. – Pader Lucas Cavegn ei naschius a **Tujetsch** igl onn 1806 ed igl onn 1830 intraus egl uorden dils Gesuits, nua ch'el ha operau gl'emprem el cantun **Sviz** e lura el cantun Valeis cun gronda premura ed era perquei zun carezau. Igl onn 1847 eis el vegnius tarmess ell'**America** sco miussiunari, ha operau leu cun premura quater onns en **Canada Su** ed igl auter temps eis el sin desideri digl uestg staus a **Buffalo** sco missiunari. Cheu ein duas bialas baselgias (s.Michael e s.Onna) permanents mussaments da siu premura apostolica.

Nova Gasetta Romontscha, nr. 11, ils 14 da mars

1862

Cadi

Tuts quens dil defunct sechelmeister Gion Antoni Wenzin da **Tujetsch** ein da dar en ad assistent Giachen Antoni Schmet da leu.

Nova Gasetta Romontscha, nr. 11, ils 14 da mars

1862

Ugadari ein ils quater affons da Hans Giachen Berther: Hans Giachen, Gion Antoni, M. Liberata e Barla Catrina ella persuna da Gion Antoni Schmet, tuts da **Tujetsch**.

Nova Gasetta Romontscha, nr. 16, ils 18 d'avrel

1862

Ils vischins da **Rueras** – la residenza dils vegls diplomats tuatschins – ein era malcuntents che la via mondi sul vitg ora. Sin lur istanza ha la vischnaunca da **Tujetsch** medemamein concludiu da far da quellas varts novs pass tier las autoritads. Ella ha semussau aber pli mala e pli carina ch'ils da **Mustér**; ella vul ch'ei vegni midau giu quella direcziun senza che la cumissiun vegni sin in'uatga e caschunassi considerabels cuosts alla vischnaunca. Ch'ei va vess da vegnir ora culla buorsa per da quels fatgs, ei da capir, denton manegein nus, ch'ils Tuatschins vegnien ad envidar en tier els la cumissiun dil stan, inaga ch'ella ei tochen **Mustér**, per schar ver quels signurs lur stupenta vallada e schigliar lur gustus magnuc caura e lur famus mèl alpin. Ne betg? Gie, lu pon las bialas da **Rueras** sefar si e clamar tier a quels signurs sisum il vitg: „Vegnien giu tscho, tscho ei nairas!“ Nus agurein bien success e ventira als da **Rueras**, mo ei para bunamein sco sch'ei smanatschass in castitg ad

els, perquei ch'els han vertiu da schar metter maun vid il venerabel monument da lur renomau convischin, dil fundatur dalla Ligia Grischa, Pieder de Putnengia, e schau menar si nuegls e clavaus cul material da quella respectabla antiquitad.

Nova Gasetta Romontscha, nr. 17, ils 25 d'avrel

1862

... Ils da **Rueras** eran vegni cuntentai tras ina nova lingia e levan perquei schar quels signurs mo als da **Mustér**.

Nova Gasetta Romontscha, nr. 19, ils 9 da matg

1862

Gliendisdis eis ei succediu a **Selva** in trest cass. In mat carschiu ch'ei avon entgins onns vegnius menaus anavos ord la **Germania** sco in stuorn, e semussava era a casa beinduras sco tal, schegie ch'el saveva leu luvrar dis ora sco in um da giudezi, ha mazzau siu agen frar – in affon en tgina, ch'el veva tschelluisa il pli bugen da tuts ils auters fargliuns. Suentar haver fatg ora lenna, fa el dar la mumma ina cut per mular la sigir, lu va el en stiva, nua ch'ei era negin perpeis, priu ora in affon en tgina che durmeva. Cun siu uaffen mulau dat el a quel in tribel tagl tral culiez, che quel sto esser morts agradgiu. Il stuorn tuorna lu ora tiella mumma cun ina fatscha pleina suadetsch e di ad ella, ch'ella dueigi i en stiva e mirar co il pop mieri. La mumma va dabot ed ins po cumprender cun tgei dolorus sentiment ch'ella anfla siu carin affon en ina sanganada. Sin siu grir e bargir dat ei neutier glied, il stuorn vegn ligiaus e serraus en. El lai far quei senza sedustar e silla damonda, pertgei ch'el hagi commess quei terribel mazzament, rispunda el cun saung freid: „Sinaquei ch'il car frar vegni enta parvis e daventi buc in schliet prè, sco quei che jeu sun.“ Dus umens ein silsuentar vegni cun el a **Mustér** en casa cumin. Schigleiti sco el vesa leu il schendarm di el a quel: „Jeu vess cheu dus umens da schar metter en perschun.“ – Quei deplorabel schabetg ei in serius avis, ch'ins dueigi haver precauziun cun glied stuorna. *Cudisch da morts sut il datum dils 5 da matg 1862: Vigeli Venzin, 1 onn, da statalter Giachen Fidel Venzin e Maria Monica Condrau; remarca: necatus a fratre suo fatuo.*

Nova Gasetta Romontscha, nr. 19, ils 9 da matg 1862

1862

Alp da cavals

La vischnaunca da Tujetsch pren si la stad 5 cavals jasters sin pastira u alp da cavals. Pella jarva vegn ei pagau 20 frs. per cavagl e lu aunc ina indemnizaziun pil pustretsch ed auter. Tgi che vul tarmetter cheu cavals, duei schar saver sigl emprem da zercladur.

La suprastonza da Tujetsch

Nova Gasetta Romontscha, nr. 21, ils 25 da matg

1862

Via principala

Finalmein ei la via sul **Cuolm d'Ursera** scretta ora cun quella sulla **Bernina**. Quei che vegn baghegiu uonn, ei partiu en duas secziuns, l'emprema dil vitg **Mustér** tochen sils cunfins da quella vischnaunca, ina lunghezia da 6400 meters ni 21'333 peis svizzers. La secunda secziun va dils cunfins da **Tujetsch** tochen en **S. Brida**, dador **Selva**, 6500 meters, ni 21'800 peis. Tochen ils 10 da zercladur ston quels, ch'han tschaffen da sorprender da baghegiar quella via dar en lur offertas al signur capoinschigner Salis.

Nova Gasetta Romontscha nr. 22, 29 da matg 1862

1862

La fiera da Tujetsch

vegn tenida gievgia, ils 12 da zercladur a **Sedrun**

La suprastonza

Nova Gasetta Romontscha nr. 23, ils 7 da zercladur

1862

La malsogna bestiala dils peis e dalla bucca ei ussa era rutta ora a **Selva** e perquei ha **Uri** serrau encunter **Tujetsch**, il qual ei in grond donn per l'entira **Cadi** e fa ir en nuot la fiera da **Tujetsch**, nua ch'ei vegneva tschelluisa cumprau si bia tiers dils Tudestgs. ... Cun ina part vegn ei meglier en 4 – 5 dis, cun auters pér en 8 – 10 dis. Las vaccas dattan pauc e schliet latg. Denton eis ei tuttina meglier che la malsogna grasseschi ussa e buca per d'atun.

Nova Gasetta Romontscha nr. 22, ils 13 da zercladur

1862

Via Alpsu

. . . l'emprema secziun dalla via sull'**Alpsu**, naven da **Mustér** tochen tiels cunfins da **Tujetsch**, baghegia Leon. Frik da **Cazas** e Giovanni Pattista Ghilmetti dalla **Lombardia**, la secunda secziun, che va tochen **S. Brida** han ils frars Berther da **Tujetsch** e comp. da baghegiar. Gl'uost 1863 dueien quellas duas secziuns esser finidas. Las lavurs vegnan ad entscheiver aunc quest meins; per direger e survegilar quellas ei signur inschigner Depuoz destinaus.

Nova Gasetta Romontscha nr. 25, 18 da zercladur 1862

1862

La zoppina serasa ora pli e pli ella **Cadi** e grassescha ussa ell'entira **Sursassiala**, **Mustér**, **Tujetsch** e **Medel**. Il mender eis ei per las alps, nua ch'ei deva uonn fetg bia latg.

Nova Gasetta Romontscha nr. 26, ils 27 da zercladur

1862

Via Alpsu

Vid la via nova sull'**Alpsu** ein ussa circa 300 luvriers occupai, bunamein tut Talians. Schigleiti sco quels han udiu da quell'interpresa, ein els dai neutier sin tuts mauns; ins ves'aschia ch'ei manca nuota luvriers, mo donn ch'ils Romontschs fan pintga concorrenza ed ein ella cuntentientscha cullas tschaveras ed ella perseveronza da luvrar fetg anavos als Tessines e Lombards. Fertion che la via en **Surselva** vegneva ils davos onns baghegiada digl'interprennder cun perdès e buca tras sutaccordants, han ils impressaris dalla via sull'**Alpsu** dau vi quasi tuttas lavurs en accords. Denter ils sutaccordants eis ei mo ina cumpignia romontscha.

Nova Gasetta Romontscha nr. 28, 10 da fenadur 1862

1862

Ferton ch'ins ha a **Mustér**, **Tujetsch** e **Medel** teniu ils tiers malsauns mo schuber e cauld ed applicau pauc ni neginas medischinas per quella malsogna, ha **Sumvitg**, aschigleiti che la zoppina ei leu passada si, spert telegrafau pil miedi da biestga a **Glion**. Vedremo la differenza digl'effect.

Nova Gasetta Romontscha nr. 29, ils 18 da fenadur

1862

Cul mèl alpin, che vegn tschercaus pli e pli fetg, stat ei uonn mal; sez las principalas cuntradas da quei dultsch product, **Tujetsch** e **Medel**, nua che latg e mèl flessegian tschelluisa en abundonza, survegnan uonn zun pauc mèl. La schliat'aura dil zercladur e las purginas dil fenadur han ruinau la biala speranza ch'ins veva aunc il davos dil matg sils aviuls.

Nova Gasetta Romontscha nr. 34, ils 23 d'uost

1862

(Tarmess en.) Las lavurs vid la via nova a **Tujetsch** van spert vinavon ed ein schon avanzadas aschi lunsch, che nus purs pudein era enconuscher tgei figura, che quella nova signura vegni a far. Enstagl aber che quella biala dama fetschi sin nus purs ina emperneivla sensaziun, (*Tedlei tscho. Remarca dalla redacziun.*) sch'eis ella per nus in trest mussament, co nus essan puspei vegni menai miserablamein davos la cazzola. (*Betga la verdad!*) Patertgein nus anavos sur da nossa vischnaunca

fatga quest atun davart il sorprender l'expropriaziun vid questa via, sch'ei ei vegniu figurau e perdegau, ch'ils praus che mondien vid questa via, sco era las lennas, cuostien pressapauc 15 tochen 20 melli francs, dapli eis ei vegniu segirau als purs, ch'ella mondi ton sco pusseivel per la via vedra ed era atras ils vitgs e cheutras era spargnau bia praus ed auters cuosts dalla vischnaunca. Entras quei ed aunc bia auter figurem havein nus tras il pli dalla vischnaunca surpriu sin nossas costas l'expropriaziun e dar la lenna e crappa leutier. -

Aber co va ei ora ussa? Ei vegn fatg ina via bunamein 8 quartas (*lu han ils da Tujetsch buca aschi liunga detta sco ils Svizzers*) pli lada che quella naven da **Mustér** engiu, ella va per esser biala atras ils megliers funs (*cheu dat ei gie da menar la pli biala grascha ed il pli bia fretg*), enstagl mirs vegn ei fatg scarpas sco las pli grondas crinolinas (*quei ei ussa halt la moda, la scarpa ei mai aschi scuada sco ils mirs e sa aschia survir per moda-schurnal allas finas mattauns da Tujetsch*), tras il qual ei vegn priu ina tiarza, sche buc aunc dapli terren. Cuort, scadin vesa, scadin sto palpar, ch'ei vegni zuar fatg ina biala, mo era ina via da luschezia e cheutras mirau memia pauc sin donn dalla vischnaunca. Eis ei aber stau dueivel da dir a nus: Ei vegn aschia, ei va aschia ed ussa tut autruisa. (*Era la via buca schon stigiada, che tut veseva nua ella massi?*). Nua eis ei pusseivel ad ina paupra vischnaunca da pagar in deivet da 30 entochen 40 melli francs (*ils Tuatschins teman buc ils deivets, ed han en sac pli bia marengins, che quei ch'auters han centims*), sco quei che la via vegn a custar, sche buc aunc dapli. Entras questas gestas lamentaschuns lessen nus mo refrestgentar empau la memoria als nos babs dalla patria (*gliez fa nuet*) e cun quei aunc enzatgei dapli, essend che lur ureglias han udiu e lur lieunga ha plidau. Denton vegn ei matei ad ir cun nus paupers purs sco cun tut quels, che ein enzacuras stai ella falla – els han stuiu mirar co mitschar ord quella ed aschia era nus – leu gida nuota pli schemer e plirar, aunc bia meins smuldir e zachergiar (*Bravo!*), ei muossa a nus, bugen ni nuidis, da patertgar co saver pagar e sur da quella dira nuschi lessel era schar sentir mes sentiments mes cars vischins e purs e quei ina outra gada. (*Gliez ben!, gliez plai a nus meglier*) In sempel pur da **Tujetsch**

Nova Gasetta Romontscha nr. 37, ils 12 da settember

1862

(Tarmess en.) Per far si deivets dat ei a nus purs buca grond studi, vein era per ordinari en nies tenercasa pign quita da sepertgitar da quels, pertgei che nossas femnas han da tuttas sorts basegns, inaga in bi scussal merino, l'outra gada in bi fazalet, lura pézs da seida sin ina schlappa e suren in mantel alla moda pendius vid franzlas, la bucca, sinaquei ch'ella schiri buc, sto ver in bien caffè, ed il nas bein pervesius cun ina presa tubac holender etc. etc. Era nus purs havein sco nossas femnas nossas cusseidas e nos gronds basegns senza basegns per era vuler far sco ils auters e cun quei crescha nies cudisch da quen, sche nus havein in, aber buca silla posta dil dabien, sunder dil daschliet. Cheu dat ei lura a nus pli grond studi, cheu panzein nus ed entschavein a selamentar sur da discletgs, sur da schliats onns e carischias, pertgei che nus teme in s. Martin cun siu scalin, nus stuein lu patertgar bugen ni nuidis vid il co pagar, pertgei ch'ils cumpars deivets van buc ord stiva mo cun lamentaschuns, sunder vulan marengins. Aschia stuein nus era far cun nossa signura spusa, la via nova. Nus havein cun ella teniu casa senza quita ed ussa splunta ella en nossas costas cun 30 – 40 000 frs., co lein nus cuntentar ella?

Vus, mes cars vischins e purs, vegnesses, sche jeu savess a vus mussar ina **California en Tujetsch**, nua ch'ei fuss buca mo d'anflar sablun dad aur, mobein bials sitgets marengins, mo quei, quei per donn sai jeu buca far, ni per vus ni per mei ed aschia tucca ei d'encurir ensemen las miulas d'aur sternidas ora per nies **Tujetsch** entuorn. Gie per grazia da Diu savein nus dir, che nus havessen aunc enqual graun d'aur, sche nus mo vegnessen perina d'encurir ensemen quels. Havessen nus il spert da nos buns vegls, sche anflassen nus era; pertgei che cura che quels havevan da basegns da daners per basegns generals, sco per exempel cura ch'ei han cumprau ora la dieschma dalla claustra, sche han els giu priu ord ils interess generals, e zuar senza allienar quels. Els han aschia

pagau il deivet ed aunc schau artar nus ils beins generals. Lein pia era setener vid quella regla dils vegls, ed encurir da pagar il deivet dalla via primarmein culs beins generals.

Fuss ei buca pusseivel, gie buca mo dueivel, mobein aunc gest, da metter sin tuts s.v. tiers che pasculeschan en nossa vischnaunca ina taxa a proporziun da qualidad da tiers. Cheutras pagassen tuts tuttina, reh e pauper il medem; il reh che ha tiers pagass e gudess pastiras ed alps, il pauper pagass pauc e schass guder sia purziun da gudiment, ch'el havess vid pastiras ed alps. Causa fetg gesta, sch'ins considerescha che alps e pastiras ein beins communal. Vegness ei pia mess si inton per scadin cavagl, che pasculescha en nossa vischnaunca, per scadina vacca, genetscha, stiarls e vadials, sco era cauras, nuorsas e tierscasa, mintgamai suenter proporziun, sche dess quei in bi capital sigl atun da trer en. Era duess ei vegnir fixau in cert temps cu schar ora ils tiers d'armal la primavera, sco per exempel ils 10 da matg; quel denton, che schass ora avon stuess era pagar in ton per tgau.

Lura sevensen nus era trer in bi avantatg ord nos feins a pastg, nua ch'il **Cuolm Bass** duess vegnir partius giu en sorts suenter fiugs e dau da guder 5 – 6 onns, pagond ina annuala taxa. Era quei fuss buca mo gest, mobein era in remiedi encunter bia malveglias, scuidonzas e dispetas. Il **Cuolm Ault** duess denton vegnir gudius sco tochen ussa. Finalmein duessen nus mintga onn metter en aucziun 50 – 60 lenns bein madirai ora ad onn, per ils quals ei vegness senza dubi fatg bials pagamenti. Ord quell'fontaunas secrei vies beinmanegiont convischin e pur da trer ora buca mo igl annual tscheins dil deivet dalla via, mobein era aunc in surpli entras il qual ins savess annualmein pagar giu in ton dil capital sez.

Alla fin stuein nus aunc far attents sin nies bien crap scalegl si **Calmut**. Quel ei datier dalla via nova e savess plaunsiu dar ina biala resursa alla vischnaunca. Considererei inaga l'enorma massa crappa che **Mustér** meina ora mintga onn ed il danerun ch'ei tilan en leu. Nus secartein che **Calmut** savessi plaunsiu dar ina pintga **California** per **Tujetsch** e gidar a finir a pagar giu il deivet dalla via nova.

Mettend pia quei en tutta carezia e buna veglia avon a vus, mes cars vischins, per schar reflectar, lessel aunc dar in cussegl duront che vus veis da sedecider da numnadamein sclauder ord vies miez dus fetg schliats vischins, ils quals ein la caschun da bia caneras, dispetas e malveglias e quels dus vischins fussen la *scuidonza* e la *engurdientscha*. Ein quels dus schliats vischins bandischai ord vies miez, sche vegn ei a reger denter nus pasch, carezia e bien spert per il beinstar communabel! Prendei en pasch per quell'aga, in'austraga enzatgei per nossas caffetieras.

In sempel pur.

Nova Gasetta Romontscha nr. 39, ils 26 da settember

1862

Remarca dalla redacziun. Nus essan quels dis vegni honorai cun ina brev d'in Tuatschin che ha buca astgau sutscrivere siu num e che manegia ch'il vegl proverbial „donn e gomias van ensemen“ severificheschi cumpleinamein ord il nummer 37 dalla Nova Gasetta Romontscha. Mo co astga **Tujetsch** plidar sul donn caschunus dalla via nova, sch'ins patratga vid ils gronds avantatgs che quella porta alla vallada. Sch'ins enconuschesch buca la pussonza e tschoccadad dils pregiudecis, sche pudessen ins crer, ch'ei seigi nunpusseivel, ch'in sulet Tuatschin astgassi aunc selamentar, cura ch'ins di ad el: Nus fagein a vus ina oreifra via tras vossa biala mo isolada vallada, mettein vus d'ina vart en buna comunicaziun cun **Mustér**, respectiv cugl entir cantun e da l'otra vart cun vos buns vischins digl **Uri**, culs quals vus veis in onn ora in grond traffic, aunc dapli, nus lein sez mantener quella via e cheutras aunc dar fadigia a vossa glied, vus stueis far nuot auter che dar neu gratis il necessari sulom. Ei quei buc in'offerta, che meritass da bitschar il maun enstagl da grir e smuldir sur quels che han cussegliau a vus d'acceptar quei grondius schenghetg. Sch'ei ventscher ora la via nova e cura che vus veis empruau ella inaga, lein nus lu dumandar vus: Schei inaga sinceramein, leis turnar a schar ir en il stradun, sche nus turnein a vus ils cuosts per vossa

expropriaziun? Ils da **Tujetsch** che han tuts 5 senns vegnan lu a dir: Mai e pli mai; il diember dils suords e tschocs vegn ad esser pigns. Per far ver la malraschuneivladad da tals pregiudecis lein nus aunc allegar ina anecdota. Nus vein dacuort entupau a **Medel** in marcadont tuatschin cun sia biestga da fiera, in dils capoadversaris dalla via nova. Vegnend vitier el, ei stau siu emprem salid, ch'el ha smuldiu sullas schliatas vias da **Medel**. Nus vein pudiu rir e detg: „En **Tujetsch** smuldis vus sulla buna via e cheu sullas schliatas vias.“ Mo nies bien um veva raschun da zachergiar sullas schliatas vias, pertgei cu la via nova, sull'Alpsu ei fatga, sche sa quei marcadont far dus cuolms en in di cun sia biestga, l'**Alpsu** ed il **Gottard**. Avunda per glieud raschuneivla; culs malraschuneivels e malcuntents ston ins haver pazienza, tochen ch'els san inaga palpar lur avantatgs.

Nova Gasetta Romontscha nr. 39, ils 26 da settember

1862

Notizias sul commers da biestga. Ils marcadonts dalla Cadi han aunc cumprau si dabia biestga e pagau biabein, per vadials entuorn 4 marenghins in e per mutgs 6 – 7 marenghins. Questa jamna ein ils marcadonts da **Sursassiala** i cun lur biestga sul **Lucmagn**, en tut circa 7 – 800 tgaus, la flur da quella formavan ils mutgs da **Tujetsch**, che han aunc buca giu la malsogna. La fiera da **Mustér** ei per denton vegnida refretga sigl october, nua che las serradas pervia dalla malsogna tschessan speranza e vegnan cullas bunas novas da **Ligiaun** a dar pli gronda impurtonza e vivacitad alla fiera da **Mustér**, che veva quels onns da muntar pauc, essend ch'ei era cheu negins marcadonts da fiera pli. ...

Nova Gasetta Romontscha nr. 39, ils 26 da settember

1862

Barschament d'in clavau a Sedrun

El vitg **Sedrun** eis ei ussen sonda barschau giu in clavau; gia eran ils tetgs da duas casas pigliai fiug, mo ils umens da leu ed ils numerus luvriers dalla via, ch'ei spert dai neutier, han pudiu far resistenza al serasar dil fiug ed aschia prevegnir ad ina terribla sventira. Per sanadeivla admoniziun da geniturs remarchein nus, ch'il fiug seigi ruts ora entras affons, che fagevan tremagls cun zulprins.

Nova Gasetta Romontscha nr. 40, ils 9 d'october 1862

1962

Questa jamna eis ei puspei vegniu fatg pass per far arver il **Cuolm d'Ursera** alla **Cadi** ed ins ha speranza che la serrada vegni a calar si aschigleiti sco las vischnaucas dalla **Cadi** han varghentau la curontina.

Nova Gasetta Romontscha nr. 41, ils 10 d'october

1862

Tiers jasters a Tujetsch

1. In barbaisch ner cun corna che ha ell'ureglia dretga tagliau giu da sum, ina furcletta davon en, ed in snez davos en.
2. In tschut gagl, ureglia dretga onsum ina furcletta ed in snez davos en.
3. Ina tgisich alva, ureglia dretga in mugrin davon en ed ella seniastra giu dasum e fess.

Ils proprietaris da quellas san en termin da 10 dis retrer ellas tier

Duri Wenzin, gerau

Nova Gasetta Romontscha nr. 41, ils 10 d'october

1862

... La malsogna dils peis e dalla bucca denter il s.h. muvel ha gia cugl uost giu sia fin ellas vischnaucas da **Medel**, **Tujetsch** e **Mustér**, essend che da quei temps naven han negins tiers pigliau la malsogna, quei ch'era aunc buca saun, era mo consequenzas dalla malsogna. Aschia han quellas vischnaucas finiu la curontina avon ils 20 da settember. ...

Nova Gasetta Romontscha nr. 43, ils 14 d'october

La via sull'Alpsu

ei schon uonn en sia construcziun savanzada buca mal. Vid las duas secziuns pridas a mauns en ina lunghezia da circa 13 000 m da **Mustér** tochen **S.Brida**, pon ins dir che varga la mesadad dalla lavur seigi fatga, cunzun sil territori da **Mustér**; entirs tocs via ein fini diltut. Tenor tuts aspects selai ei spitgar che sigl uost 1864 seigi la via ventschida sin nies territori, sco igl ei fixau dalla Confederaziun. In'otra damonda eisi denton, schebein **Uri**, che ha aunc ussa fatg nuot e ha tier quei da baghegiar la via da **Flüela** a **Brunnen** e sulla **Furca**, seigi sin lu era sin siu territori alla fin culla via sull'**Alpsu**, duess quei buca esser il cass, sche vegn il cantun **Grischun** bein ad haver regress tiella Confederaziun, per far pagar ella in ton tscheins pils daners applicai vid la via, entochen che **Uri** ha finiu siu toc via. Tschelluisa vess nies cantun in schliet engraziament per sia gronda premura e stenta el catschar vinavon las lavurs per vegnir suenter allas ordinaziuns dallas autoritads federalas.

Las lavurs vid la via ein ussa caladas si ed ils luvriers sbrigai. Il maximum dil diember dils luvriers ei stau circa 420, en quei 60 Romontschs. Ins ha danovamein saviu seperschuader, che senza agid dils Talians savessen nus mo cun nossa glied buca baghegiar vias. Buca pernuot sesanflan en nies cantun ina aschi gronda quantitat luvriers jasters, vid vias circa 1000, perdés (sitgurs) 100, fumegls e fumitgasas 700, brischacotgla 380, luvriers da lenna 360, pasturs 350, melli mistergners, insumma en tut circa 7000 luvriers jasters.

Nossa glied han halt buca la premura e perseveronza da fadigiar sco ils Talians; mo ils advos ein era buca aschi custeivels el viver e sevestgir. Sch'ins considerescha il sempel cuost da quels activs luvriers talians, cha magliavan la damaun in toc paun, da miezdi ina pulenta cun empau caschiel e la sera mo ina minestra, sche pon ins bein dir, ch'il magliar bia seigi in ton mo disa. –

Characteristic eis ei era ch'ins veseva duront la lavur mai a fimond tubac ils luvriers talians, bein aber ils romontschs. – Sch'ils umens romontschs han buca fatg stretg cun lur lavurs vid la via nova, sch'eis ei era buca da far curvien, che las femnas han nuota vuliu saver da quellas. Fertion ch'ins veseva vid la viafier roschada luvreras, han ins viu mo ina vid la via dall'**Alpsu**; mo quei era ina ton pli activa che luvrava stediamein ed en tutta aura per sustener ses vegls geniturs. – Malgrad il grond diember da luvriers ha ei dau neginas sventiras, priu ora in che ha fatg mal in egl cun sittar crappa.

Sche la primavera ei biala, sco ina part vulan cumprender ord il bi atun, sche vegnan ils interpretidiers gl'avrel puspei a schar entscheiver cullas lavurs per finir ellas il zercladur sil territori da **Mustér**. La principala lavur ei lu las 7 punts, il fundament dallas qualas ei per part schon mess. Nus vein giu relatau, ch'il departement militar a **Berna** hagi ordinau ch'ei duei vegnir construì cumahs da puorla tier quellas punts, per en cass da basegns siglentar ellas ell'aria ed impedir il pass agl inimitg. Mo silla inspecziun fatga quest october digl expert federal vegnan ins a desister da quels cumahs da puorla, essend che per siglentar quellas punts pudess gl'inimitg aunc adina maneivlamein passar las respectivas auas. Ils avdonts da quellas punts pon aschia durmir ton pli ruasseivlamein. Plidond digl expert federal, remarchein nus aunc posteriuramein, ch'el hagi schau plascher zun pauc, che la cumissiun dil stan hagi saviu concluder dad el vitg da **Mustér** ir naven mo cun ina casa e far ina aschi macorta stretga storta. Denton savess quei tut vegnir midau ed embelliu, sche quei signur expert procurass per in credit supplementar, ils quals ein tschelluisa fetg en moda tier nossas autoritads federalas. Daventa quei buc, sche stat ei tiel conclus dalla cumissiun dil stan, che ha custau alla vischnaunca 956 frs.

Tuts ils jasters ch'ei uonn passai sull'**Alpsu** han declarau, che quei pass vegni a vegnir frequentaus tut autruisa dils viandonts inaga che la via seigi finida. Mo ei vegn aunc a semussar auters avantatgs, cunzun per **Tujetsch**; en scadin cass san ins pretender, ch'ils funs, tras ils quals la via nova va, seigien schon ussa tenor las damondas dils proprietaris carschidas bia en valeta.

Artechel en nr. 45, ils 8 da november

1862

... Aschia ha la vischnaunca da **Tujetsch**, che sa preziar e schanegiar il meglier la lenna, pudiu trer anavos tiella presenta revisiun 15 000 frs. giud la summa stada dada en pils uauls. ...

Nova Gasetta Romontscha nr. 47, ils 21 da november

1862

Finalmein ha il cantun **Uri** tenor in telegram arrivau a **Mustér** aviert il **Cuolm d'Ursera**, mo ils pors tuatschins vevan schon anflau ina via egl **Uri** senza passar il **Cuolm d'Ursera**. Schon avon 15 dis era ei las tunas ch'ei vegnessi aviert e sin quei han marcadonts uranès e tuatschins giu cumprau si en **Tujetsch** circa 150 pors. Quels ein lu avon entgins dis marschai pella **Surselva** giu, han priu a **Cuera** la viafier tochen **Lucerna** e vegnan ussa ad haver passau il lag ed esser debarcai a **Flüela** e serendi ella capitala **Altdorf** per far giu pil nas alla regenza. L'avertura dall'**Alpsu** vegn denton ad alzar ils prezis dils tiers casa ella **Cadi**, sils quals ils Uranès spitgavan fetg vess.

Nova Gasetta Romontscha nr. 47, ils 21 da november

1862

Nuorsas jastras a Tujetsch

tier signur gerau Wenzin a **Rueras**:

1. In'alva, l'ureglia dretga giu dasum e fess.

2. A **Surrein** tier vieua Giossi: in'alva, ureglia dretga in snez davon enagiu ed in davos en, in mugrin e fess la seniastra;

ein da retrer enteifer 15 dis, bonificond las spesas.

Nova Gasetta Romontscha nr. 47, ils 21 da november

1862

La stad s. Martin para da seprolunghir. Priu ora ils selvadis **Tujetsch** e **Medel** eis ei en **Surselva** tochen si encunter la regiun alpina bi schetg terren ...

Nova Gasetta Romontscha nr. 49, ils 5 da december

1862

Posteriuramein remarchein nus aunc ch'ei seigi buca iu bein culla gronda roscha s.h. pors che seigi per far giu pil nas alla regenza d'**Uri**, che leva mai arver il **Cuolm d'Ursera**, ida dalla **Surselva** giu, priu a **Cuera** la viafier tochen **Lucerna** e da leu navigada vi egl **Uri**. Ad **Altdorf** – la veglia residenza da Gessler – ei l'entira roscha vegnida messa en perschun per 8 dis; ils perschuniers ein sin quei vegni vendi cun ina gronda sperdita; ils cumpraders han lu dau buns plaids als signurs d'**Altdorf** e quels han suenter 3 dis dau amnestia als s.h. tierscasa. – Cun in'otra roscha da quels tschins instradada egl **Uri** sul **Cuolm d'Ursera**, che ha suenter gronds strapazs piars 10 tgaus sil cuolm, eis ei era vegniu fatg pign profit, ed aschia eis ei da capir ch'il traffic da pors ruaussa empau ella **Cadi**. Mo ton pli tschercai ein ils vadials giuvens; pils mas-chels grad naschi vegn ei pagau 30 frs.

Nova Gasetta Romontscha nr. 50, ils 11 da december

1863

Cloms da quens

Cadi. Ugadai ein: 1) Sep Antoni Giacumet da **Surrein/Tujetsch**, ugau gerau Duri Venzin. 2) Gion Bistgeun Giriet, ugau signur Gion Antoni Monn dalla Turtè, tuts da **Tujetsch**.

Nova Gasetta Romontscha nr. 1, 1. da schaner

1863

... Era denter il s.h. muvel para ei da buca reger la dretga sanadad, ella **Cadi** ventscha bia vadials giuvens, mo il vitg da **Camischolas** ha piars uonn circa 15 da quels.

Nova Gasetta Romontscha nr. 2, 10. da schaner

1863

Nuorsas piarsas a Tujetsch

1) In tschanc ner entir cun corns, ureglia dretga ina furcletta davon en, ina ruosna davos en. 2) Ina tggisch alva, ureglia dretga in snez davos en ed in davon en. 3) In anugl ner entir cun corns, in mugrin davon en ed in davos en ell'ureglia dretga e dus snezs davos en ella seniastra. 4) Ina tggisch alva cun corns, tigliau giu dasum ed ina ruosna ella dretga; ella seniastra in snez da mintgamaun entraviers enagiu.

Ils proprietaris dueien en termin da 15 dis s'adressar tier

Gion Andriu Berther, genau

Tujetsch, ils 8 da schaner 1863

Nova Gasetta Romontscha nr. 2, 10. da schaner

Selva

Era a **Selva** eis ei vegniu giu la lavina ed ha priu dus clavaus; en in, nua ch'ei era en animals, ha ella per ventira mo splanau surora il clavau e schanegiau il nuegl. Essend serrau giu tutta communicaziun han ils da **Selva** stuiu salvar si plirs dis ina bara en baselgia.

Nova Gasetta Romontscha nr. 3, 17 da schaner 1863

1863

Tiers jasters a Tujetsch

1) Ina ansola grischa, ureglia dretga ina ruosna, ella seniastra in snez davos en.

2) In anugl ner chistrau, fess l'ureglia seniastra e dus snezs davos en.

3) Ina caura alva, ureglia dretga tagliau giudasum ed in snez davon en; sinistra in snez davon en entraviers enagiu ed in davos en.

4) Ina ansola cun scalin, ureglia dretga giudasum ed ina ruosna, ella seniastra era ina ruosna.

5) In buc entir alv, ureglia seniastra in tarden osum ed in snez davon en.

6) In anugl ner chistrau, ureglia dretga giudasum e dus snezs davos en, ella seniastra in snez davon en.

7) In anugl, ureglia dretga giudasum e fess ed ina furcletta davos en.

Nua ceh quels tires sesanflan en nossa vischnaunca dat il suttascret sclariment ed ils proprietaris dils sura tiers duein en termin da 15 dis far da saver al suttascret.

Tujetsch, ils 11 da schaner 1863

Pella vischnaunca da Tujetsch

Duri Venzin, genau

Nova Gasetta Romontscha nr. 3, 17 da schaner

1863

En **Tujetsch** era ei gievgia 4 baras e plirs malmalsauns. *Numnadamein: Onna Maria Scolastica Monn, Surrein, 77 onns; Cresenzia Riedi, Selva, 39 onns; Barclamiu Gieronimo, Selva, 1 onn; Onna Maria Peder, Selva, 1 onn.*

Nova Gasetta Romontscha nr. 5, 31 da schaner

1863

Remarcablada

Sco remarcablada ed emprova dalla veta dallas nuorsas, relatein nus ch'ei seigi miez fevrer vegniu anflau ell'alp **Curnera** a **Tujetsch** quater nuorsas. Malgrad la gronda nevada e las cufflas, ch'ellas han stuiu star ora quest unviern sesanflan ellas en bien stan, e muort la liunga launa semeglian ellas gest quater uors pigns, vegn ei scret a nus.

Nova Gasetta Romontscha nr. 9 ils 28 da fevrer 1863

1863

Nuorsas jastras a Tujetsch

Quest meins ei vegniu anflau en in'alp quater nuorsas cun sequenta noda:

- 1) Ina nuorsa cun bransina, ureglia dretga ina ruosna ed in snez davon en, ella seniastra in snez davos en.
- 2) La secunda ha fess l'reglia dretga e dus snezs davos en ed in fildirom. Entuorn la cua ha ella ina penda materia che ha si ina crusch ed in streh atras.
- 3) La tiarza ha ella dretga in fildirom ed in snez davon en. Entuorn la cua era ina penda materia cun ina crusch semplia.
- 4) La quarta ha in fildirom ell'ureglia dretga, la seniastra ha ella fess.

Il proprietaris dallas sura nuorsas dueien sil pli tard entochen ils 15 da mars far da saver a Duri Venzin, genau

Nova Gasetta Romontscha nr. 9, 28 da schaner

1863

Il fondos da scola ella Surselva catolica

Vischnaunca da Tujetsch cun 3 scolas

1847 ha la vischnaunca fundau tras arvers ellas alps e fein a pastg

3400 frs.

Premi cantunal pella sura fundaziun

680 frs.

Priu cun lubientscha episcopala ord la facultad

dallas capluttas, capitals, ceh vegnan aunc

admsitrai dils respectivs ugaus da quels

6596 frs.

Premi cantzunal per 3 casas da scola, a **Sedrun,**

Rueras e Cavorgia

425 frs.

(Camischolas ha ussa era sia atgna casa

da scola ed a **Selva** vegn uonn medemamein

baghegiau ina.)

La caplania da **Sedrun** paga annua alla scola 51 frs

che representa in capital da

1020 frs.

En bonis dalla scola ha il ludeivel obercheit resignau

Sin ina annuala usitada gasteria tiel

Signur plevon, persunter paga quel annuala alla

Scola 11. 90 frs. che representa in capital da

238 frs.

1863, schaner, purtava aschia l'entira facultad

12 279 frs.

Ultra da quei fondo general ha il vischninadi da **Camischolas**

E **Zarcuns** mess ina entschatta tier in fondo per lur atgna

scola tras ina voluntaria collecta, che ha purtau en 393.63 frs.

Nova Gasetta Romontscha nr. 11, 12 da mars

1863

In memorial pella Cadi ord l'uiara dils Franzos

Tras in buntadeivel maun ei a nus vegniu communicau ord igl archiv da **Tujetsch** sequenta scartira:

Cuorta memoria tgei nies ludeivel cumin dalla **Cadi** hagi pitu entras la uaira ed entras las potenzas,

ton Keisers, Russers e Farnzos igl onn 1799, ton cun engular, barschar ed auters donns generals da

tuttas sorts etc., sco era tut il furniu, il qual suonda primarmein specificadamein en nummer e

sunter fatg en pagament, tut en sia valur e buc alterau il prezi.

Furniu

1'160	centners fein	flurins e kr.	2'320.04
258	vaccas		23'220.00
66	tgaus tiers manedels		396.00
139'323	quatiers		6956.05
15'000	pauns		3'000.00

660	crenas pischada	330.00
13'023	crenas caschiel	2'472.48
940	crenas carn	470.04
5'326	stèra truffels	5'681.00
142	stèra graun	568.00
	vin e vinars	623.00
	autras expensas ch'il cumin ha giu per speias, landsturm, Kriegsraith, express etc.	17'000.00
	Porta flurins e krizzers	63'037.01

Suonda igl engulau

184	vaccas	flurins e krizzers	16'560.00
2'297	Tgaus tiers manedels		13'782.00
15'000	pauns		3'000.00
80'400	Crenas pischada		40'050.00
20'000	Crenas chischiel		1'333.20
28'000	Crenas carn		14'000.00
12'000	Stèra truffels		12'080.00
10'000	Centners fein		25'000.00
12'068	Stèra graun		18'272.00
	Mobilias per		10'800.00
	Barschau per		668,243.00
	Donns generals		6'000.00
	Per munizium als Franzos		5'780.00
	Purtau sur quolm 12'000 buordis		8'000.00
	Manau fuor 5'000 vaultas		5'000.00
	Daner blut cumpigliau vin e vinars		3'000.00
	Dau contribuziun als Franzos		23'000.00
	32 cavals per		6'000.00
	Summa totala		962'936.11

Tujetsch, ils 14 da fevrer 1800

Da mei Ulrich Battesta Monn, mp. p. gerau

Nova Gasetta Romontscha nr. 12, 19 da mars

1863

A **Tujetsch** ei miert tschella jamna in um da 91 onn. *Statalater Gion Andriu Berther, Camischolas, fegl da statalter Andreas Berther e Margarita Caschalk.*

Nova Gasetta Romontscha nr. 13, 27 da mars

1863

A **Medel e Tujetsch** ei aunc 6 quartas neiv els plauns, a **Mustér** 3 ed els cuolms 12 quartas, aschia ch'ei vegn uonn buca d'ir baul a cuolm, schegie ch'ei semuossa els bia loghens scartezia da fein.

Nova Gasetta Romontscha nr. 13, 27 da mars

1863

Avis

Il suttascrèt ha giu empermess da clamar en plirs loghens avon che turnar ell'**America**, mo stuend el da gleiti semetter sin viadi, fa el cheutras da saver a tuts enconuschents, che han da surdar brevs ni commissiuns per l'**America** da schar vegnir tier quellas sin Pastgas a **Tujetsch** a signur gerau Gion Andriu Berther, a **Mustér** all'ustria dalla Cruna, a **Sumvitg** a signur bannerherr Cajacob, a **Glion** all'ustria digl Oberalp ed a **Cuera** a bundsveibel Berther. Prendend comiau dalla **Surselva** offerescha cun quella caschun a tuts enconuschents siu cordial salid.

Tujetsch, 26 da mars 1863

J. Gieriet

Nova Gasetta Romontscha nr. 13, 27 da mars

1863

La via nova para schon ussa da promover la communicaziun ed il commers denter la gliued a **Tujetsch**. Ils firaus Pastgas eis ei vegniu clamau ora 5 pera nozzas en inaga – enzatgei mai sudiu en quella val, nau che latg e mèl flessegia en abundanza. En tut quellas sontgas allianzas ein vegnidas serradas giu cun bien giudezi, essend che tuttas 5 spusas dumbran intrasglauter 35 onns. Salit e liunga veta a quels ventireivels. *Ils 5 pèrs: Gion Antoni Beer e Maria Turtè Monn, **Camischolas**; Giachen Antoni Berther e Naria Barbara Catrina Beer, **Gonda**; Giachen Adalgott Monn e Rosina Monn, **Rueras**; Gion Giachen Caduff e Maria Barbara Monn, **Rueras**; Nicolaus Thomas Deflorin e Maria Dominica Monn, **Rueras**; tuts sur 30 onns!*

Nova Gasetta Romontscha nr. 15, 11 d'avrel

1863

Finalmein ha il ludeivel Cussegl Pign relaschau sia sentenza da castitg allas vischnauncas dalla **Cadi** che han quest atun tiella malsogna dalla bucca e dils peis buca observau sco s'auda gl'uorden sanitaric ... **Medel, Tujetsch** e **Schlans** ein mitschai senza castitg.

1863

Clom da quens

Cadi. Gerau Duri Venzin retscheiva ils quens dalla defuncta giuvna Maria Francestga Berther, omisdus da **Tujetsch**.

Nova Gasetta Romontscha nr. 16, 17 d'avrel

1863

Las lavurs vid la via dall'**Alpsu** han puspei entschiet en **Tujetsch**; a **Mustér** vegn ei per il matg dau sia entschatta.

Nova Gasetta Romontscha nr. 17, 24 d'avrel

1863

Paun zart

fatg alla moda talianera san ins da tut temps cumprar tier Felix Huonder a **Segnas (Mustér)** e tier Vigieli Mon a **Sedrun**.

Nova Gasetta Romontscha nr. 19, 8 da matg, nr. 21, 22 da matg

1863

Tresta nova!

A **Tujetsch, Zarcuns** ei puspei rut ora la malsogna dalla bucca e dils peis. En consqeuenza da quei ei la vischnaunca da **Tujetsch** serrada giu.

Nova Gasetta Romontscha nr. 21, 22 da matg

1863

La zoppina en **Tujetsch** para da buca serasar pli lunsch, aunc ussa eis ella rutta ora mo en in nuegl a **Zarcuns**, ch'ei serraus giu da tutta communicaziun cun auters tiers. **Uri** ha serrauf ferm encunter il **Grischun** e quei ei ina mala pella proxima fiera da **Trun** e da **Tujetsch**, nua ch'ils Tudestgs vegnevan neu e cumpravan si ina massa cauras e da bai vaccas.

Nova Gasetta Romontscha nr. 22, 29 da matg

1863

Alp da cavals

Cheutras vegn ei fatg da saver ch'ei vegni priu si ella alp da cavals a **Tujetsch** 10 cavals jasters per in arvè da 20 frs. Igl ei da remarcar che en quella alp seigi ei era in grond e bi cavagl mascial per cavallas, ch'ins vul schar curclar; per quei e pli pustretsch vegn ei lu da pagar circa 5 frs. Ina cavalla cun pulein paga mo per in cavagl. Ils 8 da zercladur vegnan ils cavals pri si. Ulteriur scalriment dat Giusep Antoni Mucli, gerau

Nova Gasetta Romontscha nr. 22, 29 da matg

1863

La zoppina en **Tujetsch** – ch'era gl'emprem rutta ora mo en in nuegl e sco ei vegn pretendiu cun dar als tiers flucs schai anavos onn dallas vaccas malsaunas serasa nunspitgadamein pli fetg. Els cuolms ni mises ein plirs muvels infectai ed essend che varga la mesadad dils armauls en **Tujetsch** han onn buca giu la malsogna, sche desiderassen ils Tuatschiners che tuts quels survegnessen ella ton pli spert.

Nova Gasetta Romontscha nr. 24, 12 da zercladur

1863

Stradun

La davosa secziun dalla via sulla **Alpsu**, da **S. Brida** tochen si tiels cunfins uranes ei surdada da baghegiar a signur Plattner da **Cuera**, che ha construiu la via da **Trun** tochen **Mustér**. Finalmein han era ils Uranès dau ina entschatta culla via da lur maun. (8100 meters liunga)

Nova Gasetta Romontscha nr. 25, 19 da zercladur

1863

La fiera da **Tujetsch** ch'ei muort la zoppina vegnida tenuta uonn a **Mustér**, eis ei vegniu catschau bia cauras, mo paucs e schliats armauls. Ils prezis vegnevan teni ault e perquei eis ei vegniu marcadau pauc, schegie ch'ei era dabia glied. Ils numerus cavals pri si uonn en **Surselva** dils Uarnès a tscheins, ein puspei vegni pagai ualti bein.

Nova Gasetta Romontscha nr. 25, 19 da zercladur

1863

Sventira a Rueras

En **Tujetsch** ei sonda vargada, ils 20 da zercladur, succediu ina sventira. In buobet da 9 onns, *Casper Giusep Antoni Muggli*, che mava cun duas vaccas sulla punt da **Rueras** vi, ha tras ina da quellas survegniu in stausch, ch'el ei daus giu ell'aua. Spert ein curri neutier glied, mo per sut **Sedrun** giu eis ei reussiu da trer igl affon miert ord il **Rein**. Ei era in affon d'admirabels dunns, sia spiritusa soretta dad endisch onns funcziunescha sco telegrafista a **Mustér** - dus orfans dil defunct secretari guvernativ Mucli.

Nova Gasetta Romontscha nr. 26, 26 da zercladur

1863

... Per unir las respectivas tendenzas dalla **Svizra Centrala** cun quellas dalla **Svizra Orientala**, manegia era el (La Nicca) ch'ei seschassi menar la viafier naven dil **Lag da Lucerna** tochen ad **Amsteg**, da leu tras la **Val Maderana** cun in tunnel dad ina ura e mesa sut il **Crizli** ella **Val Mila** tochen tiel venerabel casti **de Putnengia** sper **Rueras**, nua che la viafier da **Cuera** suness cun ella per comunablamein formar la viafier sul **Lucmagn**.

Nova Gasetta Romontscha nr. 27, 3 da fenadur

1863

Sillas reclamaziuns fatgas tiel cussegl federal pervia dil scamond da frequentar la fiera tessinesa a **Quint**, ha quella autoritad rispundiu, ch'il **Tessin** hagi giu raschun da serrar il pass, sch'ei seigi ver, che la zoppina grasseschi en **Tujetsch** sco la regenza grischuna detti senza tier.

Nova Gasetta Romontscha nr. 29, 17 da fenadur

1863

Annunzia da mort

En profunda dolor e tristezza notifichein nus cheutras al venerabel clerus sursilvan, a tuts parents ed amitgs, ch'ei hagi plaschiu agl Altissim da clamar ord questa veta speronza tier ina megliera nies car sur feagl e frar, igl

Aultreveriu signur Jos. Anton Durgiai
plevon a **Tujetsch**

Provedius cun tuts ss. sacraments dils moribunds eis el spartius oz allas 3 dalla damaun suentar ina malsogna da mo 10 dis en ina vegliadetgna da 51 onn. Nus recumandain sia olma alla pia memoria da tut ses parents, amitgs ed enconuschents

Sedrun, ils 30 da zercladur 1863

Lezi Anton Durgiai, bab

Era en num dallas feglias e dils schienders.

Nova Gasetta Romontscha nr. 31, 31 da fenadur

1863

La sepultura d'in plevon

Sedrun, 1. d'uost 1863.

Giud la aulta tuor cloman tut ils zenns tiella fossa, la baselgia porta malencurada, ed en santeri sesarva ina nova fossa, che para da clamar cun aulta vusch: "Patratga o carstgaun, che tiu tgierp e formaus ord tiara e vegn puspei a semidar en quella!" L'entira vischnaunca, ils datier e damaneivel, umens e femnas, giuvens e vegls ein en gronda passadetgna e tristezza serimnai en ed avon casa parochiala – ina numerusa famiglia spirituala, che plira giud la dolorosa sperdita da siu car bab e spiritual. Cheu compara sia bara purtada da 4 spirituals e 4 geraus ed ornada si cun flurs e ghirlandas. Quei trest aspect rumpa il cor als parochians, dapertut flessegian larmas, biars lamentan e bragian. Sut il melanconic, mo edificont cant d'in numerus clerus, vegn la bara purtada entuorn baselgia e tschentada sco unfrenda dalla mort avon gl'altar, leu nua ch'il pietus defunct veva sco secund mediatur denter Dieus ed ils fideivels purtau bia dis ed onns agl Altissim la pli aulta unfrenda ed a quel la pli plascheivla. Ei vegn intonau gl'uffeci da morts; las imposantas melodias dil Benedictus e Miserere muentan bia cors tier novas larmas.

En solemna tgeudad cumpara lu in jester predicatur silla scantschala orfanila. Igl ei buca pli il vegl pastur, che schava cheu resonar sia migeivla vusch per instruir, admonir ed edificar sias caras nuorsas; na igl ei igl aultreveriu decan dil venerabel Capetel Grond, che ha oz la tresta da surdar al stgir ravugl dalla tiara in dils pli stimai e premurai confrars. Cun eloquenza faviala sclarescha el si igl operar e l'impurtonza d'in bien plevon; el fa ver ora, ch'il defunct eri in amitg dils affons, pella giuventetgna in aunghel Rafael sin viadi cun Tobias, in tgamun pils maridai, in miedi pils malsauns e la consolaziun dils moribunds. El consolescha la deprimida pleiv, animescha da tener il defunct en buna memoria cun era dacheudenvi suandar sias sontgas ductrinas e siu bien exempel, ed agurescha ad ella ladinamein in vengonz successur ella piazza dil defunct. En suffragi per quel vegn ei silsunter celebrau il pli ault sacrifici – la sontga messa. La impressiun da quella vegn aunc engrondida tras il commuentond cant dil majestus Requeim e Dies ire dies illa. Finalmein vegn la bara purtada ord baselgia tiella fossa sut il sun dalla orgla ed il cant coral, che vegnan gl'emprem accumpignai mo beingleiti totalmein interruts dil plirar e bargir dall'entira pleiv. Nus vein cumpignau bia trestas baras, mo aunc mai ina da schi gronda e generala tristezza e condolenza, da schi profunda impressiun sco questa digl aultreveriu signur plevon Joseph Antoni Durgiai. Cheu han ins silla megliera moda saviu seperschuader tgei spiritual ch'el seigi staus e tgei ch'in vengonz plevon hagi da muntar.

Il defunct ei naschius a **Mustér** il fevver 1812 e tratgs si el ravugl d'ina pietusa famiglia ... Gl'onn 1846 vegn el numnaus plevon da **Tujetsch** sco successur digl erudit decan Hitz, ed anfla cheu ina nova e pli extensiva sfera d'operaziun. Muort sia edificonta pietad, sia exemplarica conduita, sia ludeivla premura per tuttas bunas caussas, muort siu real e sincer character, sia cordialitad e bien humor, era el generalmein stimaus e carezaus. Tut steva haver bugen el e perquei veva el negins inimitgs.

El era buca mo in premurau pastur dallas olmas, mobein era in amitg dil ver sclariment e progress. Perdetga da quei dat il considerabel fondo da scola e las treis casas da scola che ein vegnidas si sut siu presidi dil cussegl da scola. Stractond schebein ils vischins da **Tujetsch** veglien acceptar

l'offerida via sull'**Alpsu**, ha el sin publica vischnaunca recumandau da prender si ella e mess avon ils avantatgs, che quella porschi. L'expropriaziun dils funs dattan presentamein empau da far alla vischnaunca, mo nus essan perschadi, che en paucs onns vegnien leu tuts ad esser bein cuntents culla via nova. Il grondius rempar e la punt da **Sedrun** formeschan schon ussa ina ferma uestonza per la baselgia e santeri, vivon pereclitai dalla furia dil nausch **Drun**. El ha era sedau gronda breigia da liberar ils vischins da **Selva** orasut il prighel da lavina cun instradar lur translocaziun a **Novaselva** tras baghegiar si leu ina nova baselgia e casa da caplania. Pil pauperesser eis el principalmein sefatgs meriteivels cun gidar els tiella cultivaziun d'in toc pastira, vesend che la megliera almosna seigi da procurar ad els lavur e fadigia. Insumma tuttas bunas ideas che semanifestaven per ameglieraziun en fatgs communalas, anflavan tier el susteniment entras plaid e cussegl. El era dasperas in grond amatur da biala lectura e senuspeva buca giud sias considerablas annualas expensas per quella. In da ses principals divertiments era l'apicultura, el capeva quella e veva bien cletg, aschia ch'el ha schau anavos 50 schaumias aviuls. Il stupent mèl da ses aviuls ei tiell'exposiziun agricolana a Paris vegnius premiaus cun ina medaglia d'argen. Varga 17 onns ha il defunct operau cun tut laud sco plevon a **Tujetsch** ed acquistau la stema ed affecziun da tut ses parochians. ...

Nova Gasetta Romontscha nr. 32, 7 d'uost

1863

Dacuort ha la vischnaunca da **Tujetsch** vendiu ora entgina lenna a ses vischins, che han pagau persunter bials prezis, gie per in pèr lenns eis ei vegniu dau varga 40 frs. In. Cheu para ei ch'ins sappi stimar la lenna e trer ordlunder in grond profit pella vischnaunca, buca sco en bia auters loghens, nua ch'ei vegn ultra dallas sorts communalas aunc cuntinudamein dau ora lenna a privats per pauc ni mo per cagnas. Nus vein repetidamein fatg attents, che sch'ins vegli far spargnar lenna e cultivar ils declinonts uauls, sche seigi ei il meglier mettel da schar pagar biabein per tutta lenna che vegn dada ora a parti.

Nova Gasetta Romontscha nr. 32, 7 d'uost

1863

La malsogna animalica dalla bucca e dils peis ei ussa totalmein svanida en **Tujetsch**. **Medel** e **Mustér** han retratg lur custeivlas gardas. ... Essend ella **Cadi** abundonza da s.h. pors, sch'eis ei culla avertura dil pass vegniu catschau ina brava roscha da quels egl **Uri** nua ch'ei eran tschercai.

Nova Gasetta Romontscha nr. 33, 14 d'uost

1863

La vischnaunca da **Tujetsch** ha unitamein legiu ora per plevon igl aultreveriu signur canoni Darms, presentamein plevon a **Breil**.

Nova Gasetta Romontscha nr. 33, 14 d'uost

1863

Nunspitgadamein survegn il vitg **Sedrun** in grond renomé ellas afferas dalla viafier alpina. Nus vein schon menziunau che nies signur colonel La Nicca hagi encuretg d'unir ils interess dalla **Svizra Centrala** e **Svizra Orientala** tras ina viafier naven da **Lucerna** ad **Amsteg** e da leu tras il Crizli a **Sedrun** per s'unir a **Tujetsch** culla viafier dil **Lucmagn**. La gasetta da **S.Gagl** porta ussa in artechel titulaus "Ina vusch da reconciliaziun" tars il qual ella recamonda cauldamein la lingia **Lucerna-Sedrun**; quella sligi si il nuv gordonic el present viriveri dalla viafier alpina; per quella lingia duei tut scriver e plidar, mo quella sappi puspei unir las partidas dalla **Svizra**, aschia che nos cars babuns vegnessien aunc en fossa a selegrar lundergiu etc.

Nova Gasetta Romontscha nr. 34, 21 d'uost

1863

Novas collectas per Seewis

... da **Tujetsch** 80 frs. ...

Nova Gasetta Romontscha nr. 35, 28 d'uoost

1863

Cloms da quens

Per saver rugular giu en uorden ils quens dil defunct plevon Joseph Antoni Durgiai a **Sedrun**, dueien tuts crediturs e debiturs da quel dar en lur quens a bundstatalter A. Condrau a **Mustér**.

Nova Gasetta Romontscha nr. 35, 28 d'uoost

1863

Quels dis ei l'emprema secziun dalla via sull'**Alpsu**, numnadamein dil vitg **Mustér** tochen sils cunfins da **Tujetsch** e **Mustér** vegnida collaudada.

La construcziun dalla secunda secziun, ch'ei pli liunga e sestenda tochen **S.Brida**, va ussa era encunter la fin, mo ton pli plaun va ei culla davosa secziun, nua ch'igl impressari ha fatg plaunsiu da vegnir neutier cun bia luvriers ed ei pli tard vegnius impediud dalla schliata aura. Ils Uranès han catschau vinavon cun tutta forza, aschia ch'els fineschan uonn bunamein l'entira via sil cuolm e ch'il **Grischun** po in auter onn seduvrar da buca restar anavos ed els. – Cun quella caschun remarchein nus ch'igl inserat el Tagblatt hagi tschaffau si nies artechel sull' "estetica e matematica" lla storta dalla via tral vitg **Mustér** tut autruisa, che quei che nus vein giu maniau. Quel cuntegn neginas malignas reproschas visavi ad emploiai ni autoritads, nus vein mo detg che quella storta prendi ora mal – il qual tut vegn a stuer dar tier. La davosa remarca el respectiv inserat dil Tagblatt sa pia buca vegnir applicada sin nus. Era nossa metafra da schar ir il cavagl e tener il cavester ei vegnida tschaffada si autruisa. Nus vein mo vuliu dir, che cura ch'ins hagi buca temiu da decretar da bia mellis, dueien ins era buca senuspir da decretar enzacons tschiens; nus vein plidau e scret en favur da quella via e secartein ch'ella seigi profiteivla per **Mustér** e cunzun per **Tujetsch**. Nus supplicassen nies signur collega dil Tagblatt da prender notizia da quellus duas remarcas.

Nova Gasetta Romontscha nr. 38, 18 da settember

1863

Schegie che la fiera da **Ligiaun**, ei avon esch, sche fan nos marcadonts plaunsiu da cumprar si biestga. In pèr Uranès, che han schon la primavera giu cumprau si ina gronda roscha tiers, ein dacuort vegni sull'**Alpsu** e marcadau enzacons stiarls per bials prezis. Sch'ils marcadonts sedatan buc ora pli fetg, sche ston ins silmeins buca temer ina surcatschada e cheutras ina schliata fiera. Il magistrat da **Ligiaun** ha denton publicau ellas gasettas, ch'ei seigi semtgau leu tut tgei ch'ins sappi garegiar: oreifers pastgs, cumadeivlas stallas, bunas ustrias etc. e zaur tut per in fetg dueivel prezis. Sco ei vegn detg, lessan ils da **Ligiaun**, ch'ils marcadonts setenessen buca si aschi ditg a **Sebiastg Giubiasco** e sin via, mobein fagessen fiera a **Ligiaun** dils 4 – 15 d'october. Nos marcadonts han zuar gronda furtina da semetter sin viadi a **Ligiaun**, mo fan plaunsiu dad ir giu en quei marcau; la megliera fiera fan ei il bia a **Sebiastg**.

Nova Gasetta Romontscha nr. 38, 18 da settember

1863

... Ils marcadonts da **Tujetsch** e **Medel** che han ils davos dis aunc cumprau si empau stiarls, ein en tut aura passai il cuolm avon ch'ils **Glarunès** ...

Nova Gasetta Romontscha nr. 39, 25 da settember

1863

Silla stupenta aura dalla jamna vargada eis ei suandau in ton pli macorta questa jamna. Mardis veva l'entira **Surselva** tratg en il vestgiu d'unviern, a **Glion** era ei tonta neiv sco a **Mustér** ed a **Tschamut** buca pli biara che a **Mustér**, mo ad **Ursera** negina neiv, persunter ha ei cuflau leu

mesjamna suentermiezdi. En consequenza da quella neiv han tuttas alps stuiu vegnir descargadas ils 22 d.q.

Nova Gasetta Romontscha nr. 39, 25 da settember

1863

Sillas fieras sursilvanas ... Ils Tuatschiners domiciliai en **Baviera** han puspei cumprau si circa 150 vaccas; e zuar il bia armauls da quella colur, stampa e vegliadetgna, che tilan pauc tiels auters marcadonts. Schia ch'els ein in grond gudogn pella **Surselva**. ...

Nova Gasetta Romontscha nr. 43, 23 d'october

1863

Cloms da quen

Cadi. Tumaisch Huonder ei curatur pigl absent Placi Monn, omisdus da **Tujetsch**.

Nova Gasetta Romontscha nr. 44, 30 d'october

1863

Ferton che la vischnaunca da **Tujetsch** ha tochen sin duas vuschs unanimamein refusau il pugn da recapitulaziun pervia da dismetter la pasculaziun cumina, ha **Sursaissa** tudestga acceptau quel, aber mo encunter ina ferma minoritad.

Nova Gasetta Romontscha nr. 45, 8 da november

1863

... Il medem cass ei avon enzacons onns schabegiaus cun in marcadont da **Tujetsch** damaneivel da **Ligiaun**, che tschapitschava era buca mal per sia tschenta; per cletg era in auter Tuatschin ius en secret beingleiti suenter el ed anflau ses daners.

Nova Gasetta Romontscha nr. 46, 14 da november

1863

S. Martin han ils da **Tujetsch** cun crusch e cafanun benediu en la nova via en optima fuorma. Cun quei ch'els han giu da visitar neginas capluttas opella via, han els tier lur processiuon duvrau in'uretta meins ch'antruras. Sco solit han tuts quels, ch'ei stai ina ga ni l'otra officials da vischnaunca survegniu il gentar en claustra per engrazionta memoria, pils buns survetschs ch'els da **Tujetsch** han giu prestau all'abbazia en in cumbat cun ses renitents subdits dalla **Val d'Ursera**.

Nova Gasetta Romontscha nr. 46, 14 da november

1863

Nuorsas jastras en Tujetsch

- 1) Ina nuorsa nera, l'ureglia dretga in snez davon en ed in davos en, la seniastra era sco la dretga.
- 2) In barbeisch ner cun corns dalla medema nota.
- 3) In barbeisch grisch grond entir, ureglia dretga ina furcletta gronda davos en, fess ed ina ruosna.
- 4) In ner entir, ureglia dretga giudasum, fess, duas furclettas davos en, la seniastra dus snezs davon en.
- 5) In ner entir, la dretga osum ina furcletta quadra ed in snez davos en, la senisatra tagliau giu dasum.
- 6) In barbeisch gagl entir, la dretga ina furcletta davon en, la seniastra ina ruosna.
- 7) In barbeisch alv, ella dretga in snez davos en, la seniastra era in snez davon en.

Ils proprietaris dils sura tiers dueien entochen ils 20 da november far da saver al suttascret e san quels retrer suenter haver pagau las spesas idas si.

Rueras, ils 11 da november 1863

Duri Wenzin, genau

Milsanavon sesanflan aunc tier Tumaisch Schmet a **Cavorgia** duas nuorsas jastras cun sequenta nota: 1) In anugl ner, la dretga giu dasum ed ina furcletta davos en, in snez davon en ed ina ruosna. 2) In secund anugl ner, la dretga ina furcletta davon en e fess. – Enteifer 10 dis dueien ils proprietaris vegnir per ellas.

Nova Gasetta Romontscha nr. 46, 14 da november

1863

Resultats dallas elecziuns pils cusseglers naziunals

... **Tujetsch**: 128 per Toggenburg ed in per inschignier Bavier. ...

Nova Gasetta Romontscha nr. 47, 20 da november

1863

Cloms da quens

Cadi. Maria Luzia Wenzin ha per ugau genau Duri Wenzin, omisdus da **Tujetsch**. - Genau Duri Wenzin ei era ugau dils affons da msitral J. J. Gieriet p.m. cun num: Margreta Cristgina, Celestina, Barla Catrina, Josefa, Gieronimi e Jac. Anton.

Nova Gasetta Romontscha nr. 48, 27 da november

1863

Las vischnaucas da **Mustér**, **Sumvitg**, **Tujetsch** e **Medel**, e sco ins auda era pliras dil district Glogn, han concludiu da protestar encunter il conclus dil Cussegl Grond, che perscriva il salari pils scolasts.

Mustér ha da quellas varts tarmess al Cussegl d'educaziun sequenta protesta: ...

Nova Gasetta Romontscha nr. 48, 27 da november

1863

... Sull'**Alpsu** eis ei iu ils davos 15 dis 4 trops ord la **Cadi**, ils dus lunsch ora ils pli bials eran da **Breil**.

... Era ils pors entscheivan ussa a trer sull'**Alpsu**, mo donn ch'igl unviern ei finalmein da s. Leci tenor vegl proverbis semess en sessel e serrau giu ils cuolms.

Nova Gasetta Romontscha nr. 49, 5 da december

1863

Il marcau da s. Andriu a **Glion** ei stau bia gliעד, mo buca ton bia tiers. Il caponegozi ei staus quel dils stiarls; Talians e marcadonts da **Tujetsch** e **Medel** han cumprau si biars e zuar per pli bials prezis che quei ch'ei vegniu vendiu a **Ligiaun**. ...

Nova Gasetta Romontscha nr. 50, 12 da december

1863

Cloms da quens

Cadi. Tumaisch Huonder retscheiva sco assistent ils quens digl absent Gion Rest Monn, omisdus da **Rueras**.

Nova Gasetta Romontscha nr. 51, 18 da december

1864

Duas nuorsas jastras a Tujetsch

Ina tgisch nera cun corns e tgau alv, ureglia dretga duas furclettas davon en e fess, la seniastra in mugrin davos en.

Ina tgisch cun tgau alv che ha mo fess l'ureglia seniastra.

Ils proprietaris dueien enteifer 20 dis s'adressar tier signur Mucli a **Cavorgia**.

Nova Gasetta Romontscha nr. 4, 22 da schaner

1864

Calonda mars va la posta sursilvana buca pli mo tochen **Mustér**, mobein direct a **Sedrun**, ed in auter onn sull'**Alpsu**. Sco ins auda ha ei dau in ferm cumbat, schebein la posta duei ir mo a **Sedrun** ni tochen **Rueras**, mo finalmein ha la capitala purtau la victoria.

Nova Gasetta Romontscha nr. 6, 5 da fevrer

1864

Statistica dils tiers

Tujetsch

1131 armauls, 477 vaccas/genetschas, 240 stiarlas/mugias, 188 stiarls, 25 cavals, 1413 cauras,

1103 nuorsas e 307 pors

Nova Gasetta Romontscha nr.11, 11 da mars

1864

Il favugn ha quels dis scadenau ora la neiv taluisa, ch'igl ei ussa en **Surselva** terren tochen **Mustér** e ch'ins savess, sch'ei fuss buca da temer pli neiv e ferdaglia, schon ussa sillas spundas da **Selva** e **Tschamut** entscheiver cullas lavurs pella via sull'**Alpsu**.

Nova Gasetta Romontscha nr.11, 11 da mars

1864

Cloms da quens

Cadi. Duri Berther ei assistent digl absent Giachen Antoni Beer, omisdus da **Tujetsch**.

Nova Gasetta Romontscha nr.14, 1. d'avrel

1864

Il negozi da biestga ei ualti vivs en **Surselva**. Questa jamna ei in Tudestg che ha ina gronda meria cun varga 100 vaccas ad **Ebersberg** en **Baviera**, staus tochen **Tujetsch** per grondas e vaccas giuvnas che han aunc da far vadi, en tut ha el cumprau si 30 per bials prezis. ...

Nova Gasetta Romontscha nr.17, 22 d'avrel

1864

Collecta per Riom

Tujetsch 150 frs.

Nova Gasetta Romontscha nr.18, 29 d'avrel

1864

Clom da quens

Cadi. Assistent Giachen Antoni Schmid ei ugau dalla dunna ed affons dil defunct Giachen Antoni Soliva, tuts da **Tujetsch**

Nova Gasetta Romontscha nr.20, 13 da matg

1864

Vid la via nova sull'**Alpsu** vegn ei presentamein luvrau cun tutta forza; sil territori grischun ein circa 400 luvrers ed ei vegn aunc adina novas roschas umens ord l'**Italia**. – La posta sursilvana ei uonn vegnida honorada cun ina nova, gronda biala crotscha, mo sche quella entaupada denter **Tavanasa** e **Zignau** ina menadira da cavals a pèr, sche resca ella da buca puder speras ora. Igl ei in conclus dil Cussegl Grond, che quellas tendas vias da communicaziun, fatgas all'entschatta pli graschlas, dueien vegnir slargadas, schi gleiti sco il basegns semuossa. Cheu ei ussa quella urgenza evidenta e sch'il cantun vul buc ademplir sia empermischun, sche vegn la ligia muort la posta a sunar si el. Sco ins auda, vess la via da **Portenza** tochen **Grüsch** zun da basegns dad ina slargada.

Nova Gasetta Romontscha nr.21, 20 da matg

1864

Alp da cavals

La vischnaunca da **Tujetsch** pren si ad jarva 9 cavals a 17 francs in; in cavagl cun pulein paga aber cun quel 20 frs. Ultra da quei vegn ei aunc da bonificar il pastur. Per quei, sco per ulteriur sclariment, san ins s'adressar tier signur gerau Sep Antoni Mucli a **Sedrun**.

Nova Gasetta Romontscha nr.23, 3 da zercladur

1864

Publicaziuns

La fiera da Tujetsch

vegn tenuta quest mardis proxim ils 14 da quest a **Sedrun**

La suprastanza da **Tujetsch**

Nova Gasetta Romontscha nr.24, 11 da zercladur

1864

Sillas fieras sursilvanas dil zercladur, tenidas a **Trun, Glion, Ursera e Tujetsch** ei generalmein buca stau biara e biala biestga, tuttina han las vaccas e mugias pagau andants prezis; sco raritad pella **Cadi** relatein nus, ch'ei seigi la fiera da **Tujetsch** vegniu vendiu ina mugia tumpriva sin d'atun per 277 francs e miez. Las cauras han pagau per miezvia, mo il mender ei iu ad **Ursera** cullas nuorsas dalla **Cadi**, ton pli che plirs marcadonts vevan cumprau si quellas caramein. Il meglier esit han ils cavals giu, che vegnan schai via la stad per tscheins egl **Uri**; igl ei vegniu pagau 8 – 13 marenghins per cavagl; mo ord la frequenza da viandonts, che semuossa schon ussa ad **Ursera**, pon ins concluder, ch'ils ustiers fetschien aunc cun quels lur bien gudogn.

Nova Gasetta Romontscha nr.25, 18 da zercladur

1864

Il 27 da quest ei la crotscha gronda postala da 4 cavals, ornada cun matgs, ida per l'emprema gada a **Tujetsch** cun dus postigliuns, in conductur dall'emprema classa e cun ina representaziun dil biro postal, dil telegraf e dils hotels a **Mustér**. Remarcabel che la crotscha, respectiv ils cavals, levan buca passar l'enconuschenta storta, che meina ord il vitg **Mustér**, mo aunc pli remarcabel che quels herolds che han fatg da saver als Tuatschiners la vegnida d'in niev temps, ein damaneivel dalla classica ruina **de Putnengia** casualmein sentupai cun in tipus dil temps vegl – in vegl diplomat, che ha enamiez nies tschentaner, 1850, cun sias caultschas cuortas, priu cumiau dalla sala dil Cussegl Grond e viva ussa retratgamein en siu eremitasch. Quella sentupada dil temp niev e vegl vess dau caschun tier bein enqual seriusa reflexiun, mo ei era ina legra cumpignia, che ha els hotels da **Tujetsch** schau viver il temps niev ed il vegl e reconciliau las duas rivalas **Sedrun e Rueras**.

Nova Gasetta Romontscha nr.27, 1 da fenadur

1864

La fiera leventinèsa da s. Pieder 29 da zercladur a **Quint**, che vegn era frequentada da **Medel e Tujetsch**, ei buc ida bein e zuar principalmein pellas tunas ch'ei seigi tras nuorsas pigurèras e vaccas talianas rut ora la malsogna ella **Val Blegno** ed ella **Leventina**. Ils aspects pil negozi da biestga ell'**Italia** munglassen semidar sin d'atun, tschelluisa pudessen las fieras buc ir ton bein.

Nova Gasetta Romontscha nr.27, 1 da fenadur

1864

Il 30 da zercladur ei il **Pass Lucmagn** vegnius serraus muort la zoppina el vischinont **Tessin**. (*Puspei aviarts tenor la gasetta dils 8 da fenadur.*)

Nova Gasetta Romontscha nr.27, 1 da fenadur

1864

La zoppina ei ussa era rutta ora denter la biestga d'**Ursera** sill'**Alpsu**, aschia che quei pass ei serraus per tiers che vulan vegnir digl **Uri**. Speronza ch'el vegni d'atun puspei aviarts, tschelluisa pudessen sin d'atun bia Sursilvans ir ad **Ursera** e mazzar lur engarschauns, ch'els han tenor il solit tarmess questa stad leu ell'alp. Sut tals aspects vegnan las patronas da quels s.h. tiers ad esser fetg engrazieivlas alla regenza, ch'ella ha ussa decretau, che la serrada pervia dalla zoppina duei buc impedir il transport da carn frestga. Speronza ch'ellas vegnan a mussar lur renconuschientscha cun far a nos treis caus cantunals in present da treis famus schambuns sursilvans, che'in buca mo beinvesi a **Cuera**, mobein perfin ell'**Italia**.

Nova Gasetta Romontscha nr.29, 15 da fenadur

1864

Schegie che la stagiun pils viandonts ella **Svizra** alpina ha schon daditg entschiet, sch'ei aunc ussa zun paucs jasters passai atras la **Surselva**. La posta arriva aunc adina il bia vita a **Mustér** e perfin ils conducturs, che han uonn entschiet a far lur tur tochen **Sedrun** enstagl mo a **Glion**, per dar cheutras empau pli gronda splendur alla ruta sursilvana, ein tutteninaga stulli. Ei para, ch'ils jasters veglien refierer da mirar giu la majestusa **Surselva** entochen in auter onn, che l'**Alpsu** ei aviarta per

crotschas. Il viadi a pei, che fuss schi avantagius pil spert e pil tgierp, vegn tier nosa declinada generaziun pli e pli ord moda. Dad in temps, nua ch'ins veseva aunc neginas crinolinas, vegnevan bia damas frestgamein sull'**Alpsu**, armadas cun in fest alpin, mo ussa ei ≈ quei ina gronda raritad. Nova Gasetta Romontscha nr.30, 22 da fenadur

1864

Unn pon ils catschadurs da camutschs spitgar ina biala catscha. Ella alp **Nalps (Tujetsch)** han ins viu ina roscha da 45 camutschs ed era dad auters mauns audan ins da bialas cumpignias; mo donn ch'ils Tessines pon dar a dies a quellas selvaschinas in meins avon che nos catschadurs. –Nova Gasetta Romontscha nr.33, 12 d'uost

1864

La schitgira digl uost ha catschau vinavon ils ers, mo anavos ils risdivs ch'eran serefatgs tras ils temporals dil fenadur. Remarcabla ei stada la midada dalla temperatura denter ils 9 e 10 d'uost. La steppadad da mardis vargau veva alzau il termometer a **Mustér** sin 23 grads, l'auter di era ei aber in suffel, che la gliעד schelavan e gievgia damaun neveva ei a **Tujetsch e Medel** ella bassa. Per entgins dis san aschia ils avdonts da **Surrein** esser senza tema pervia dil tun. Nus stuein mo mal, che bein enqualin vul aunc adina fierer sil pauper telegraf la cuolpa, ch'il tun detti ussa era giu ellas vals, enstagl mo sils cuolms e sch'in da quels ha detschartamein declarau, che pli da vegl seigi era stau fatg si in da quels telegrafs en **Surselva**, mo ins hagi muort il tun puspei stuiu dismetter el, sche stuein nus declarar, ch'el mondi empau en fanzegna.

Nova Gasetta Romontscha nr.33, 12 d'uost

1864

Denter ils luvriers lombards sill'**Alpsu** ei quels dis succediu in cass dublamein trest. Suenten haver buiu bravamein ensemen dumengia vargada a **Rueras**, ha in cert Mainetti, in um rabiau e temius da ses camerats, maltractau la notg sin gassa siu cusrin *Biaggio* Cantalupi taluisa, che quel ha piars la schientscha ed ei l'auter di morts. Tenor la secziun fatga veva el survegniu fridas mortalas el tgau. Il tribunal dalla **Cadi** ha concludiu da surdar il delinquent alla dertgira cantunala e schau transportar el a **Cuera**. A mesavia ha el vuliu fugir dalla giustia humana, mo ha persuenten spert stuiu cumparer avon il suprem tribunal, la divina giustia. Arrivaus a **Glion** la sera dils 16 d.q. han ils schendarms serrau en el en ina combra si ault el Hotel Lucmagn e priu naven ad el la vestgadira, sinaquei ch'el sappi buca fugir. Mo il delinquent ha buca senuspiu da fugir sco sanscullottes, allas 11 dalla notg selai el ord finiastra, duvround ils batlinis per tretscha, mo in nuv da quels disnua, el dat giu, scarpa il fildirom dil telegraf e rumpa en il tgau vid in baun crap spella casa. In vischin ha viu quei, fa canera, ils schendarms dattan neutier, cadeinan el miez morts, mo sias plagas eran mortalas, aschia ch'el ei spartius la damaun. Il mazzau ed il sesturniu han in tschuppel petschens affons; la dunna da Mainetti ha aunc dacuort giu scret ad in enconuschent, ch'ei duessien pell'amur dar bein adatg sin siu um, sinaquei che quel fetschi en sia gretta neginas disgrazias.

Nova Gasetta Romontscha nr.34, 19 d'uost

1864

Cloma da quen

Cadi. Cristgina Sievi ha per ugau gerau Paul Schmid, omisdus da **Tujetsch**.

Nova Gasetta Romontscha nr.34, 19 d'uost

1864

Denter ils luvriers sill'**Alpsu** ei ils 19 d.q. daventau ina nova sventira; in Tirolès *Caspar Alexandri* ha piars la veta cun siglentar crappa. Nunvulend il "schutz" ir suenter haver mess fiug silla puorla, va el vi sul crap en cun in schuaun envidau, mo enaquella peglia la puorla spert fiug e siglenta um e crap en in'altezia d'ina casa. Il disgraziu era schizun plagaus, ch'el ei morts schi gleiti sco el ei staus puratus en casa a **Tschamut**. Perfin siu cunti en sac era ius tut en tocs.

Nova Gasetta Romontscha nr.35, 26 d'uoost

1864

La cumissiun taliana pella viafier ei ils 26 d'uoost arrivada a **Mustér** suenter haver fatg quei di in'excursiun ella **Val Sumvitg**, per mirar empau il terren dalla lingia sulla **Greina**. Ils 27 eis ella serendida sil **Lucmagn** tochen **S.Gion** ed ils 28 a **Tujetsch** per considerar con bein ch'ins sappi sviluppar da leu en la lingia dil **Lucmagn**. ...

Nova Gasetta Romontscha nr.36, 2 da settember

1864

Mustér, ils 7 da settember, allas 3 suentermiezdi. Victoria! Ual quest mument arriva cheu l'emprema crotscha dad **Ursera**. Era en via sull'**Alpsu** ein oz ils signurs inschigniers Cuonz e Depuoz i per l'empremaga cun crotscha.

Nova Gasetta Romontscha nr.36, 2 da settember

1864

Ferton ch'ils marcadonts da biestga mavan auters onns da quei temps sin tuts mauns a cumprond si tiers, stattan els uonn aunc ussa grad eri. Las schliatas tunas ord l'**Italia**, la zoppina el **Tessin**, la seida fallida, il pauc pavel ell'aulta **Italia** dattan pign anim da cumprar si stiarlamenta. Nus stuein denton remarcar, ch'il pavel seigi mo fallius ellas muntognas e buc ella bassa sco Talians han segirau a nus; la reha raccolta da graun ella **Italia** furnescha daners ed empau tiers drova l'**Italia** en scadin cass. Esser precauts ei endreg, mo buca memia temeletgs. Capito, "voi Croaron, che cacciate via la roba col baston?" (sco ils Talians dian dils marcadonts romontschs). Ils puleins paran denton da pagar bein. A **Tujetsch** eis ei vegniu Tudestgs, che han cumprau si ina roscha puleins da questa primavera per 8 e 9 marenghins in. Sco ins legia ellas gasettas, ein ils cavals era stai fetg tschercai sillas fieras bernèsas. Par cavals giuvens d'in onn e miez seigi ei vegniu pagau 400 – 600 frs. il tgau.

Nova Gasetta Romontscha nr.38, 16 da settember

1864

Sco schon enconuschent ha il Cussegl Grond da quest onn, sin giavisch dalla vischnaunca da **Tujetsch**, concediu a quella ina fiera sin ils 12 d'october, ch'ei a nies manegiar fetg nizeivel, principalmein pella **Cadi**, aber ina remarca fuss forsa adequata da metter el public ariguard quella fiera, per leutras sentir ils meinis dad auters bein manegionts burgheis. ... Ord las sura allegadas raschuns fagessen nus bugen la sequenta remarca sur dalla fiera da **Tujetsch** digl october. Fuss ei buca meglier per il general traffic da biestga da metter quella fiera sin ils 27 ni 28 d'october, aschia amiez temps denter quella da **Trun** e quella da s.Martin a **Mustér**. Ils tiers che fussen cumprai sin las fieras avon fussen mess giu damaun dils marcadonts e lura sevessen ei aunc cumprar e dismetter ina gada avon quella da s.Martin. Quei ei nossa idea, nus havein vuliu metter quei el public ed havein speranza che persunas che capeschien quei pli bein, vegnien a schar udir lur meinis sur da quei impurtont fatg.

In pur ella **Cadi**

Nova Gasetta Romontscha nr.39, 23 da settember

1864

En tutta aura ha la posta fatg dumengia vargada siu tur ad **Ursera** culla nova crotscha per quella rutta e cun 5 cavals, ella ei arrivada leu las 10 dallas sera e la damaun denter las 7 e las 8 eis ella en tutta neiv puspei vegnida a **Mustèr**. En 4 uras selai ei tgunschamein far la croschada da **Mustér** ad **Ursera**, aschia che la posta sa en in di ir cumadeivlamein da **Cuera** ad **Ursera**.

Nova Gasetta Romontscha nr.39, 23 da settember

1864

Ils 12 e 13 d.q. ha la collaudaziun federala dalla via sull'**Alpsu** naven da **Mustér** tochen **S.Brida** giu liug tras signur inspectur federal Cuonz ed ils signurs cusseglier guvernativ Wassali e

capoinschignier Salis. El medem temps ha il cantun era collaudau la davosa secziun, la tenda naven da **S.Brida** tochen sils cunfins cantunals spel lag, la quala signur Plattner ha giu surpriu da baghegiar. Mo donn ch'igl ei ariguard la construcziun-su (Oberbau) buca vegniu observau la medema conformitad denter il **Grischun** ed **Uri**, cheutras vegn la pareta dalla via sigl intsches **Grischun** pregiudicada. Il **Grischun** ha baghegiu fetg solid, mo en consideraziun dils gronds cuosts ha el buca vuliu far ella pli luxuriosamein, che quei che la Confederaziun veva perscret. **Uri** encuntercomi ha viu en, ch'el seigi vegnius bein a part culla partiziun dil subsidi federal per l'**Alpsu** e sin siu territori era la construcziun ultra da quei buca schi custeivla, cun quei ch'ei era da far neginas punts etc., perquei ha il guvern uranès schau a siu inschignier Diethelm cumpleina libertad e quel ha lu vuliu far semussar ils Uranès renconuscheivels visavi la Confederaziun, cun construir la via pli lada e luxuriosa, che quei che quella veva perscret. **Uri** ha dils 350 000 frs. destinai dalla Ligia pell'**Alpsu** survegniu 150 000 e cun metter vitier mo aunc 30 000 cuviera el tut sias expensas priu ora l'expropriaziun. Aschia vess il **Grischun** buca riscau bia d'era sorprendere la construcziun sigl intsches uranès sut las offertas fatgas a siu temps. La muntogna dall'**Alpsu** ha tras la via nova survegniu ina tut pli emperneivla vesta, ella ha piars empau da siu character selvadi e la nov'aveina da traffic denter la giganta pezza dil **Badus** e **Crispalt** vegn en paucs onns a purtar ad ella gronda vivacitad cunzun inaga che la via sulla **Furca** ei finida. Schegie scaffidas e battegiada sco straduns militars, lein tuttina sperar che quellas novas vias laschien buca schi spert encorscher lur character gueril, mobein surveschan per promover il traffic, la beinstonza, la concordia ed uniun denter avdents dalla **Svizra Centralalpina**.

Nova Gasetta Romontscha nr.42, 14 d'october

1864

Nos marcadonts returnai dalla fiera da **Ligiaun** dattan aunc mendras novas da quella ch'ils Glarunès e zuar per raschun, ch'ils sez vevan bia vaccas, las qualas han pagau bein. Sco raritad remarchein nus, ch'ina genetscha tuatschina hagi pagau 17 marenghins, probabel la pli cara vacca ch'ils Tuatschins han vendiu enzacu. Ils stiarls e mutgs encuntercomi han tratg mal, 12 pulits stiarls ein vegni sgavignai per 6 marenghins il pèr! In auter marcadont ha dau via 5 mutgs ed in stierl per 23 marenghins, in tierz ha schau ir dus mutgs per 9 marenghins! Aschia eis ei buca da sesmarvegliar, che nos marcadonts vulan pagar pauc pils stiarls restai cheu anavos, e che bia purs tscherchan da vender vaccas ed envernar ils stiarls. A **Ligiaun** eis ei aunc restau anavos da quei da melli tgaus, ch'ei vargai ni restan sin l'autra fiera, en tut possi ei esser stau 4 – 5000 armauls. Ils cavals han buca pagau sco ei vegneva detg, perquei eis ei vegniu turnentau puleins. Il pastg era caraschia e tras quei las expensas pli grondas che ordinari. Cun tut ir mal vess ei aunc saviu ir mender, sch'ei vess muncau la bialaura. Conclusivamein aunc ina remarca. Sch'igl ei ver, quei ch'in marcadont ha a nus segirau, numnadamein ch'ils mutgs da **Medel** hagian uonn valiu silmeins miez marenghin dapli ch'ils da **Tujetsch** e zuar per raschun, ch'ils emprems hagian giu sust las ruhas dil settember, ferton che quels da **Tujetsch** hagian stuiu star ordaviert, sche duess quella circumstanza esser ina buna stimulaziun per ranschar suschnas ellas alps.

Nova Gasetta Romontscha nr.42, 14 d'october

1864

La nova fiera da **Tujetsch** ha giu da muentar pauc, ei era empau biestga mo bunamein negins marcadonts cun quei ch'ils Uranès e biars da **Tujetsch** eran schon sin viadi ad **Altorf**. Duei la fiera da **Camischolas** prosperar, sche sto ella vegnir fixada sin gliendisdis avon la fiera d'**Altorf**, che croda silla gievgia avon s.Gagl. Ins ei spanegiaus co ei vegn ad ir silla frequentada fiera ad **Altorf**, nua ch'igl ei vegniu catschau grond muagl, cunzun ord il **Tessin**. Ins tema che quella surcatschada pudessi efectuar ina sbassada dils bials prezis dallas vaccas.

Nova Gasetta Romontscha nr.42, 14 d'october

1864

Nuorsas jastras en **Tujetsch**

- 1) In tschanc alv, fess la dretga ed ina furcletta davon en, la seniastra tagliau giu dasum fetg.
- 2) In tschanc alv, la dretga in snez davon ed en in enterviers davos en.
- 3) Ina nuorsa alva, la dretga fess duas gadas ed ina furcletta davos en.
- 4) Ina nuorsa, che ha tagliau giu dasum la dretga, in snez davon ed in davos en, la seniastra ina ruosna.
- 5) In anugl alv grond, giu dasum la dretga, la seniastra dus snezs davos en e sco sclusel ella medema davon ora giu.
- 6) Ina nuorsa, tagliau giu dasum la dretga, ina furcletta davon en, la seniastra ina furcletta davon en.

Ils proprietaris da quels tiers dueien enteifer 15 dis s'adressar tier

la suprastanza da **Tujetsch**

Tujetsch, ils 10 d'october 1864

Nova Gasetta Romontscha nr.42, 14 d'october

1864

La direcziun postala ha scret ora en libra concorrenza, tgi che vegli menar dil zercladur 1865 naven la posta sursilvana sillas staziuns **Cuera-Rehanau, Rehanau-Flem, Flem-Glion, Glion-Trun, Trun-Mustér** e pils treis meins da stad fenadur, uost e settember la posta dall'**Alpsu** sillas satziuns **Mustér-Tschamut** e **Tschamut-Ursera**. Las cundiziuns san ils aspirants mirar suenter sils biros postals a **Cuera, Glion** e **Mustér** e ston dar en sils 15 da december. Tgei uras che la posta dall'**Alpsu** vegn a partir a **Cuera** ed **Ursera**, nua ch'ella vegn a prender il gentar – sil qual ils ustiers dalla **Surselva** ein spanegiai – quei ei aunc nuota fixau, bein aber, che la posta sursilvana duei quels meins, ch'ella va buca sull'**Alpsu**, ir naven da **Cuera** per las 7 enstagl sco sut il present uorden schon las 6 dalla damaun.

Nova Gasetta Romontscha nr.48, 25 da november

1864

Per completar e per part era rectificar nossa davosa notizia ariguard la futura posta sull'**Alpsu** savein nus ussa notificar, che quella parti da **Cuera** allas 7 dalla damaun, arrivi a **Glion** allas 11 e 5, laschi leu 25 minutas temps da gentar, mondi las 11 e 32 a **Trun**, arrivi leu l'ina e 30, a **Mustér** las 15, a **Tschamut** las 17 e 25 ed ad **Ursera** las 19 e 30. Allas 5 dalla damaun banduna ella **Ursera**, vegn a **Tschamut** las 7 e 30, a **Mustér** la 9 e 10, a **Trun** las 10 e 20 ed a **Glion** las 12 e 10, leu stat ella 25 minutas e vegn a **Cuera** las 16 e 35.

Nova Gasetta Romontscha nr.49, 2 da december

1864

Annunzia

La vischnaunca da **Tujetsch** ei intenziunada da schar plantar en seiv viva suenter la via nova, leu nua ch'ina classena ei necessaria per schurmetg dil funs. Tgi che ha tschaffen da sorprender quella lavur, duei tochen ils 20 da december, onn current, dar en alla suttascretta, con ch'el pretendi pella tschuncheisma da quella seiv, la quala el sto garantir. Ulteriur sclariment dat

La suprastanza da **Tujetsch**

Nova Gasetta Romontscha nr.49, 2 da december

1864

... Alla via nova sull'**Alpsu** han ins d'engraziar, ch'era entgins Uranès ein vegni a **Glion** e cumprau si enzatgei vaccas. ...

Nova Gasetta Romontscha nr.51, 17 da december

1864

In stierl brin

cun ina corda enta culiez, ell'ureglia dretga davon en in vinchelmess, ina ruosna ed in snez davos en ei il davos marcau da **Glion** suentermiezdi ius a piarder. Tgi che sa dar novas da quel ei grondamein supplicaus da schar saver Gion Antoni Curschellas a **Tujetsch (Bugnei)**.

Nova Gasetta Romontscha nr.51, 17 da december

1864

Tier jester

A **Sedrun** tier Vigieli Josef Monn ina caura nera cun tachels alvs, ureglia dretga in snez davon e davos en, in encunter l'auter en tiel tgau.

Il proprietari duei vegnir pil tier enteifer 10 dis.

Nova Gasetta Romontscha nr.52, 24 da december

1864

Ferton ch'ins auda, ch'ils prezis dils funs veglien sbassar tscheu e leu, ei quei buc il cass ella **Cadi**. Las vischnaucas da **Mustér** e **Tujetsch** han tier l'expropriaziun pella via sull'**Alpsu** fatg interessantas exprientschas. Dacuort ei egl ingant vegniu vendiu egl isolau uclaun da **Mompe Medel** roschada frustets, dils quals il pli grond mesirava mo 100 tschuncheismas, per 1 fr. 50 la tschuncheisma – ferton ch'ins vess avon 14 onns saviu cumprar leu pli bials funs per 50 raps la tschunchesima.

Nova Gasetta Romontscha nr.53, 31 da december

1864

Dus anseuls jasters

In stral ed in tgietschen, noda: ureglia dretga tagliau giu dasum, fess, ina furcletta davon en ed in snez davos en, sesanflan tier Fidel Anton Gamboni a **Sedrun**.

Nova Gasetta Romontscha nr.53, 31 da december

1865

Tiers jasters

A **Sedrun** tier Vigieli Jagmet: ina tgisich alva muota, ureglia dretga tagliau giu dasum, fess e dus snezs davos en, ed ella seniastra in snez davos en.

Nova Gasetta Romontscha nr.3, 20 da schaner

1865

Clomas da quen

Cadi. Statalter Paul Riedi ei assistent da M. Catrina Riedi, feglia d'Augustin Riedi, tuts da **Tschamut**.

Nova Gasetta Romontscha nr.3, 20 da schaner

1865

Il menar la posta denter **Mustér** e **Rueras** cun ina schesa ni schletra da dus plazs mintgadi priu ora ils treis meins stad che la posta va sull'**Alpsu**, ei scret ora en libra concorrenza. Las cundiziuns san ins leger suenter el document deponius el biro postal a **Mustér**, nua ch'ins sa era retrer ils formulars per dar en da menar quella posta, il qual sto daventar entochen ils 4 da fevrer. Gl'accord entscheiva cun calonda mars. Essend che **Tschamut** vegn ussa honoraus cun in depot da posta, sche san ils vischins aspirar sin quella piazza. Per tener leu la posta ed ir treis dis ad jamna a **Rueras** pils effects da posta – quei temps che la posta va buca sull'**Alpsu** – survegnan ei 100 frs. ad onn. Tochen ils 4 da fevrer ston era quels aspirants s'adressar tiel signur postdirector a **Cuera**. Curascha pia vus speculants giudapeis al **Culmatsch** e **Badus**. Vus aber, avdents dalla venerabla **Putnengia**, che essas stai aschi disgraziati ariguard la via nova e la piazza fiera, seconsolai e fagei fiasta, a vus ei finalmein daventau salit! Vus survegnis ussa mintgadi las nuvialas digl entir mund e veis era oreifra caschun da mintgadi ir en crotscha ni en schletra.

Nova Gasetta Romontscha nr.4, 27 da schaner

1865

Tiers jasters

A **Tujetsch (Cavorgia)** tier Gion Ant. Schmet ina ansola muota, ureglia dretga dasum, dus snezs davos en, seniastra ina ruosna.

Nova Gasetta Romontscha nr.4, 27 da schaner

1865

Silla libra concurrenza scretta ora per menar la posta sursilvana e la stad quella dall'**Alpsu** eis ei stau plirs che han dau en e suenter ch'igl ei als aspirants danovamein stau vegniu insinuau dad ir pli bass cun lur pretensiuns, ei la menadira tenor usit vegnida surschada a quels, che han fatg il bienmarcau: da **Cuera a Glion** a signur Kündig da **Turitg**, che ha avon entgins onns era giu surpriu da menar la posta engiadinesa, da **Glion** tochen **Tschamut** als signurs frars Berther a **Mustér** e sull'**Alpsu** als signurs Meier ad **Ursera**.

Nova Gasetta Romontscha nr.5, 2 da fevrer

1865

A **Selva** – el liug classic dallas lavinas, nua che pliras cruschs fan endamen las disgrazias succedidas e la caditad dalla veta humana – ei sonda vargada in ferm e curaschus giuven, Florin Venzin, vegnius ella lavina, *4 da fevrer 1865*. Malgrad la ruha aura ha el vuliu esser ius alla catscha si pellas spundas vi da tschei maun dil **Rein**. Nunvegnend el la sera a casa, han sia gliעד entschiet a temer e fatg sedar ora per el. Cheu vegn ei lu raquintau, ch'ins hagi entuorn las 4 udiu a vegnend in squatsch lavina vi da tschei maun, duront che la nebla eri en. Spert van lu leu encunter umens cun petgs e palas, vesan la lavina, anflan gl'emprem la buis e lu era il disgraziu, in bratsch sut la neiv en. El era morts ed ord tut quei, ch'ins ha fatg stem dad el, pon ins cumprender, che la lavina seigi rutta ora sur ses peis sin ina teissa spunda. Dieus hagi fatg grazia cun sia olma!

Nova Gasetta Romontscha nr.6, 10 da fevrer

1865

In s.h. bov entir

da bi peil e beinfatgs ei venals a **Tujetsch**. Tier tgi san ins endriescher ella stamparia dalla Nova Gasetta Romontscha.

Nova Gasetta Romontscha nr.6, 10 da fevrer

1865

Clom da quens

Cadi. Vigieli Valier ei assistent dall'absenza Liberata Valier, omisdus da **Tujetsch**.

Nova Gasetta Romontscha nr.6, 10 da fevrer

1865

Sco rectificaziun dalla nuviata purtada ariguard il menar la posta sull'**Alpsu**, remarchein nus, che la staziun da **Tschamut** ad **Ursera**, seigi vegnida suradada a signur dr. Christen ad **Ursera** e buca als frars Meier da leu.

Nova Gasetta Romontscha nr.7, 17 da fevrer

1865

... Ina Tuatschina ch'ei vegnida tarmessa sco pintga buoba tiels Schuobs ed ei leu plaunsiu sedomiciliada a **Minca**, ha nus leu plirasga remarcau: "Ella sappi nunpusseivel capir, co geniturs possien tarmetter lur pigns affons en ina tiara jastra, senza mirar pli lunsch co ei vegnien cavegliai giu damaun; ella hagi zuar giu la ventira da vegnir tier bien patrun, mo ella seigi biaga stada mal, vesend co auters affons seigien vegni terschanai." ...

Nova Gasetta Romontscha nr.7, 17 da fevrer

1865

Tochen oz, ils 10 da matg, ha ei en quest meins aunc finadin di neviu pauc ni bia, ed aschia eis ei buca da sesmarvegliar, sche las gasettas raquentan da grondas nevadas e cuflaus da tscheu e leu. **Tujetsch** ha da 15 dis enneu era giu neiv, cuflas e lavinas en abundanza; mo per ventira eis ei

succediu neginas disgrazias. Ils Tuatschins sesanflan denton temps da grondas neivs en ina fatala situaziun cun lur via nova, essend che negin vul cheu seschar neu da tener aviert ella. Las vischnaucas da **Mustér** e **Tujetsch** han pervia dil manteniment surpriu neginas autras obligaziuns che da menar la galera, mo era il cantun vul saver pauc da better ora la neiv ed ha leusunter dau sias instrucziuns al viè cantunal a **Tujetsch**. La posta federala ei obligada da far mintgadi siu tur denter **Rueras** e **Mustér**, mo co duei ella passar tras cuflaus da 12 peis altezia, sco igl ei stau quels dis ella **Val Bugnei**? **Tujetsch** less buca sepregiudicar cun porscher memia bia agid; **Mustér** tratga, sch'ils Tuatschins vulan buca vegnir ora, sche san ei star leuen, ed il cantun para da prender si lev pils habitonts da quella tiara dall'empermischun, nau che mèl e latg flessegian en abundonza. Il respectiv protocol dil Cussegl Grond di zuar, che pervia dad arver la via denter **Mustér** e **Tujetsch** temps d'unviern, duei vegnir sentelgiu pli tard, mo sin tgei congress che quella questiuon duei vegnir decidida, san ins aunc nuot. Essend che' setracta cheu per ina via militar, sche savessen ins ad interim liberar la recruta da **Tujetsch** e **Mustér** dil survetsch sil **Rosboden** sut la cundiziun, ch'ella tegni aviert temps d'unviern quella via e retili persunter la schulda dalla Confederaziun. Nova Gasetta Romontscha nr.10, 10 da mars

1865

Silla comunicada fatalitad pervia da better ora la via silla via dall'**Alpsu** denter **Mustér** e **Tujetsch**, consolescha ussa il Bund quellas duas vischnaucas cun segirar, che la medema questiuon vegni era nescher silla via dalla **Furca**, inaga che quella seigi finida.

Nova Gasetta Romontscha nr.11, 17 da mars

1865

Ina caura

ner gaglia, stralla, ureglia dretga fess, seniastra in tarden, ei ida a piarder. Tgi che sa novas da quella, ei supplicaus da schar saver Lucas Cavegn a **Sedrun**.

Nova Gasetta Romontscha nr.11, 17 da mars

1865

Clom da quens.

Cadi. Giachen Antoni Berther, ei ugau da Duri Battesta Monn, omisus da **Sedrun**.

Nova Gasetta Romontscha nr.11, 17 da mars

1865

Ferton che la fiera da **Trun** dils 20 d.q. ha giu pauca e cara biestga (per ina vacca tuatschina eis ei vegniu pagau 13 marenghins) eis ei stau sil marcau da **Glion** dils 24 in grond biestgam ed ei vegniu vendiu per prezis buc aults. ... Stiarls era ei muntanera e bienmarcau, per 80 – 85 frs. in, eis ei vegniu cumprau si biars bials e grass stiarls; ils da **Tujetsch** e **Medel** vessen perquei bugen fatg si pli gronda roscha, mo ei manca ad els il pavel. ...

Nova Gasetta Romontscha nr.12, 24 da mars

1865

Suenter las fieras da **Trun** e **Glion** ei in Bavarès staus tochen **Medel** e **Tujetsch** e cumprau si da bia vaccas per andants prezis. Ferton ch'ils auters marcadonts van il bia mo suenter vaccas giuvnas e bialas, laian ils Bavarès stgisar vaccas veglias e macortas, sche mo ellas ein pleinas vadi e bunas da latg e da peil alv. Aschia pon ins cumprender, che quels marcadonts ein adina fetg beinvegni ella **Surselva**, cunzun uonn ella presenta scartezia da fein. Quellas vaccas van en ina gronda campagna ad **Ebersberg**, nua ch'ei sesanfla circa 200 vaccas – las biaras da razza grischuna – e 12 Sursilvans che miran tier quellas. Quels han lu pli bi far, che nos paupers perveseders, fein e risdiv, sec e verd, malz e frina, rebas e rabas, maunglan ei buca spargnar, els catschan si taluisa las pompeluseras, che nos purs enconuschessen nuot pli lur vaccas, ch'els han vendiu, mo ei dattan era latg persunter – tochen 16 mesiras a di. Tgei legrevla midada per bia da quellas vaccas veglias, ch'ei quels dis instradadas ad **Ebersberg**; ord nuegls da tgerlentaders vegnan ellas ella tiara dalla

cucagna. Possi far bein! Ch'ils Bavarés tscherchan principalmein vaccas che han aunc da far vadi, deriva da cheu, ch'ils vadials giuvens pagan leugiu schi bein; per bialas vadias alvas da 15 dis pagan ils purs bugen 50 frs. ed aunc dapli. Il latg cumpra in Tuatschin giu, e venda lu ora il pieun e caschiel.

Nova Gasetta Romontscha nr.13, 31 da mars

1865

... Ils Uranès ein i sulla **Alpsu** cun dabia tiers e muossan cheutras, che quella nova via seigi buca mo profiteivla pella **Cadi**, sonder pil negozi da biestga dall'entira **Surselva**. ...

Nova Gasetta Romontscha nr.19, 12 da matg

1865

Clom da quens.

Cadi. Vieua Maria Barla Turtè, nata Beer, dunna dil defunct statalter Giachen Fidel Livers da **Segnas**, ed affons han per ugau Vigieli Giusep Beer a **Sedrun**, a quel ni ad assistent Giachen Antoni Schmid a **Sedrun**, dueien tut ils quens da quella famiglia vegnir dai en.

Nova Gasetta Romontscha nr.19, 12 da matg

1865

Ils 25 da matg ei ina famiglia engiadinesa ida uonn cull'emprema crotscha sull'**Alpsu**, schegie ch'igl ei stau vegniu bess ora negina neiv. Plira signeria passada tras **Ursera**, mo meins curaschusa che l'indicada engiadinesa, vess fatg la medema ruta, sch'ei vessen buca giu tema dalla neiv.

Nova Gasetta Romontscha nr.22, 2 da zercladur

1865

Il matg ei stulius, mo ha hau anavos stupenta pareta els aults, duront che sias plievlias han ella Bassa buc pudiu restabilir dil tut quei ch'ils funs han giu pituu dalla schitgira avrela. Schegie ch'igl ei stau il matg ualti frestg, sch'ei la calira tonaton muntada il davos temps sin 24 grads Reaumur a **Mustér**. Remarcabel, gie dara s'udiu eis ei ch'ils aviuls han a **Selva**, en ina altezia da 1538 meters, schamnau e stuschau schon il matg.

Nova Gasetta Romontscha nr.22, 2 da zercladur

1865

La fiera da Sedrun

vegn uonn excepziunalmein tenuta gliendisdis proxim, ils 12 da zercladur.

La suprastonza da **Tujetsch**

Nova Gasetta Romontscha nr.23, 9 da zercladur

1865

La fiera da **Sedrun** ei uonn buca stada frequentada sco auters onns. Las vaccas cumparidas eran da pauca vaglia ed han perquei era pagau leusunter. Tiella cumpra da stiarls han ils Tudestgs fatg concorrenza als Romontschs e perquei han quels pagau biabein. Tgauram han ils Uranès cumprau si da bia per andants prezis, il mender han las nuorsas pagau. – Cun quella caschun notifichein nus al ludeivel publicum, ch'il pacific vischinadi da **Camischolas** hagi cedi u sia fiera digl october al vitg **Rueras** – ton per respectiva correcziun dallas fieras dadas en el Calender Romontsch.

Nova Gasetta Romontscha nr.24, 15 da zercladur

1865

Cloms da quen

Cadi. Tgi che ha quens culla concursanta vieua Lisabet Loretz da **Tschamut**, duei dar en agl ugau statalter Gion Paul Riedi da leu.

Nova Gasetta Romontscha nr.24, 15 da zercladur

1865

Cloms da quen

Cadi. Vieua Margreta Cristgina Beart ed affons han sco ugau Giachen Giusep Decrusch, tuts da **Tujetsch**.

Nova Gasetta Romontscha nr.25, 23 da zercladur

1865

Premis fixs per casas da scola ni alzament dil fondo ei vegniu partiu ora 5240 frs. ... denter auter a **Selva** 400, **Camischolas** 350 ...

Nova Gasetta Romontscha nr. 27, 7 da fenadur

1865

La posta dall'**Alpsu** ha entschiet siu cuors da stad sonda vargada, mo aunc ussa era ella il bia ualti vita. Per correcziun dil plan da tur communicaus da nus quest unviern, relatein nus, ch'ella parti dad **Ursera** tenor midada fatga pli tard pér las 7 dalla damaun, arrivi a **Tschamut** las 9 e 35, a **Mustér** las 11 e 15, a **Trun** las 12 e 35 e setegni si leu pil gentar tochen l'ina e 40 min ... a **Cuera** vegn ella las 19 e 30. Naven da **Cuera** va ella las 6 e 15 dalla damaun ... vegn a **Mustér** allas 15 e 15, a **Tschamut** las 17 e 35 ed ad **Ursera** las 19 e 35.

Nova Gasetta Romontscha nr.27, 7 da fenadur

1865

Sch'il proverbii: "Sco ils dis tgaun van anen, aschia van els ano", duess sevirificar, sche cuoza quell'aura plievusa aunc ditg. Tschella jamna ha ella lavagau bia fein; en **Tujetsch** era ei da quels, che vevan tochen 50 ponns strèsa *fein sil prau*. Schi desiderada sco la plievgia era vivon, ual aschi beinvegnida fuss ussa la bialaura per tut ils fretgs.

Nova Gasetta Romontscha nr.31, 4 d'uost

1865

In temporal dalla notg dils 29 sils 30 dad uost ei stau in dils pli horribels, ch'ins seregorda a **Mustér**. Il cuntinuau camegiar e tunar, il suffel e la dracca ella snueivla stgiradetgna nocturna fageva veramein sgarschur. En plirs logs ha ei dau tempiasta, a **Tschamut** vesevan ins la damaun entirs mantuns ed a **Danis** e **Tavanasa** duei haver manizzau si bia feglia pumera e rabetscha truffels. ...

Nova Gasetta Romontscha nr.35, 1. da settember

1865

Cloms da quens.

Concessiun guvernativa, ils 11 d'uost 1865

Cadi. La facultad da Madleina Kindli, nata Bigliel, dunna da Mat. Anton Kindli da **Tujetsch**, vegn segirada, perquei dueien tuts quens da quels dus consorts vegnir dai en ad assistent Jacob Anton Schmid da leu.

Nova Gasetta Romontscha nr.35, 1. da settember

1865

La fiera da Rueras

Ei vegn cheutras fatg da saver ad in ludeivel publicum, che la fiera da **Rueras** vegni tenuta ils 9 d'october, quei ei gliendisdis proxim enstagl pér ils 13 d.q.

Tujetsch, ils 3 d'october 1865

La suprastonza

Nova Gasetta Romontscha nr.40, 6 d'october

1865

Nies cantun ha quels dis piars in fideivel survient, il salter cantunal (Bundsweibel) Anton Berther da **Tujetsch**, che ha da 1834 enneu surviu ella casa dalla regenza. Purtond ina depescha el biro telegrafic survegn el la daguota, dat per tiara via e negins remiedis han saviu far revegnir el, - en in per dis er'el ina bara. El ruaussi en pasch!

Nova Gasetta Romontscha nr.44, 3 da november

1865

Unviern. A **Tujetsch** ha ei ier dau 3 quartas neiv ed a **Mustér** circa miez bratsch.

Nova Gasetta Romontscha nr.44, 3 da november

1865

Clom da quens

Cadi. Dunna ed affons dil defunct Francestg Berther a **Tujetsch** han per curatur assistent Schmid, il giuven, che retscheiva tuts quens dil defunct per liquidar la facultad da quel.

Nova Gasetta Romontscha nr.44, 3 da november

1865

Aunc in exempel d'ina biala raccolta. Il selvadi da **Tujetsch** ei adina staus renomaus per siu bi glin e schegie che quel ei uonn ellas biaras valladas buca gartegiaus, sche ha in pur tuatschin tuttina fatg dad ina curtauna streha semglin 18 curtaunas tgembladas. Sin in sulet glin ha el anflau 105 borlas, ditgel tschien e tschun, glins da 60 e 70 borlas fuv'ei plirs. Il medem econom ha era fatg bials truffels essend che plirs da quels pesavan 1 glivra *fun* in.

Nova Gasetta Romontscha nr.46, 17 da november

1865

Annunzia

La vischnaunca da **Tujetsch** ei intenziunada da schar via da guder l'aschinumnada

alp da **Tschamut**

per 1 onn ni per 6 onns entschavend 1866.

Per quella fin fa ella enconuschent a tuts amatur da quella alp, che quella vegni a **Sedrun**, ils 15 da mars 1866, dada via da guder a quel che porscha il pli grond tscheins. Quella alp porta 140 – 160 armauls gronds cun in grond diember da nuorsas vitier. Ei meretta da vegnir menziunau, ch'il stradun ad **Ursera** va sper l'alp ora, aschia ch'igl ei zun cumadeivel d'ir e vegnir.

Ulteriur sclariment san ins da tut temps promptamein obtener tras

la suprastonza da **Tujetsch**

Sedrun, ils 20 da december 1965

Nova Gasetta Romontscha nr.51, 22 da december

1865

Annunzia e recumandaziun

Il suttascret ligiacudischs fa cheutras da saver, ch'el seigi setabilius a **Mustér** ella stizun spella stamparia en casa dils signurs Frars Monn e serecamonda cheutras ad in ludeivel publicum per tuttas lavurs da siu mistregn, ch'el vegn a far spert, solid e per in raschuneivel prezi.

En sia stizun ha el era da vender differentes cudischs d'oraziuns, d'uffeci, da ductrina e calenders.

Emanuel Deragisch

Nova Gasetta Romontscha nr.59, 29 da december/ Nova Gasetta Romontscha nr. 2, 12 da schaner 1866

1866

Saltè cantunal

Sco salte cantunal ei signur Anton Berther da **Tujetsch**, fegl dil vegl „Bundesweibel“ Berther, legius ora; igl ei stau varga 20 aspirants per quella piazza.

Nova Gasetta Romontscha, ils 12 da schaner 1866

1866

Resultat dalla votaziun

Cadi. **Tujetsch** ha cun 174 vuschs unitamein fiers tuts 9 artechels ella fontauna dil **Rein** e votau pils 50 000 frs.

Nova Gasetta Romontscha nr. 3, 19 da schaner

1866

Ei para che la fiera da **Ligiaun** da quest atun vargau seigi buca curdada ora aschi mal sco ins manegiava, essend ch'ils principals marcadonts da **Tujetsch** e **Medel** han secartiu da far legher tscheiver communabel e zuar alla moda veglia, cun hoppers senza polcas e schottischs.

Nova Gasetta Romontscha nr. 6, 9 da fevrer

1866

Alp Tschamut

Annunzia.

La vischnaunca da **Tujetsch** ei intenziunada da schar via da guder l'aschinunada alp da **Tschamut** per in onn ni per sis onns, entschavend 1866. Per quella fin fa ella enconuscent a tuts amatur da quell'alp, che quella vegni a **Sedrun**, ils 15 da mars 1866, dada via da guder a quel che porscha il pli grond tscheins. Quell'alp porta 140 – 160 armauls gronds cun in grond diember da nuorsas vitier. Ei mereta da vegnir menziunau, ch'il stradun ad **Ursera** va sper l'alp ora, aschia ch'igl ei zun cumadeivel d'ir e vegnir. Ulteriur sclariment san ins da tut temps promptamein obtener tras la suprastanza da **Tujetsch**.

Sedrun, ils 6 da mars 1866

Nova Gasetta Romontscha nr. 10, 9 da mars

1866

Clom da quens

Cadi. Vieua Barla Turtè Berther, nata Wenzin e sia feglia a **Camischolas** han per ugau Giachen Antoni Berther da **Gonda**.

Nova Gasetta Romontscha nr. 14, 6 d'avrel

1866

Lavina

Malgrad la nevada dils 2 e 3 d'avrel ei ussa puspei terrenau aschi lunsch sco vivon; dad ina nevada luada ora aschi spert seregordan ins buca grad, perquei eis ei era tscheu e leu rut ora boas. Era en **Tujetsch** ei iu silla spunda meridiunala grondas lavinas la notg dils 2 sils 3 d'avrel, che han empleniu en la **Val da s. Brida** tscheu a **Selva** sin ina stermentusa moda ed otg dis reteniu il **Rein**. Fuss ei stau ina lavina da freid enstagl da cauld, sche fuss ei stau finiu cul vitg da **Selva** . . .

Nova Gasetta Romontscha nr. 15, 13 d'avrel

1866

Clom da quens

Concessiun guvernativa, ils 13 d'avrel 1866

Cadi. Vieua Onna Maria Degonda, nata Mugli, ed affons han per ugau genau Sep Antoni Mugli, al qual ins duei per saver liquidar la relaschada facultad dil defunct stalter Gion Antoni Degonda, tuts da **Tujetsch**, dar en tut ils respectivs quens.

Nova Gasetta Romontscha nr. 17, 27 d'avrel

1866

Annunzia

Ils 9 da matg suentermiezdi, vegn a **Selva** en casa dalla caplania mess en ingant duas schaumnas aviuls ed auters objects.

Nova Gasetta Romontscha nr. 18, 4 da matg

1866

Tschamut

Tschamut, quei ei tschema dil mun, entscheiva a secivilisar. Tiella staziun da posta vegn ei leu baghegiu si in hotel e quei vitget duei ussa aunc daventar la residenza d'in schendarm per trer en il dazi da consum sin bubrondas spirituosas che vegnan retratgas dil **Grischun** sur **Ursera**. Mo donn che quei niev emploiau cuosta al cantun dabia e vegn a trer en zun pauc.

Nova Gasetta Romontscha nr. 22, 31 da matg

1866

Cloms da quens

Cadi. 1) Gion Antoni Beer ei assistent per Barla Catrina Beer, omisdus da **Camischolas**. Al davos dueien tuts quens dall'emprema e da siu frar p.m. Vigeli Beer, vegnir dai en. 3) Ils quens digl emigrant scarvon Wenzin da **Rueras** ein da dar en a siu assistent genau Hans Giachen Beer a **Sedrun**. 4) Assistent Giachen Antoni Schmid ei numnaus assistent pils fargliuns Lisabet, Duri e Rudolf Wenzin.

Nova Gasetta Romontscha nr. 22, 31 da matg

1866

Elcziuns. Rein Anterior. ... assistent Schmet da **Tujetsch**, ...

Nova Gasetta Romontscha nr. 23, 9 da zercladur

1866

Cloms da quens.

Cadi. Genau Duri Wenzin ei numnaus assistent per vieua Barla Turtè, nata Wenzin, tuts da **Tujetsch**.

Nova Gasetta Romontscha nr. 24, 16 da zercladur

1866

Cloms da quens.

Cadi. Giachen Antoni Berther ei ugau da feglia Barla Turtè Berther, omisdus da **Tujetsch**.

Nova Gasetta Romontscha nr. 26, 29 da zercladur

1866

Tschamut

Il Fegl official dils 6 *da fenadur* fa da saver, ch'en consequenza dalla nova via sull'**Alpsu**, seigi ussa ranschau en ina duana a **Tschamut** per trer en il dazi cantunal da consum sigl import da raubas spirituosas e surdau l'incassaziun da quel a stalter Gion Paul Riedi da leu.

1866

Tempiasta

Ils 19 da fenadur, il medem di ch'igl ei dau tempiasta e dau giu il tun egl **Uaul Cavorgia**, ein tenor il Tagblatt era ils habitonts da **Flem** tras in temporal stai en gronda tema. . .

Nova Gasetta Romontscha nr. 30, 27 da fenadur

1866

Cloms da quens.

Cadi. Assistent Giachen Antoni Schmed ei curatur e liquidatur dalla facultad da Barclamiu Berther, omisdus da **Tujetsch**.

Nova Gasetta Romontscha nr. 30, 27 da fenadur

1866

Cloms da quens.

Cadi. Ils quens digl absent Hans Giachen Berther da **Rueras** ein da dar en a siu assistent e liquidatur genau Stiafen Monn da **Sedrun**.

Nova Gasetta Romontscha nr. 34, 24 d'uost

1866

Sco onn, aschia ha era uonn, la fin d'uost purtau gronda dracca, sulettamein ei quella vegnida ina notg avon. Las grondas auas dalla notg dils 28 sils 29 *d'uost* han tscheu e leu fatg considerabels donn. Da **Mustér** ha il **Rein** menau naven 3 – 400 tschuncheismas pledra dalla fabrica da glas a **Domat**. A **Sedrun** ei il **Drun** vegnius in per ga schi ferms, che las casas stremblavan. Nuotatonmeins ha leu la gronda e biala punt pitiiu negin donn, bein aber las uestonzas sper la punt da **Camischolas**.

Nova Gasetta Romontscha nr. 35, 31 d'uost

1866

Caschiel grass da **Tujetsch** e **Cristallina**

san ins retrer da J. J. Condrau a **Mustér**. Essend che la temperatura da questa stad ei stada favoreivla pellas cascharias, sche vegn ei garantiu pella buna qualitad.

Gasetta Romontscha nr. 36, 7 da settember

1866

Treis nuorsas jastras

vegnidas neutier dil maun da **Nalps**, ureglia dretga giudasum, seniastra priu ora in vinchel davonora, in snez davos en, tier ina maunca quei snez, tuttas treis nudadas cun titgira cotschna si dies. Sesanflan tiella suprastonza da **Tujetsch**, nua ch'il patrun sa retscheiver ellas el termin tschentamental pagond las spesas, autruisa vegnan ellas vendidas.

Gasetta Romontscha nr. 36, 7 da settember

1866

Schei ha uonn dau pauc fein grass, sche enqueran pliras vischnaucas che han bialas alps e pastiras da trer ton pli bia pavel ord ils cuolms. Aschia ha **Tujetsch** vendiu uonn fein e pastg per 2000 frs. Mo giu dad in toc pastira ei en sorts ina vid l'otra vegniu segau 80 tschuncheismas fein!

Gasetta Romontscha nr. 37, 14 da settember

1866

Cloms da quens

Cadi. Assistent Schmed da **Tujetsch** ei curatur dalla massa dil concursant Barclamiu Berther a **Tschamut**.

Nova Gasetta Romontscha nr. 39, 28 da settember

1866

En **Tujetsch** ei quels dis vegniu vendiu duas pulitas vaccas mo per 110 frs. ensemen!

Nova Gasetta Romontscha nr. 42, 19 d'october

1866

Sin repetida istanza dil ludeivel Cussegl Pign e Cussegl Federal ha il cantun **Tessin** aviert ils 30 d'october il pass aber denton mo quel dalla **Greina**, dil **Lucmagn** e dall'**Alpsu**, aschia che mo la **Surselva** ha cun el liber traffic, ferton ch'il **Bernardin**, respectiv la **Val Mesauc** ei aunc serrada. ... **Uri** vegn ussa era immediat ad arver l'**Alpsu**. Sco nus havein udiu ord buna fontauna, eran ins ad **Altorf** semtgai dad arver encunter la **Surselva**, schi gleiti sco **Tessin** dessi l'iniziativa.

Gasetta Romontscha nr. 44, 1 da november

1866

La **Cadi**. **Tujetsch**: 143 per Condrau, 114 per landrehter Vieli e 14 per redactur Gredig.

Nova Gasetta Romontscha nr. 44, 1 da november

1866

Cadi. **Tujetsch**: 186 per Condrau ed 1 per Latour.

Nova Gasetta Romontscha nr. 46, 16 da november

1866

... Sull'**Alpsu** ei vegniu catschau ina gronda massa vaccas a **Lucerna**, nua ch'ei era scret ora sin tuts mauns ina nova e gronda fiera sils 22 d.q. Schon avon eran marcadonts da **Tujetsch** stai cun da nossas vaccas tochen **Aarau** e **Zofingen**, nua ch'ellas han tratg biebein, per motiv ch'ei vegn cheuora tschercau vaccas da buca gronds prezis. ...

Gasetta Romontscha nr. 47, 23 da november

1866

Tiers jasters a **Tujetsch**

1) Ina nuorsa grischa, ureglia seniastra in snez davon en.

2) Ina tgisich alva, dretga giudasum e fess in snez davon en.

- 3) In anugl grisch cun corns, seniastra snez davon en.
- 4) Anugl entir cun corns, dretga giudasum e dus snezs davos en, seniastra dus snezs davos en.
- 5) Ina tgisich alva, dretga dus snezs davos en.
- 6) Anugl ner cun corns, dretga in mugrin davos en, la seniastra dus snezs davos en.
- 7) Nuorsa alva buca tundida, colur cotschna si dies, fess omisduas ureglias e priu ora empau, ella dretga in snez davos en.
- 8) In ansiel ner, dretga e seniatra ina furcletta orasum ed ella seniastra aunc ina ruosna.
- 9) In ansiel grisch, dretga in mugrin davon en orasum, la seniastra giudasum.

Pagond las spesas san ils proprietaris retrer quels tiers tier
la suprastanza

Nova Gasetta Romontscha nr. 47, 23 da november

1866

... Marcadonts bavarès ein questa jamna stai pella **Surselva** si tochen **Tschamut** e cumprau si ina biala roscha vaccas per prezis mesauns. ...

Gasetta Romontscha nr. 48, 30 da november

1866

El commers da vaccas ei aunc adina gronda vivacità en **Surselva**. In marcadont bavarès ha la jamna vargada cumprau si 50 vaccas ella **Cadi**. Schegie che quellas vessen giu pign esit sin auters mauns, stevan ellas tuttina 160 frs. intragliauter. Mo la vischnaunca da **Tujetsch** duei haver vendiu ora quest atun circa 240 vaccas e tonaton eis ei aunc dapertut venal vaccas. La davosa fiera da **Ligiaun** ei ida mal, aschia era la fiera d'**Altorf** dils 29 da november. In marcadont da **Medel**, che ha frequentau quella, ha stuiu schar sill'**Alpsu** duas vaccas ella lavina, duas ha el pudiu liberar, mo stuiu schar ventscher ellas la notg sil cuolm. El sez e siu cumpogn da viadi ein dalla lavina vegni fiers vi el lag, mo ein mitschai culla tema e cun schar anavos ella neiv caput e capetscha.

Gasetta Romontscha nr. 49, 7 da december

1866

Sil davos marca a **Glion** ei vegniu marcadau pir che mai. ... Ils marcadonts talians pagavan per stiarls ners e maghers sis marenghins e miez, aschia ch'ìls da **Tujetsch** e **Medel**, ch'èin aschi gronds amatur da quei rom, han fatg ad els pintga concorrenza. ...

Gasetta Romontscha nr. 50, 14 da december

1866

Ils 16 da december ei igl aultreveriu signur canoni Jacob Franz Gieriet, beneficiat a **Nossadunna** sper **Trun**, il senior digl entir clerus grischun, spartius da quest mund ella aulta vegliadetgna da 87 onns. El ei naschius a **Tujetsch** ils 4 da schaner 1780, vegnius benedius ora ils 14 da december 1806 ed ei aschia staus 60 onns spiritual. Gl'emprem ha el surviu 4 onns sco caplon a **Medel**, ei lura vegnius 1811 sco plevon a **Trun**, nua ch'el ha pastorau tochen 1858. Quei onn ha el dau si quella pleiv, nua ch'ei existeva pli neginas letgs buc enzinadas en dad el, ed ei seretratgs el tgeu pelegrinatsch si **Nossadunna**. Schon 1828 eis el vegnius numnaus canoni e vicari episcopal. Pli tard ha el era funcziunau sco inspectur da scola e dau ora in adattau cudisch d'oraziuns per promover la cultivaziun religiosa dils affons. El ha acquistau l'affecziun e carezia da tut ses parochians e la stema da tut ses enconuschents. El ruaussi en pasch!

Gasetta Romontscha nr. 51, 21 da december

1866

Annunzia da mort.

Cun profunda dolur notificein nus cheutras a tuts parents, amitgs ed enconuschents, ch'ei hagi plaschiu agl altissim Diu da clamar ils 16 da december ord questa veta temporal tier la gloria celestiala nies carezau signur aug
il reverendissim signur canoni

Giachen Francestg Gieriet

vicari episcopal e beneficiat a **Nossadonna** dalla glisch a **Trun**, provedius cun ils sontgissims sacraments dils moribunds, senza malsogna e senza dolurs, ell'aula vegliadetgna dad 87 onns, recumandond l'olma dil revendissim defunct alla pietusa memoria dils fideivels, serecumandein nus vinavon alla cuntinuada beinvulientscha da nos amitgs e vischins.

Trun, 18 december 1866

Ils cumbrigiats nevs e niazas

Gasetta Romontscha nr. 51, 21 da december

1866

Cloms da quens

Cadi. 2) Giachen Martin Berther a **Camischolas** ha l'ugadia digl absent Gion Giusep Decrusch, da sia dunna ed affons. 4) Gl'absent Gion Benedetg Deragisch, sia dunna e siu sir Sep Maria Hendri, tuts da **Bugnei**, han sco curatur assistent Giachen Antoni Schmet da **Sedrun**. 5) Il medem ei era assistent digl absent Luis Jagmet, da sia sora Margareta e siu bab Gion Antoni Jagmet, tuts da **Surrein-Tujetsch**.

Per aver liquidar las respectivas facultads dils sura mess sut ugadia ni curatella, dueien tuts quens da quellas varts vegni dai en als respectivs ugaus ni assistents.

Nova Gasetta Romontscha nr. 51, 21 da december

1866

Publicaziuns

Tiers jasters a **Tujetsch**

1) In tschanc, ureglia dretga tagliau giudasum ed in snez davos en, seniastra treis snezs davos en (sa vegnir consignau mo la pial).

2) Ina starleglia nera, ureglia dretga ina furcletta orasum, seniastra medemamein ina furcletta orasum, fess ed ina ruosna.

3) Ina nuorsa alva cun corns, dretga giudasum, ina furcletta davos en, seniastra giudasum, spezia da furcletta e dus snezs davos en.

4) In buc entir gagl, ureglia dretga nuot, seniastra giudasum e fess entraviers ed in snez davos en.

5) Ina ansola nera strala, uerglia dretga ina furcletta orasum e duas ruosnas.

6) Ina starleglia nera, in tac alv sin las costas, dretga in snez entraviers davon en e seniastra scurselau davoronasi.

Ils proprietaris da quels tiers san beneficond las spesas retscheiver quels tras la suprastonza

Tujetsch, ils 23 da december 1866

Nova Gasetta Romontscha nr. 52, 28 da december

1866

Cloms da quens

Cadi. Tuts quens da vieua Onna Maria Felicia Quinter da **Tujetsch** ein da tarmetter tier al liquidatur da sia facultad assistent Giachen Antoni Schmid da leu. – Al davos numnau dueien era tuts quens digl emigrant Vigieli Josef Deragisch da **Tujetsch** vegnir dai en.

Nova Gasetta Romontscha nr. 52, 28 da december

1867

Essend ch'igl ei ussa il temps, nua che padrins e madretschas ston muort ils biemauns passar la mustra cun lur figliols e figliolas e ch'in ni l'auter pudess forsa gleiti entscheiver a senuspir sur siu grond diember da cumpars e cumars, sche lein nus consolar els cun allegar, ch'il defunct signur canoni Gieriet vevi 111 figliols ni figliolas.

Gasetta Romontscha nr. 01, 4 da schaner

1867

A motiv che silla stad vegn era ranschau en in cuors postal dil **Valleis** si sulla **Furca**, sche ha il departement postal el senn da sin lu menar en in secund cuors sull'**Alpsu**, aschia, ch'ei passass la stad mintgadi tralla **Surselva** duas postas giuviars e duas siviars.

Gasetta Romontscha nr. 02, 11 da schaner

1867

Quest unviern para ei da dar neginas bischas, sunder mo nevadas. Silla nevada dil december, ch'era schon stulida per gronda part, ha ei ils emprems dis da questa jamna puspei dau ina sgarscheivla neiv, aschia ch'ins ha mesirau a **Mustér** el plaun ina altezia neiv da varga 5 peis. Naven dalla renomada nevada dil matg 1858 vulan ins buca seregurdar pli d'ina tala neiv. Igl ei bien ch'il proverbi di: "Ina gronda nevada, ina numerusa casada ei gleiti scarsada." Denton ein ins en tema, ch'ei possi tscheu e leu haver dau disgrazias tras lavinas.

Gasetta Romontscha nr. 03, 18 da schaner

1867

Lavina

Notizias sur las lavinas en **Surselva**, che han caschunau donns, ei vegniu tier a nus las sequentas: A **Selva** ha la lavina priu dus mulins e treis clavaus cun da bia pavel.

Nova Gasetta Romontscha nr. 4, 25 da schaner

1867

Cloms da quens

Cadi. Ils 4 affons dil defunct Stiafen Monn a **Tujetsch** han per ugau lur aug Gion Battesta Monn da **Sedrun**, als quals era tuts ils quens dil defunct dueien vegnir tarmess tier per liquidaziun da sia facultad.

Nova Gasetta Romontscha nr. 4, 25 da schaner

1867

Ferton ch'ins auda per l'entira **Svizra** entuorn, ch'ils prezis dils funs seigien ussa memia aults per obtener ina buna rendita, ei quels dis vegniu vendiu en **Tujetsch** ina acla da varga 5000 tschuncheismas per 2.55 frs. la tschuncheisma! – buns funs mo aunc buca dils megliers, ch'ins anfla leu. Avon circa 50 onns han plirs cumprau si en quella medema vischnaunca massa praus grass per 2 – 3 bazs la tschuncheisma. Tgei midada!

Gasetta Romontscha nr. 5, 1 da fevrer

1867

En preschientscha d'in numerus publicum han ils frestgs giuvens da **Tujetsch** dau ils 25 da fevrer ina legra ed instructiva producziun teatrala a **Sedrun**. „Il fabricant dall'aura“ *translatau da pader Baseli Berther*, ei in tema fetg practic ed interessant pil pievel. Il versau translatur ha dasperas buca schau muncar da cungir la translaziun cun saladas remarcas per tuts stans e saluteivlas presas per umens e femnas. Ord las vehementas debattas dils umens e dallas femnas ha ei sufficientamein semussau, ch'il vegnir perina tgei aura schar far, seigi ual aschi difficil sco il fabricar l'aura. Ils acturs han per la gronda part giugau lur rolla en uorden, aschia che sez finas actrissas leu presentas, han dau ad els unanim laud. Ins vess denton giavischau ch'ei fuss buca vegniu perorau tut en fin romontsch, sunder era empau dialect tuatschin, silmeins en quella interessanta scena, nua che las femnas sescagnavan e seplitgavan. Ina honorifica menziun mereta era il bi cant producius dils medems giuvens.

Gasetta Romontscha nr. 9, 1 da mars

1867

Il favugn dil fevrer ha ussa il mars stuiu ceder all'aurasut. Il freid retegn la vegnida dalla primavera ed ell'entira **Partsura** para la generala scartezia da fein da vegnir pli prigulusa che mai. Ina

excepziun fa uonn la vischnaunca da **Tujetsch**, quella ha savens stuiu tarmetter entirs muvels giuviars, mo uonn ha ella fein per da bia muvels jasters – ina remarcabladad dalla quala ils pli vegls san buca seregurdar. Siu cletg ei stau, ch'ella ha gl'onn vargau vendiu fein a pastg per 2000 frs., aschi ch'ils purs han mo ord las pastiras tratg ina fenada da 10 000 frs. valeta.

Gasetta Romontscha nr. 10, 8 da mars

1867

Cloms da quens

Cadi. Ils quens digl emigrant Lezi Antoni Monn da **Tujetsch** ein enteifer treis jamnas da dar en a statalter Gion Andriu Berther da leu.

Gasetta Romontscha nr. 11, 15 da mars

1867

Cloms da quens

Cadi. Tumaisch Riedi da **Tujetsch** fa da saver, ch'el detti ni plaid ni fatg pils deivets da sia feglia Maria Agata.

Gasetta Romontscha nr. 14, 5 d'avrel

1867

... Fertion ch'ils da **Medel** vevan da miez avrel in bi schiarm sin bia ers, eran ils plauns da **Tujetsch** intragliauter aunc cuvretgs cun in bratsch neiv. ...

Gasetta Romontscha nr. 16, 19 d'avrel

1867

Gl'avrel ei miert a **Galgenen**, cantun **Sviz**, il giuven scolast *Giachen Martin Muggli (1842-1867)* da **Tujetsch**, *maridau Catharina Rochs, in fegl*, nua ch'el veva dau treis onns scola cun bien success. Sco la gasetta da **Glaruna** scriva, era el leu generalmein stimaus e carezaus sco bien e fideivel instructor e bab da famiglia.

Gasetta Romontscha nr. 18, 3 da matg

1867

Silla caravana tuatschinèra da 18 personas ch'ein il davos da mars sembarcadas pell'**America**, ha ils 28 d'avrel ina tut pli gronda caravana d'emigrants bandunau **Cuera**.

Gasetta Romontscha nr. 18, 3 da matg

1867

... Sco derschaders ord 14 proponi vegniu legiu ora: il president „cass“ Lucas Cavegn da **Tujetsch**, dr. Berther e president J. Condrau da **Mustér**, gerau Martin Pali da **Medel**, gerau Franz Decurtins da **Trun**. Sco suppleants: gerau G. M. Capaul da **Breil**, capitani Fr. Vincens e gerau Al. A. Huonder da **Mustér**, gerau Beeli da **Medel**, capitani *Sep Antoni* Mucli e gerau Gion Andriu Berther da **Tujetsch**.

Gasetta Romontscha nr. 20, 16 da matg

1867

... Era sull'**Alpsu** duei ei vegnir construiu ina lingia telegrafica cun biros a **Sedrun** e **Tschamut**. Per ils renomai marcadonts da biestga en **Tujetsch** e per quels che meinan la posta sull'**Alpsu** ei quell'interpresa d'impurtonza, ed ins spetga perquei susteniment pecuniar da quels. Per scadin biro vegn ei pagau per 10 onns 1000 frs. ad onn.

Gasetta Romontscha nr. 20, 16 da matg

1867

Tgi che va la stad culla posta da **Mustér** ad **Ursera**, da **Cuera** en **Engiadina** paga la taxa alpina da 1 fr. per ura

Gasetta Romontscha nr. 22, 30 da matg

1867

Annunzia

En l'alp **Tschamut** vegn ei priu si circa 20 – 30 armauls: vaccas, stiarls ni vadials. Tgi che ha tschaffen da metter en quella alp, sto s'adressar tier gerau Paul Schmet a **Camischolas**.

Gasetta Romontscha nr. 23, 8 da zercladur

1867

Cloms da quens.

Cadi. Gion Rest Caduff ei ugau dil caplon Vigieli Venzin, omisus da **Tujetsch**.

Gasetta Romontscha nr. 24, 14 da zercladur

1867

Publicaziun

Nossa vischnaunca ei intenziunada da schar via per in ni plirs onns il crap scalegl da **Calmuota Calmut**, sut raschuneivlas cundiziuns; aspirants ein supplicai da s'adressar tochen dumengia proxima, ils 30 da *zercladur* da miezdi, tier la suprastonza da **Tujetsch**.

Sedrun, ils 26 da zercladur 1867

Gasetta Romontscha nr. 26, 29 da zercladur

1867

Annunzia

Il suttascet fa cheutras enconuscent ad in ludeivel publicum, ch'el hagi baghiau si **Tschamut** ina nova ustria „Zu den Rheinquellen“ e recamondi quella a tut quels, che passan leu atras empermettend in bien e dueivel tractament.

Lucas Cavegn a **Sedrun**

Gasetta Romontscha nr. 26, 29 da zercladur

1867

La posta dall'**Alpsu** va mintga sera tochen **Tschamut**, mo sil cuolm ei aunc bia neiv en via e negin che fiera ora ella. Ils ustiers sursilvans e d'**Ursera** savessen suandar gl'exempel da lur collegas spel **Stelvio**, che han schau far quella lavur sin lur quen e cheutras survegniu schon baul gronda frequenza dad jasters.

Gasetta Romontscha nr. 27, 5 da fenadur

1867

Finalmein ei la neiv en via sill'**Alpsu** spelada ora e la posta ha ils 8 *da fenadur* entschiet siu tur d'**Ursera** a **Cuera**. Ei ha duvrau liungas tractativas e la smanatscha da nos deputai a **Berna** da vegnir culla questiu avon la radunonza federala per perschader il guvern uranès da far quei stradun alpin carregiabels. Spender in miez milliun per ina via e gnanc saver duvrar ella da mesa stad fuss stau enzatgei remarcabel. ...

Gasetta Romontscha nr. 28, 11 da fenadur

1867

Annunzia e recumandaziun

Il suttascet fa cheutras da saver ad in ludeivel publicum ch'el hagi midau giu siu depot da vischala a **Mustér** e translocou quel en casa nova da signur gerau Sep Antoni Maissen, nua ch'ins sa da tut temps cumprar da quella vischala per in dueivel prezi. Engraziand pella confidanza mussada tochen uss serecamonda per numerusas empustaziuns

Deragisch, hafnermeister

a **Tujetsch**

Gasetta Romontscha nr. 30, 26 da fenadur

1867

Suenter ch'il sulegl ha gliendisdis (*23 da settember*) vargau rut atras il gries nebel e tut selegrava puspei dalla bialaura, ha ei schon la notg sissu viult cassacca, ed il mardis ha ei dau tals bufs d'aria ch'el ha purtau naven dad entirs frusts la stubla ed il glin stemnau entuorn il vitg **Sedrun**. Sch'ils da

Mustér possedessen vegnas sin lur plauncas, fussen ei vegnidas lavagadas la notg dils 24 sils 25 da *settember* tras ina bischetta ch'ei seschluitada tochen giu sur il vitg da **Segnas**.

Gasetta Romontscha nr. 39, 27 da settember

1867

Nuorsas jastras en **Tujetsch**

tier la suprastonza:

- 1) Nuorsa gaglia cun tschut, ureglia dretga in mugrin davon en osum l'ureglia.
- 2) In burbeisch gagl cun corns, dretga ina furcletta rodonda orasum ed in snez davon e davos en, ed ina furcletta rodonda davon en entatier il tgau.
- 3) In barbeisch grisch, dretga in tarden osum e dus snezs davon en; seniastra furcletta rodonda orasum.

Gasetta Romontscha nr. 42, 18 d'october

1867

Clom da quens

Cadi. Hafner Sep Antoni Deragisch ei ugau da caplon Vigieli Venzin, omisdus da **Bugnei**.

Gasetta Romontscha nr. 45, 8 da november

1867

Cauras jastras

Tier la suprastonza da **Tujetsch**: ina gaglia cun in rentamugl enta culiez, ureglia dretga giudasum ed in snez davonenagiu orasum la dretga, seniastra ina furcletta rodonda orasum.

Gasetta Romontscha nr. 46, 15 da november

1867

Tiers jasters

A **Sedrun (Gonda)** tier Giachen Antoni Berther, sesanfla ina ansola nera mesalva, che ha tagliau giudasum omisdus ureglia.

Gasetta Romontscha nr. 47, 22 da november

1867

Cloms da quens

Cadi. Sin declaronza dad insolventadad ei il concuors renconuschius sur sequents persunals: Hans Giachen Decurtins a **Rueras**, curaturs da massa: president G.G. Condrau a **Mustér** ed assistent Schmet da **Tujetsch**.

Nova Gasetta Romontscha nr. 49, 6 da december

1868

Tiers jasters

Passond quest atun in jester cun ina roscha nuorsas tralla **Partsu** ei, sco ins ei pli tard sefatgs en, vegniu vitier duas nuorsas jastras, ch'ei vegnidas vendidas cullas autras egl jester. Il marcadont ha tarmess tier las nodas alla suprastonza da **Tujetsch** per intervegnir ils proprietaris e surdar il pagament. Mo las nodas ein tagliadas ora en pupi senza determinar ureglia dretga ni seniastra, davon ni davos, aschia ch'ins sa ord scadina far sequentas quater nodas

- 1) mugrin davos ora ella ureglia dretga, seniastra tagliau giudasum;
- 2) dretga mugrin davon en, senisatra giudasum;
- 3) dretga giudasum, seniastra mugrin davon en e
- 4) dretga giudasum e seniastra mugrin davos en.

L'autra noda sa esser:

- 1) dretga mugrin davon en, seniastra giudasum e mugrin davos en;
- 2) dretga mugrin davos en, seniastra giudasum e mugrin davon en,
- 3) dretga giudasum e mugrin davon en, seniastra mugrin davon en e

4) dretga giudasum e mugrin davos en, seniastra mugrin davon en.

Tgi che secrei d'esser proprietari da quell'as nuorsas sa cun ufficial certificat da sia noda s'adressar tier la suprastanza da **Tujetsch**.

Gasetta Romontscha nr. 1, 3 da schaner

1868

Disfortuna

In pauper giuven da **Tujetsch**, Anselm Muggli (1827-1901), ei avon plirs onns emigraus ell'**America** per encurir sia fortuna. Suent'esser staus ditg e liung a **St. Paul** e fadiau giu ils daners pil viadi, eis el ius cun in auter camerat en **California**, e para leu duront entgins onns d'haver fatg bunas fatschentas. Siu camerat ei avon dus onns arrivaus ventireivlamein a casa; el che ha buca saviu vender sia possessiun suenter giavisch, ei perquei restaus anavos. Il settember vargau eis el s'embarcaus per vegnir a casa, ei aber sil viadi per mar ord **California** cumpatg fruntaus sin in bastiment da pirats e vegnius sblundergiaus totalmein; aschia ch'el ei ussa in pauper um, ed ha a **New York** stuiu serender el spital dils paupers. Tenor las smanatschas, las qualas tuts matros e passagiers dalla nav fagevan si per el, sco tons liuns e tighers, cun vuler mazzar, pender, fierer ell'aua el ect., eis ei aunc ina miracla, ch'el ei mo mitschus culla veta. – Quella sventira ei ton pli da deplorar, essend che duas soras dil sventirau *Onna Maria (1938-1920) ed Onna Maria Ursula Muggli (1841-1913)* – spitgavan el cun gronda legria, e tuts treis fargliuns fussen forsa per adina stai ord tuttas miserias. Aber il carstgaun propona e Dieus dispona.

Gasetta Romontscha nr. 3, 17 da schaner

1868

Las produczions teatralas, da cant e musica

tenidas quest meins a **Laax, Glion, Ladir, Rabiis, Mustér e Sedrun** ein sco ins auda ualti dapertut curdadas ora per cuntentientscha digl auditori. ...

Gasetta Romontscha nr. 9, 28 da fevrer

1868

Nus havein tscheidi fatg menziun d'in cert Anselm Mucli (1827-1901) da **Tujetsch**, ch'ei sin siu viadi marin da **California** a **New York** vegnius sblundergiaus e maltractaus. Havend el scret als ses, ch'ei seigi denter auter vegniu priu ad el in «wechsel» da 3200 frs. sin ina casa mercantila dalla **Svizra**, ei nossa regenza s'informada a **Basel** e **Genevra**, ed el davos liung ha ina casa rispundiu, ch'ella hagi da **S.Francisco** survegniu gl'avis, ch'ella duei sin in wechsel mess ora sin Anselm Mucli pagar al presentader da quel 3200 frs. La casa a **Genevra** ha aschia aunc a dretg temps saviu vegnir visada da buca pagar ora, entochen ch'ei arrivi buca in niev wechsel. Mucli survegn ses 3200 frs. anavos, ed ins vesa ord quei exempel, ch'igl ei sin in liung viadi pli segir d'haver in wechsel che daners.

Gasetta Romontscha nr. 12, 19 da mars

1868

... ina femna a **Tujetsch** *Maria Cristina Sievi a Selva, naschida 25-03-1775* ed in um a **Tavau** ein vegni 94 onns. ...

Nova Gasetta Romontscha nr. 15, 10 d'avrel

1868

Bien e real vinars d'ansauna

circa 40 mesiras san ins retrer tier Lezi Antoni Balzart a **Cavorgia (Tujetsch)** per 4 frs. la mesira. Cumpraders, che vulan prender tut ni mo in ton ston far da saver enteifer 15 dis.

Gasetta Romontscha nr. 17, 10 d'avrel

1868

Dacuort duei cumparer ina descripciun dalla **Surselva** en ina dallas empremas gasettas illustradas germanas, concepida da signur professor Theobald, cun fotografias da **Glion, Trun, Mustér e Sedrun**, pridas si da signur pictur Darms. Per giavinar neutier pli bia viandonts ella **Surselva**, ch'ei

per biars aunc ina terra incognita, manegian plirs, ch'ins fetschi bia memia pintga canera cun publicaziuns e reclamas, perquei tucca ei da midar proverbi e dir: „Gronda bahaultscha e bia en caultscha“.

Gasetta Romontscha nr. 18, 1. da matg

1868

L'alp da **Tschamut**

Pren si la stad biestga schetga ord vischnaunca (per munconza da tiers en vischnaunca) e zuar per in fetg raschuneivel prezi. Ins sa da quellas varts d'adressar tier il cautegia, gerau Sep Antoni Mucli a **Sedrun**.

Gasetta Romontscha nr. 18, 1. da matg/nr.19, 8 da matg

1868

Silla schitgira dil matg ha il zercladur schon purtau entgins buns e zun desiderai radis. Sch'il zercladur smarschenta la tastga giu dil dies als pasturs, sche pudess ei tenor in vegl proverbi aunc dar in bien onn per las cuntradas aultas. Sco remarcablada relatein nus ch'ins hagi il davos matg schon anflau farbuns madirs a **Medel** e ch'il medem di seigi en quest onn era passau gl'emprem carr sur l'**Oberalp**.

Gasetta Romontscha nr. 23, 5 da zercladur

1868

Silla fiera da **Tujetsch** dils **8 d.q.** era catschau pouca biestga armentiva; il pli encurriu eran stiarls e vadials, quels pagavan biebein. Era vaccas vessen ils Uranès tschercau, mo da vaglia eran paucas ed ils prezis tenu fetg ault. Ton mender steva ei cun las cauras, in temps avon pagavan quellas 24 – 30 frs. ina e silla fiera vegnevan las meglieras vendidas per 20 frs., las mendras da 15 frs. ensi; vanzau eis ei ina gronda quantitat. En tut eis ei vegniu vendiu pauc. Certs marcadonts sisum la **Surselva** vevan tras lur concorrenza catschau ensi ils prezis, principalmein dallas nuorsas, mo ils Uranès vevan buca tschaffen da magliar ora la buglia schi ensalada. Sch'ins cumpra rauba, sto ins era mirar ch'ei seigi pusseivel da puspei survegnir ton sco ins dat. Capito?!

Romontscha nr. 23, 5 da zercladur

1868

(Correspondenza dil **Badus**) Gliendisdis vargau han ils signurs professers e students dalla scola claustrala a **Mustér** sut favoreivla aura fatg ina idillica spassegiada atras la biala e pitoresca val da **Tujetsch**. A **Tschamut** ella nova ustria „Zur Rheinquelle“ ei vegniu surviu ad els per solver in bien caffè cun il renomau aromatic mèl tuatschin. A **Sedrun** el Hotel Cruna ha in gustus gentar cun in bien glas **Vulcliner** legrau ils cors giuvenils e dau faviala alla lieunga. Cuntinudamein ei il beinpreparau gentar aunc vegnius cungius emperneivlamein cun bialas melodias canzuns purtadas avon nunschenadamein e cun precisiun en tschun lungatgs. Honor als beinmeriteivels sgnurs professers, che sedattan tonta breigia da mischedar il dultsch cun il nizeivel e preparar a lur scolars schi bialas recreaziuns. Ei para senza dubi, che la scola claustrala hagi entras las novas forzas, acquistadas da monsignur avat igl atun vargau, fatg in ludeivel progress e mo da sesmarvegliar eis ei, ch'ils geniturs en nossas vischnauncas romontschas dalla **Cadi** tarmettan buca pli numerusamein lur fegls ella scola da **Mustér**, nua ch'els savessen cun pintgas annualas expensas duront dus tochen quater onns emprender particularmein il lungatg tudestg aschi bein sco en autras scolas ord nies cantun.

Gasetta Romontscha nr. 28, 10 da fenadur

1868

Barschament

La jamna vargada ei da mesanotg barschau giu en in mises da **Tujetsch** ina tegia e dus clavaus, ch'eran naturalmein buca segirai.

Gasetta Romontscha nr. 28, 10 da fenadur

1868

Mo plaun vus d'**Engiadina**

... Il Fegl d'**Engiadina** renfatscha milsanavon, che la **Surselva** seigi pli baul semussada inimitga dallas vias, la via dall'**Alpsu** hagi 1860 giu bia adversaris a **Mustér** e **Tujetsch**, ed era en **Lumnezia** hagi ei duvrau cumissaris per perschader quella buna glied d'acceptar ina via cantunala. Cheu encunter remarchein nus, ch'ei vessi dau a **Mustér** negina opposiziun 1860, sch'ei fuss settractau da baghegiar l'impurtonta via dil **Lucmagn** enstagl la via militarica sur l'**Oberalp**.

Gasetta Romontscha nr. 36, 4 da settember

1868

La stupenta bialaura favorisescha la catscha sin camutschs, ed ins pudess aschia spitgar sin ina favoreivla raccolta dils numerus catschadurs, ton pli che quella selvaschina ei semultiplicada ualti bein ils davos onns. Il pigrer da **Nalps** ella **Val Tujetsch** ha viu gl'uoost pliras ga ina roscha da varga 70 camutschs che vegnevan en siu stavel e litgavan las plattas, nua ch'el deva sal a sias nuorsas. Els eran leu aschi endisai, ch'els fagevan pauc stem dils pasturs, cura che quels vegnevan d'entuorn, sertergevan ei empau, mo turnavan lura puspei anavos. ...

Gasetta Romontscha nr. 37,11 da settember

1868

En **Tujetsch** ei rut ora la virola entras in mattatsch turnaus tscheidi da **Regensburg**. El ei mitschaut, mo ha infectau ina femna da 50 onns *Maria Barbara Rothmund*, ch'ei morta. Entginas casas che han giu communicaziun cun quellas duas persunas, ein ufficialmein serradas giu per far curontina.

Gasetta Romontscha nr. 38, 18 da settember

1868

Nunditgond la repetida e fundada lamentaschun, ch'ins duessi buc ir aschi baul alla fiera da **Ligiaun**, ein ils marcadonts da **Tujetsch** e **Medel** schon semess ils 20 da settember sin viadi. Tut che vul esser ordavon per saver vender meglier, buc aber per survegnir ils 200 frs. premi ch'il magistrat fa **Ligiaun** ha destinau per l'emprema roscha da 100 tgaus che arrivi a **Ligiaun** e cumpari schon ils 30 da settember sin piazza fiera. Igl ei quei ina speculaziun dils Luginès da giavinar pli baul la biestga naven da **Sebiastg**, nua ch'ils marcadonts fan per ordinari las meglieras fatschentas e seterglinan leu perquei bien e ditg. La catscha da biestga per quella fiera para da buca esser gronda, cunzun da vart glarunèsa; sch'ei fa uss aunc bialaura, sche pon ils marcadonts selegrar, schegie ch'els han stuiu pagar bials prezis per lur tiers.

Gasetta Romontscha nr. 39, 25 da settember

1868

Correspondenza dil **Badus**. Per far da saver che la Societad da Pius ella **Cadi** mieri tuttavia buca dalla pleranza, notifichein nus, ch'ei seigi ella ludeivla vischnaunca da **Tujetsch** seconstituuiu ina secziun locala, la quala ha il 27 da settember tenuu sia emprema radunonza a **Sedrun**. Presents ein stai 22 commembers, ils quals ein cun entusiassem sedeclarai pella fundaziun dad ina secziun locala. Auters ein stai impedi da cumparar, ein aber medemamein entrai ella secziun, aschia che quella dumbra schon ussa varga 30 commembers. En ina viva e caulda allocuziun ha il president, signur caplon Casanova, declarau ils statuts generals e particulars dall'Uniun da Pius e fatg attents ton sillas interpresas generalas da quella societad svizra, sco era sin ils quater roms dad operaziun en special, proponi e dilucidai ella radunonza districtuala a **Sumvitg**. Il signur farrer dil liug ha en siu votum encuretga da far l'Uniun da Pius populara, cun bandischar ils spuentegls e pregiudezis, ch'il cumin pievel pudess haver encunter quella societad e quei intent para d'esser reussius ad el, essend ch'ils presents mo deploravan, che la buna tendenza da quell'uniun seigi buca enconuschenta, aunc biars vegnessien schiglioc a prender viva part da quella. Denton vegn ins cul temps a procurar la caschun, nua quei ludeivel iffer sa semanifestar nunschenadamein. – Alla fin

dalla sesiun ei vegniu legiu ora il respectiv directori local, e concludiu da tarmetter ina numerusa deputaziun silla radunonza da **Sursassiala a Mustér**.

Gasetta Romontscha nr. 40, 2 d'october

1868

Fiera a **Muster**. ... Ils stiarls vessen pagau bein, mo ei era negins e sinquei ein ils marcadonts da **Tujetsch** e **Medel** serendi giuviars. ...

Gasetta Romontscha nr. 40, 2 d'october

1868

Ferton che las gasettas engiadinèsas rapporta che sin las fieras el **Tirol** ed ella **Valtrina** creschien ils prezis dalla biestga pli e pli, stuein nus relatar il cuntrari dallas fieras en **Surselva**. La fiera da **Trun** dils 10 d'october, ha ei buca muncau marcadonts, mo priu ora tiella cumpra da stiarls levon quels buca morder en, ins po dir ch'il prezi dallas vaccas eri naven dalla fiera da **Mustér** sbassaus per in marenghin. La fiera da **Rueras a Tujetsch**, nua ch'igl ei cumpariu dabia biestga ed ualti biala, ein ils prezis puspei scurdai per in marenghin. Sin quella moda han in per marcadonts bavarès saviu cumprar si buca car ina roscha vaccas ella **Cadi**.

Gasetta Romontscha nr. 42, 16 d'october

1868

Inspeziun dil **Grischun**. Suenter haver conferiu cul guvern e visitau ils terribels donns da **Haldenstein** ein els 27 serendi a **Mustér**, han da leu anora visitau **Tujetsch** e **Medel** e van ussa anoragiu. L'observada cunscienciusadad e moderaziun da vart dallas suprastonzas en dar en e stimar il donn, levgiescha considerablamein la missiun da quels signurs.

Gasetta Romontscha nr. 44, 30 d'october

1868

Ils donns dall'aua ella **Cadi** ha la cumissiun federala stimau sco suonda: **Medel** 17 000 frs, **Tujetsch** 9000 frs., **Mustér** 21 000, **Sumvitg** cun **Surrein** 115 000 frs., **Trun** e **Zignau** 50 000 frs., **Breil** 6000 frs., total 218 000 frs.

Gasetta Romontscha nr. 45, 6 da november

1868

Tiers jasters

Tier frars Hitz ina ansola gaglia, ureglia dretga giudasum ed in snez davon en, seniastra fess.

Gasetta Romontscha nr. 46, 13 da november

1868

Nuorsas jastras a **Tujetsch**

- 1) In barbeisch ner cun corns, ureglia dretga giudasum, ina furcletta davos en orasum ina ruosna, seniastra ina ruosna.
- 2) Ina nuorsa nera, dretga in mugrin, in snez davon en ed ina ruosna, seniastra in mugrin ed in snez davon en.
- 3) Ina nuorsa alva, dretga furcletta orasum e furcletta davos en, seniastra il medem.
- 4) Ina nuorsa alva, dretga furcletta orasum, in snez davon ed ed ina ruosna, seniastra in snez davon en.
- 5) In barbeisch ner, dretga giudasum, seniastra giudasum ed in snez davos en entatier il tgau.
- 6) Ina tgigisch grischa, ureglia dretga ina furcletta quadra davon ora e sum entraviers enagiu, seniastra dus snezs davon en entatier il tgau.

Ils proprietaris dils sura tiers san ton pli spert retrer quels bonificond las spesas.

Tujetsch, ils 7 da november 1868

Per la suprastonza

Lucas Cavegn

Gasetta Romontscha nr. 46, 13 da november

1868

Sil marcau da **Glion** dils 16 da november ei stau grond biestgam cun roschada marcadonts ed ei era vegniu marcadau dabia. Ils prezis dallas vaccas eran pli aults che da s. Martin a **Mustér**; in marcadont tudestg, che veva fatg si ina roscha vaccas, ha declarau, ch'ellas stettien ad el circa 11 marenghins ina. Il traffic da stiarls era buca schi vivs sco autras ga, mo ei muncava era lur capomarcadonts da **Tujetsch** e **Medel**. La piazza da fiera da pors era fullanada, mo quels tiers vevan quellaga pign esit e biars purs ein turnai a casa cun lur purschals.

Gasetta Romontscha nr. 47, 21 da november

1868

Tiers Jasters

A **Tujetsch** 1) tier la suprastonza in barbeisch alv, dretga giudasum ed in snez, seniastra giudasum ed in snez davos en entatier il tgau 2) tier Tumaisch Huonder a **Rueras** ina tgisch alva, ureglia dretga in snez davon en.

Gasetta Romontscha nr. 47, 21 da november

1868

... Las novas scolas per la giuventetgna buc obligada pli da frequentar la scola elementara, per las qualas il davos cussegl grond ha decretau in subsidi cantunal, han ils vischinadis da **Rueras**, **Sedrun**, **Segnas**, **Mustér-S.Gions** e **Surrein** entschiet a menar en.

Gasetta Romontscha nr. 48, 28 da november

1868

Clom da quens

Cadi. Tuts quens da Sep Antoni Brugger a **Rueras** e da sia dunna Margreta ein da dar en a lur ugau Tumaisch Huonder da leu.

Gasetta Romontscha nr. 49, 3 da december

1868

Tiers jasters

Tier la suprastonza a **Tujetsch**: ina caura cotschna gaglia, ureglia dretga ina furcletta davon en, seniastra furcletta davon en ed in snez davon en sper la furcletta, dapli barschau sin in tgiern i G.

Gasetta Romontscha nr. 50, 11 da december

1868

Cloms da quens

Cadi. Stalter Sep Antoni Mucli ei ugau e retschevider da quens per Cresenzia Casparin, nata Curschellas, omisdus da **Tujetsch**.

Gasetta Romontscha nr. 50, 11 da december

1869

Il menar il carr dalla posta sursilvana sillas staziuns da **Glion** a **Trun**, da **Trun** a **Mustér** e da **Mustér** a **Tschamut** ei screts ora en libra concorrenza.

Gasetta Romontscha nr. 1, 1. da schaner

1869

Anflau

enzatgei daners sin via gronda denter **Mustér** e **Tujetsch**. Pli datier san ins s'informar ella stamparia a **Mustér**.

Gasetta Romontscha nr. 1, 1. da schaner

1869

Tiers jasters

Tier Tumaisch Huonder a **Rueras**: ina tgisch alva, ureglia dretga in snez davon en ed ina ruosna pintga.

Tier Giachen Fidel Berther a **Rueras** in tschanc ner, ureglia dretga fess e dus snezs davos en.
Gasetta Romontscha nr. 2, 8 da schaner

1869

Tiers jasters

Tier Giachen Fidel Berther a **Rueras** in tschanc ner, ureglia dretga fess e dus snezs davon en.
Gasetta Romontscha nr. 3, 15 da schaner

1869

Il fein ei en consequenza dalla stupenta aura, nua che ils tiers manedels seviventan cun pauc ni negin pavel, buca cars, denton dependa tut dalla primavera che fa. Tut ch'ei spanegiaus sin quella, cunzun era quels marcadonts, che han tier lur vaccas schon ussa cumprau e pagau varga 20 stiarls sco igl ei il cass en **Tujetsch**.

Gasetta Romontscha nr. 8, 19 da fevrer

1869

La fin dil carneval passau ei vegniu dau en **Surselva** pliras producziuns da cant e declamatoricas. La societad da cant dil **Badus** ha Gliendisdis Tscheiver divertiu ils Tuatschins cun sias bialas canzuns e siu legher declamatori cungiis cun bein enqual remarca sullas femnas ed il traffic d'ozildi. ...

Gasetta Romontscha nr. 8, 19 da fevrer

1869

Il menar la posta da **Glion** a **Tschamut** ei puspei surdau als signurs frars Berther a **Trun** e **Mustér**.
Gasetta Romontscha nr. 10, 5 da mars

1869

Nies stimau American dil **Péz Badus** ha puspei schau vegnir tier a nus ina humoristica correpondenza, nua ch'el scriva denter auter: «Jeu sai buca far cunmeins ch'entras in per lingias schar saver nos cars cumpatriots el **Grischun**, ch'ils emigrants romontschs emblidien buca via las isonzas romontschas ed hagian perquei era celebrau il tscheiver da purs e da signurs, mo culla differenza che quel ei vegnius celebraus en in di. Nunhavend en disposziun il fravi da **Medel**, han ins stuiu sesurvir d'ina musica americana, che fageva alzar las combas, schegie ch'enqualina ein ussa empau da veglias. In brav pushegn ha ei buca muncau e cun enqualin eis ei iu cheu sco cun il fumegl dalla claustra da **Mustér**, ch'era ius a mises e magliau memia digl emprem, ch'el ha buca pudiu schigliar diltut. Ils Romontschs eran tier quella biala stiva representai bein da **Tujetsch** tochen Cazas.

Appartenet tier ils Romontschs tscheu, va ei bein ed ei ha legrau els da puder beneventar in niev emigrau sursilvan, sgr. scarvon Wieland da **Sumvitg** cun sia biala e numerusa famiglia. Speranza che l'**America** plagi ad els! Culla dretga curascha e bunaveglia sa ei tscheu nuota fallir. Il da viver ei dapresent empau da cars, mo en in per meins semida quei grad entuorn, nua che tut fadigia 7 – 15 fr. a di. – Culla religiun vegn ei era mintga di meglier e meglier. Nus cheu el pign marcau da **Stillwater** havein duas baselgias catolicas, ina irlandesa ed ina tudestga, ed omisdue ein mintga dumengia pli che pleinas. Nus Romontschs mein el survetsch divin tudestg, mo desiderassen zun fetg in Romontsch. Jeu sai da dir che la schlatteina romontscha va cheu zun bein vinavon, aschia ch'ins vesa, ch'ils vents americans ein tuttavia buca schliats per ils Romontschs, gie in spiritual romontsch vess tscheu gleiti ina biala caplania.

Nus havein in stupent unviern, grad neiv avunda per ina buna via da schletta e buca freid, mesjamna dalla tschendra mavan stellas sco da mesa stad. – Cun grond plascher retschevein nus la Gasetta Romontscha, sulet che nus deplerein ch'ella ei buca pli gronda. Nus recumendassen grondamein a mintgin egl jester e dumiesti da prender quella, lura speranza ch'ella vegness gleiti a s'engrondir ed aunc purtar pli bia novitads da nossa veglia patria. Bein enqual caussa tertgavel menziunar, mo essend cureisma e temps d'urar e gignar vi schar tochen in'autraga. Denton salidein nus l'entira **Surselva**».

Gasetta Romontscha nr. 11, 12 da mars

1869

Cloms da quens

Cadi. Medemamein han ils nevs Giachen Fidel e Sep Antoni Beer surpriu da trer via lur aug Martin Beer, tuts da **Tujetsch**, perquei dueien tuts quens dil davos vegnir dai en a siu ugau Giachen Antoni Schmid e las excepziuns encunter quei contract ein da schar vegnir tier agl Uffeci circuital.

Cadi. Gion Paly ei assistent da Barla Cresenzia Beer, omisdus da **Camischolas**.

Gasetta Romontscha nr. 12, 19 da mars

1869

Il proverb: „Nadal sin gassa e Pastgas sin pegna“ (ni sco tschel scheva „en pegna“) ei uonn severificaus; ella **Val Tujetsch** vul negin seregurdar d'ina semeglionta cufla sco quella dalla fiasta da Pastgas (*28 da mars*). Suenter la stupenta aura dils treis meins d'unviern december, schaner e fevrer, ha igl entir mars ora neviu e fatg ruh ed ussa da calonda avrel havein nus a **Mustér** aunc tschun quartas neiv els plauns.

Gasetta Romontscha nr. 14, 2 d'avrel

1869

Tier la premiaziun dils taur a **Trun** ein compari 13 bials stiarls. Ils da **Breil** che han quest atun giu cumprau treis destigui taur a **Sviz** per circa 50 marengins, han era uonn giu la plema. Gl'emprem premi da 70 frs. ha il taur da Cavegn a **Breil** tratg a raschaun che el possedeve tenor declaronza dil president dall'expertisa tuttas qualitads perscrettas per il premi; il secund premi 60 frs. ei vegnius renconuschiu ad in stierl da landrehter Alois Latour, il tierz 60 frs. al taur dalla clasutra a **Mustér**, il quart 55 frs. ad in stierl da Gion Petschen a **Schlans**, il quint e sisavel als taur d'assistent Caduff a **Breil** e da capitani Placi Rensch a **Zignau**, 50 frs. per in. **Medel** e **Tujetsch**, nua ch'ins metta pli bia peisa sin biestga mascla che sin bialas vaccas, han tenor solit fatg negina concorrenza tier quella premiaziun.

Gasetta Romontscha nr. 16, 16 d'avrel

1869

... **Tujetsch** ha per tema d'ina tarda primavera giu bess tiara per ses funs entuorn, nua che ins leva arar, e quella lavur ei uonn stada coronada d'in stupent effect. Ils funs ch'eran cuvretgs cun ina nevada da 7 quartas, cura ch'ins ha bess tiara, ein en 10 dis stai terreins, aschia ch'ins ha schon entschiet ad arar leu. La tema da gronda scartezia da fein ei stulida, denton havein nus per miez avrel, ed a raschun ch'ins duei buca ludar il di avon la sera, lein nus era buca glorificar memia il discretau avrel, entochen ch'el ei buca finius.

Gasetta Romontscha nr. 16, 16 d'avrel

1869

Cloms da quens

Cadi. Gerau Jacob Antoni Schmed da **Tujetsch** ei assistent da Martin Peder a **Cavorgia** e retscheiva ils quens da quel per ina liquidaziun tutelara.

Gasetta Romontscha nr. 17, 23 d'avrel

1869

Plontaziun

Quels dis ha la vischnaunca da **Tujetsch** plantau en in niev uaul silla biala spunda dado **Selva**, nua che ella veva gia onn semnau in bi toc uaul. Sut atgna direcziun dil signur inspectur forestal Coaz, ha ella mess ora 5000 larischs, 2000 schiembers, 2000 pegns da duas sorts lenn. Quei ei la medema vischnaunca che ha dau 3400 francs per ranschar tier classenas petgascrap enstagl petgas da lenn, e che ha quels dis puspei vendiu enzatgei plontas veglias per tochen 30 francs l'ina.

Tujetsch sa preziar e schaniar ses uauls, schegie che ina gasetta svizra ha cun caschun dalla davosa malaura columniau quella vischnaunca cun vuler pretender, che ella hagi sfraccou giu uauls sin

moda devastanta. Cun raschun ei signur inspectur forestal publicamein seschais si encunter quella totalmein faulsa reproscha, ed ha declarau, ch'ei detti buca ina vischnaunca, che schanegi pli fetg ils uauls e spargni schi fetg lenna sco **Tujetsch**, quella mereti da vegnir ludada e buca blasmada.

Gasetta Romontscha nr. 18, 30 d'avrel

1869

La canzlia dil cussegl d'educaziun fa da saver ch'ins sappi dad ussa naven tochen ils 31 da fenadur retrer tier ella ils subsidis cantunals che vegnan dai:

- 1) sco supplement da paga per scolasts patentai ed admissiunai,
- 2) per gidar vischanuncas paupras a pagar la paga minimala,
- 3) per scolas da lavur manilas e
- 4) per las scolas, ch'ein vegnidadas dadas quest unviern a parti a quels ch'eran buca pli obligai d'ir a scola.

Sco ins auda ei ranschau en uonn 27 da quellas, en quei 5 che vegnevan dadas mintgadi e che han obteniu 100 frs. ina, ferton che quellas da duasga ad jamna han survegniu 30 – 35 frs. La **Cadi** ha a proporziun giu las pli biaras, ina da mintgadi a **Sedrun** e lu aunc 7 autras. Ils subsidis per quels scolasts, che tegnan scola da repetiziun firaus e dumengias ni in auter di da quei temps, ch'ei buca scola, flessegian pér in auter onn primavera. Speranza che quei futur subsidi promovi quei institut, schi necessari per buca schar emblidar via memia ils affons, cunzun per quels dallas classas inferiuras.

Gasetta Romontscha nr. 20, 13 da matg

1869

Survesta dils cuosts

La via sur l'**Alpsu**, da **Mustér** tochen tier ils cunfins uranès ha custau 362 360 francs. Subsidis dalla Confederaziun per l'**Alpsu** 200 000 francs. La via en **Surselva** da Rehanau a **Mustér** ha custau 617 503 francs.

Gasetta Romontscha nr. 21, 21 da matg

1869

Ord l'**America** havein nus retschert da **Stillwater**, el stadi **Minesota**, ina corrispondenza anonima, che setegn si sugl artechel dil schinumnu „American dil **Péz Badus**“ cumparius en nr. 11 da nossa gasetta. Correspondenzas, nua ch'ils inserents astgan buca dar en lur num alla redacziun, prendein neu per principi buca si en nies fegl e stuein aschia era enviar anavos quella corrispondenza americana. Nus savein denton segirar al tselau correspondent, ch'igl American dil **Péz Badus**, hagi tuttavia buca manegiau schi mal cun sia humoristica descripziun dil tscheiver e biala stiva dils Romontschs, e cunzun buca vuliu renfatschar, ch'els seigien cheu buca secunteni „galantamein“.

Gasetta Romontscha nr. 23, 4 da zercladur

1869

La fiera d'**Ursera** vegn uonn tenuta ils 9 e 10 d.q., pia il di suenter quella da **Sedrun**.

Gasetta Romontscha nr. 23, 4 da zercladur

1869

Eleczions districtualas. District Reinsu: J. J. Condrau, president, president Cajacob, dr. Berther, assistent Schmid, assistent Caduff, genau Fidel Decurtins e dr. Decurtins.

Gasetta Romontscha nr. 24, 12 da zercladur

1869

La fiera da **Tujetsch** dils 8 da zercladur ei stada frequentada da bia glied ed era da bia tiers, e zuar da tuttas sorts, ils Uranès han cumprau la pli part dils tiers ch'eran sin fiera e zuar per enorms prezis, las vaccas per 220 – 340 frs. Ils schinumnuai tachis vevan grond esit, marcadonts da **Tujetsch** e **Medel**, che vevan cumprau vaccas il di avon sin il marcau da **Glion**, han saviu vender tuttas e zuar cun in bibien gudogn e la tschontscha generala era, che sin quellas vaccas ch'ei vendien l'auter di

sin la fiera d'**Ursera** gudognan ei aunc in bionton, schegie ch'ellas ein cumpradas carischia, essend sin la fiera da **Tujetsch**, era ei negins marcadonts auter che dad **Uri**. Era vadials tumprivs eis ei vendiu dabiars, als cauras havevan uonn generalmein mo tets e buca iver, mo pagavan denton aunc biebein. La sera eis ei aunc dau ina buna plievgia da bunaura e lavau giu las purginas stadas ils dis vargai, ed ha fatg bein, quei tut ei aura pils purs.

Gasetta Romontscha nr. 24, 12 da zercladur

1869

Ils 21 d.q. ei stau in di dublamein liungs, pigl emprem eis ei il di pli liung tenor la regla dalla natira, e secundo eis el staus in snueivel liung muort l'aura ch'el ha purtau. Perdetga da quella verdad ein bia perveseders, che stuevan star sper lur muvels en nuegl senza haver da dar enzatgei vivonda a quels paupers animals e tedlar sin il burlir da quels tierets, aschia ch'ils tiers stuevan secuntentar cun esser silmeins schurmegiai dalla neiv giu pil dies. Per cletg eran paucas alps cargadas e quels che havevan cargau han stuiu vegnir a casa. Ils biars da quels tiers han stuiu secuntentar cun survegnir in nuegl cauld e sco ei sedi leger gasettas. Per cletg ei la neiv buca stada gronda, aschia ch'il mardis han ins saviu schar magliar la biestga. Il mender ein las nuorsas matei stadas, las qualas eran generalmein cargadas ed eran en ina neiv dad in bratsch ault. Denton para ei, che ariguard tussegadas purginas, mondi ei forsa ora biebein. Lein haver speranza ch'ei vegni ton pli spert a semidar e far ina outra pli fritgeivla da cheu naven, aschiglioc savein nus strusch cargar las alps. La pli pauca neiv eis ei stau a **Mustér** e **Tujetsch**, a **Mustér** era ei terren che a **Sumvitg** era aunc tut alv. Sco ei para, era la neiv vegnida digl aschi malemperneivel **Crap Ner**, sco ei sedi e buca dil maun dil **Lucmagn** ni fagugn. A **Cuera** ha ei neviu quater uras senza puder tschentar sin via. Il donn vid las vegnas, il fein e garnezi ei gronds. Ei era leu ils 21 da zercladur, il pli liung di, schi freid sco ils 21 da december 1868, il pli cuort di, numnadamein 5 grads. La notg dils 21 e 22 ein a **Cuera** pliras schualmas ventschidas dil freid.

Gasetta Romontscha nr. 26, 26 da zercladur

1869

Grischun. Il til dils jasters entscheiva ad esser ulti fermes en pliras valladas grischunas, oravontut en **Engiadina** ... Ella **Surselva** encuntercomi ei la frequenza da jasters aunc lunsch anavos en cumparaziun cullas allegadas cuntradas e quels che passan atras setegnan si pauc, silpli ch'els fan da **Glion** anora ina excursiun sil **Mundaun** ni naven da **Mustér** sil **Muraun** per guder leu ina majestusa vesta el mund alpin. Sulettamein **Sedrun** ha il cletg d'in diember gasts che fan leu ina cura d'aria frestga.

Gasetta Romontscha nr. 30, 23 da fenadur

1869

Disgrazia

In pastur da **Tujetsch** ha sur il lag da **Tuma** sper il **Badus** anflau l'ossa d'in carstgaun, carteivel d'in mistergner che ha avon entgins onns falliu la via sur l'**Alpsu**.

Gasetta Romontscha nr. 33, 13 d'uost

1869

Sco ei tuna sin tuts mauns para ei che nus haveien en general in bien onn da fretg ed oravontut in oreifer onn per raccolta da mèl. Gasettas tudestgas han el davos riguard cartiu da rapportar in pèr remarcabels exempels. Cun caschun d'ina radunonza d'apiculturs seigi egl **Appenzell** vegniu presentau ina schaumna, che pesavi datier da 100 liras: in apicultur dil **Toggenburg** hagi giu ina schaumna da 84 liras ed obteniu da 14 schaumnas 230 liras mèl. Ei legra nus da saver rapportar dalla cuntrada dil **Badus** aunc pli splendids resultats. In pur da **Tujetsch** veva ina schaumna, che pesava 132 liras, ed ha da sias duas schaumnas tratg ora 70 livras mèl. In auter che possedeve 7 schaumnas, ha medemamein fatg questa stad la biala raccolta da 140 liras flur da mèl. Ins vesa aschia che las flurs dil **Badus** han uonn era giu en mèl e ch'ils aviuls tuatschins stattan en actividad

buc anavos als aviuls d'auters cantuns, els rendan bien quen a tgi che tractescha els en uorden. Ins vesa ch'ei maunca buva mèl e latg, sche mo nos marcadonts da fiera vegnan ussa aunc cun bravas buorsas marenghins.

Gasetta Romontscha nr. 39, 24 da settember

1869

Annunzia e recumandaziun

Il suttascret che ha empriu il mistregn da ligiar en cudischs tier il defunct Stehli a **Glion** ed ei silsuenter sepraticaus en quel cun viagiar per la **Svizra** entuorn, fa da saver ch'el seigi turnaus a casa e sedetti era giu leu cun ligiar cudischs. El serecamonda cheutras per lavur ad in ludeivel publicum empermettend da survir cun promta e solida lavur e per in dueivel prezi.

Emanuel Deragisch

Ligiacadischs a **Bugnei (Tujetsch)**

Gasetta Romontscha nr. 42, 15 d'october

1869

Tiers jasters

Tier la suprastonza da **Tujetsch** sesanflan quater nuorsas culla sequenta noda:

1. In barbeisch alv, ureglia dretga da sum fess e dus snezs davos en, seniastra in snez davos en.
2. In tschanc alv, dretga ina furcletta ed in snez davos en.
3. Ina nuorsa nera gronda, ureglia dretga ina furcletta davon enagiu ora sum, seniastra il medem.
4. Ina nuorsa nera, ureglia dretga in M ora cum ed in fildirom, si dies color cotschna.

Ils proprietaris da quels tiers ein supplicai da vegnir per els ton pli spert.

Gasetta Romontscha nr. 42, 15 d'october

1869

Elecziuns dils cusseglers naziunals. **Tujetsch**: Toggenburg e cusseglier guvernativ Condrau 122 vuschs.

Gasetta Romontscha nr. 45, 4 da november

1869

Tiers jasters

A **Tujetsch**. Tier Giachen Martin Giger: in tschanc grisch, ureglia dretga ina furcletta orasum, seniastra ina ruosna amiez l'ureglia ed in snez davos enagiu.

Gasetta Romontscha nr. 46, 11 da november

1869

Elecziun da cusseglier naziunal. **Tujetsch** 160 per A. Condrau.

Gasetta Romontscha nr. 47, 19 da november

1869

Tiers jasters

A **Tujetsch** tier Vigeli Beer „Vig“ in barbeisch alv cun corns, ureglia dretga giu da sum e fess ed in snez davos en, seniastra fess.

Tier Giachen Martin Giger: in tschanc grisch, ureglia dretga ina furcletta orasum, seniastra ina ruosna amiez l'ureglia e dus snezs davos enagiu.

Gasetta Romontscha nr. 48, 26 da november

1869

Resultats dallas elecziuns dils dus cussegleirs naziunals. **Tujetsch** 219 Condrau ed 1 Caflisch.

Gasetta Romontscha nr. 49, 3 da december

1869

Avon che serrar la sesiun ei aunc vegniu mess avon ina petiziun dalla vischnaunca da **Tujetsch**, nua che ei vegn detg: ella hagi unitamein acceptau la nova constituziun, buca senuspiu giud ils artechels che perscrivien allas vischnaucas in bien uorden, ina ludeivla indemnizaziun per la

gudida dils beins communal, e cristaneivel secuntener visavi ils domiciliai, mo a raschun che la constituziun seigi vegnida fiersa duegi ins scriver ora ils dretgs dil pievel a parti sco els stattan egl'emprem capetel dalla refusada constituziun. Cheutras vegnien las cumpetenzas dil pievel e dil cussegl Grond determinadas scosauda ed ils cuntinuai cumbats el Cussegl Grond sur tgei che seigi da scriver ora e tgei buc calien si. Sin proposiziun da Gadmer ei il Cussegl Grond buc entaus en quella petiziun, ferton che A. Condrau veva proponiu da surdar quella petiziun al Cussegl Pign e cumissiun cantunala per schar rapportar el proxim Cussegl Grond. Sche nus selegrein che la damonda dalla banca ei vegnida scretta ora sil pievel, sche stuein nus da l'otra vart grondamein deplorar che quella impurtonta petiziun da **Tujetsch** ha anflau schi pign susteniment.

Gasetta Romontscha nr. 50, 11 da december

1869

La menadira dil sal da **Mustér** e **Tujetsch** ei el davos Fegl Official scretta ora en libra concorrenza.

Gasetta Romontscha nr. 50, 11 da december

1870

Correspondenza americana

Cun plascher legin nus las novitads, che la Gasetta Romontscha porta a nus ord nossa veglia patria grischuna. Cheuencunter vi jeu era comunicar enzatgei ord nossa nova patria americana. Ils Romontschs ein tscheu, ton sco jeu sai, tuts ualti taffers e dil rest va ei era cun ils biars ualti bein, enqual excepziun dat ei segiramein era. Nus havein tscheu in schliet onn pervia dils daners, ch'ei fetg scarts, gie ei vulan 15 – 25 per tschien tscheins, ferton ch'ins deva avon 5 – 8 procent. La vivonda ei buca cara ed ils biars survegnan quella senza daner blut. Ei dat schon era da quels, che han pauc criedi e per igl unviern empau da trit, il bia da quella glied, che maglian oz si tut e fan buca cass da damaun. Nus havein tscheu fetg freid ed in pèr zolls neiv; las auas ein tuttas scheladas si 4 zolls gries, aschia ch'ins sa dapertut ir sur las auas ora cun cavals e cargas. Buna via da schletta per il tscheiver maunca ei aschia buc, savessen nus sin ina schlittada vegnir ensemen cun nos Sursilvans el Grischun, fuss ei per nus fetg emperneivel e materia da conversaziun muncass ei cheu betg per umens e femnas.

Mo nunsavend quei daventar vi jeu raquintar dad in auter viadi, he vegn ussa fatgs bia ell'**America**, il viadi en **California** silla viafier pacifica. Vivon duvrara ins per ir cun il vapur da posta naven da New York a S.Francisco 25 dis, ussa fan ins quei tur da 4000 miglias en 8 dis per 50 talers tut sin viafier. Dacuort ha nies cumpatriot Tias Decurtins, vivon ustier a **Trun**, fatg quei viadi cun aunc in auter Romontsch. Sco els han quels dis scret a **Minesota** ein els arrivai saunamein an **California** ed han en quella allontanada tiara anflau dabia Romontschs. Ton per quels che vessen tschaffen d'ir ella tiara d'aur, mo ils biars Romontschs en **Minesota** han buca grond tschaffen cheutier.

Co stat ei cul stradun sur il **Lucmagn**? Luvrei brav e dei buca suenter! Co stat ei cun nos vegls trochists da **Sursassiala**? Viva il bagat aunc ni ei mo il narr pli en veta? Tscheu veva il bagat era priu ina enstchatta, mo el ei gleiti stulius e schau anavos mo il narr e quel ha pauc da far cullas troccas, sonder plitost cun ils daners.

Agurond in legreivel niev onn a tuts Romontschs salida sia veglia cara patria

Stillwater, ils 6 da december 1869

In nativ dil **Péz Badus**

Gasetta Romontscha nr. 1, 6 da schaner

1870

A **Regensburg** en **Baviera** eil ils 6 da schaner vegniu satrau in stimau um, nua ch'ins ha viu 42 Romontschs el til da sepultura. Ei era la bara da Joseph Deplazes da **Tujetsch**, ch'ei en sia giuventetgna setratgs ella **Baviera** ed ha leu cun siu negozi da latg acquistau gronda rihezia. Mo el fuva era rehs en bunas ovras encunter ses numerus cumpatriots grischuns, che vegnevan schi

savens tier el per encurir survetsch. La cumparsa da varga 40 Romontschs, che han vuliu render la davosa honor a lur benefactor, dat perdetga da sia beneficienzia. El ruaussi en pasch!

Gasetta Romontscha nr. 3, 21 da schaner

1870

Annunzia da mort

Cun profunda tristezia fagein da saver a tuts nos parents ed enconuschents ella **Surselva**, ch'ei hagi plaschiu agl Altissim da clamar naven da questa veta tier la veta perpetna nies carissim mariu e bab

Joseph Deplazes

da **Tujetsch**, stabilius a **Regensburg**

Provedius cun ils sogns sacraments dils moribunds eis el morts ils 4 da schaner en ina vegliadetga da 77 onns. Nus recumandain l'olma dil car defunct alla pia memoria da tuts enconuschents.

Regensburg, 10 da schaner 1870

La combrigiada consorta:

Barla Deplazes, nata Monn

En num dils affons:

Vigilius J. Deplazes

Gasetta Romontscha nr. 3, 21 da schaner

1870

Grischun. La lescha da rempars ei acceptada dil pievel. ... La **Cadi** ha votau sco suonda: **Medel** 75 pro, 8 contra; **Tujetsch** 61 per refusar e 7 per acceptar (Quella vischnaunca hagi vuliu suandar gl'exempel dil Cussegl Grond, che hagi dacuort era quasi unitamein enviau anavos la petiziun da **Tujetsch** per far scriver ora danovamein ils dretgs dil pievel.), **Mustér** 101 per la lescha e 61 encunter, **Sumvitg** 109 pro e 12 contra, **Trun** encuntercomi ha refusau cun ina vusch, a **Breil** ein 30 stai per acceptar e 60 per enviar anavos.

Gasetta Romontscha nr. 6, 11 da fevrer

1870

El davos Fegl Ufficial vegn ei communicau extracts ord ils rapports dils experts per la premiaziun dils bos. ... ella **Foppa** e **Lumnezia** seigi il progress ella tratga da biestga medemamein veseivels, ferton ch'ins sappi buca secuntentar cullas prestaziuns da **Tujetsch** e **Medel**.

Gasetta Romontscha nr. 6, 11 da fevrer

1870

Cloms da quen

Cadi. 1) Capitani Mucli da **Tujetsch** ei ugau dils affons minorens Gion Rest e Genoveva Mucli da **Tujetsch**. 2) Barla Sievi ha per assistent Sep Antoni Deragisch, omisdus da **Bugnei**.

Gasetta Romontscha nr. 6, 11 da fevrer

1870

El cussegl grond d'**Uri** ei vegniu signalisau ch'ei vegni sull'**Alpsu** menau en roschada buots vin vulclin senza pagar il dazi da consum e sin quei ei vegniu concludiu da schar intercurir quei pli datier. Il daziè grischun a **Tschamut** vess buna peda d'era trer en il dazi per **Uri**, ton pli che las respectivas entradas d'omisdus cantuns tonschan buc da cuvierer siu salari.

Gasetta Romontscha nr. 9, 4 da mars

1870

Cloms da quen

Cadi. Stalter Gion Paul Berther a **Rabius** ha l'ugadia da Barla Cresenzia Beer da **Camischolas**.

Gasetta Romontscha nr. 10, 11 da mars

1870

Cloms da quen

Cadi. Tuts quens dils conjugals Gion Fidel Maculin e da sia defuncta dunna M. Ursula Maculin, nata Schmed, ein da surdar a lur curaturs assistent Schmed a **Sedrun** e gerau Duri Wenzin a **Rueras**.

Gassetta Romontscha nr. 11, 18 da mars

1870

Donaziuns per **Domat**: ... **Tujetsch** cun 100 frs. ...

Gassetta Romontscha nr. 15, 14 d'avrel

1870

Tier l'inspeziun dils tauris dalla **Cadi** a **Trun** ei cumpariu 19 da quels armauls. ... Nus considerein per in progress che tuttas siat vischnauncas eran uon representadas, era **Tujetsch** e **Medel**, che vevan onns ora priu negina part pli da quella premiaziun. ... L'honor che Medel ha giu uonn per l'emprema ga, lein nus sperar che **Tujetsch** hagi in auter onn, da ver a returnond dall'inspeziun da **Trun** in da ses tauris corunaus cun flurs e tschupials.

Gassetta Romontscha nr. 17, 29 d'avrel

1870

La banca cantunala ei fetg probabel acceptada dalla majoritad dil pievel **Grischun**. Dumengia vargada ha **Tujetsch** acceptau quella unitamein cun 114 vuschs. ...

Gassetta Romontscha nr. 21, 28 da matg

1870

En **Surselva** fa la zoppina progress. Tras nuorsas jastras eis ella arrivada tochen sil **Lucmagn** e tras ina vacca cumprada sil davos marcau **Glion** eis ella rutta ora en in mises da **Tujetsch**. Siquai ha **Uri** serrau encunter il **Grischun**, aschia che las proximas fieras da **Trun** e **Tujetsch** piteschan cheutras grond donn.

Gassetta Romontscha nr. 21, 28 da matg

1870

L'expertisa federala per repartiziun dils subsidis per vuors, consistenta ord sis persunals, ei ils 30 da matg vegnida sull'Alpsu tochen Mustér. Ils 31 eis ella partida per Glion inspectont las devastaziuns dil Rein e dils runs.

Gassetta Romontscha nr. 22, 3 da zercladur

1870

Ina buorsa cun entgins daners

ei vegnida piarsa denter **Mustér** e **Tujetsch**. Gl'anflader vegn supplicaus da render quella al pot da **Tujetsch**.

Gassetta Romontscha nr. 22, 3 da zercladur

1870

Dapi che la posta sursilvana va sull'**Alpsu** drovan las brevs dalla **Cadi**, che van a **Rueun**, **Uors**, **Andiast**, **Pigniu**, **Siat**, **Ruschein**, **Ladir** e **Sevgein** 24 – 72 uras dapli per arrivar el liug da lur destinaziun, e quellas da **Lumnezia** e **Sursaissa** 24 uras. Tgisa sche la Confederaziun pudess buca star ora da dar als respectivs curriers, che fan lur tur mo treiss gadas ad jamna, entgins francs dapli pagaglia e far spitgar els a **Glion** entochen che la posta dall'**Alpsu** arriva? ...

Gassetta Romontscha nr. 27, 8 da fenadur

1870

Signur colonel La Nicca ha dau ora ina brochura sur la questiun dalla viafier alpina, nua ch'el dilucidescha siu enconuscent project cun bia tabellas e cartas. Tenor quei duessen las viafier dil **Lucmagn** e **Gottard** s'unir ella **Val Tujetsch**. Enstagl da construir il colossal tunnel gottardistic, menass ins la viafir dad **Amsteg** naven ella **Val Maderana**, tras il cuolm **Rizli** a **Tujetsch** e da leu ensemblamein culla viafier da ceura sur il **Lucmagn**. Al **Grischun**, che vesa ch'igl ei da far nuot cul **Spigla**, fuss quei plan favoreivels ed ei pudess schabegiar ch'era ils Gottardists, curdond sin fermis incaps tiella construcziun da lur tunnel, schassen plascher quella idea fusionistica.

Gasetta Romontscha nr. 28, 15 da fenadur

1870

Correspondenza dil **Badus**. Silla generala calamitad e lamentaschun d'ina magra raccolta da fein en quellas contradas, nua ch'ins ha buca saviu luvrar cull'aua da schuar, savein nus relatar ord il bi selvadi da **Tujetsch** aunc in ualti favoreivel resultat. Segir ch'il fein grass e magher ha era tier nus pitiu zun fetg en consequenza dalla gronda schitgira, schegie buca en quei grad, sco ellas cuntradas enviers giu il **Rein**. Tonaton po ins calcular, ch'ei hagi calau pli ch'ina tiarza visavi ad ina mediocra raccolta. Igl ei stau uonn ina da quellas snueivel raras excepziuns per nossa vallada, ch'il sulegl ei staus stagn caulds, schiglioc buca tgunsch che lez fetschi donn a nus, anzi pil gartetg dil garnezi, sco igl ei uonn il cass, munglassen nus schar barschar empau fein. Pil cal dil fein ha **Tujetsch** ina remedura, ina resursa en ses bials cuolms, pil cal dil garnezi aber sto ins prender il refugi tiels magasins ed arcuns – buca dall'**Egipta** – sunder dils hermès e negoziants.

Enconuschent eis ei en nies **Grischun**, tgei enormas massas fein **Tujetsch** recava mintga onn ord ses cuolms, ord ses beins communals, persesez encunter tutta dueivla indemnizaziun visavi la cassa da vischnaunca. Sil cal general e penuria da fein da casa egl onn present ha nossa ludeivla suprastanza concediu e stigliau ora els cuolms in'enorma quantitat sorts per il schinumnu feinapastg. En publica radunonza ha gl'ingant da quellas sorts furniu alla cassa da vischnaunca varga 2000 frs., senza quintar las tschuncheismas fein, ch'ils paupers han saviu segar gratis. Ils particulars han uonn retratg ord las pastiras ina tala massa fein, che biars pretendan da haver en clavau schi bia mesira fein, sco in onn da buna raccolta. Remarcabel fuss ei, da vegnir sissu il diember da blahs u ponns fein, che **Tujetsch** ha uonn runau ord ses cuolms, e valetar quels tenor carischia, sco il fein sto uonn probabel vegnir. Quei quen vegness a figurar in resultat, il qual giustificass cumpleinamein la sbursada da 2000 frs. en cassa da vischnaunca, tonpli che quels mellis pagan era deivets communals. Intervegnin nus quella rendita, sche vegnin nus medemamein a comunicar ella als lecturs dalla Gasetta Romontscha. – Duess il negozi da tiers quest atun aunc trer mo empau, sche ha **Tujetsch** giu raschun, da celebrar uonn la fiasta federala d'engraziament cun in particular entusiassem.

Sur in auter rom d'industria dils Tuatschins vegnin nus cul temps a far nies rapport.

Gasetta Romontscha nr. 38, 22 da settember

1870

Tiers jasters

En mauns da stalter Josef Anton Deragisch a **Tujetsch** sesanflan sequentas nuorsas jastras:

- 1) Ina nuorsa alva cun corns pigns, ureglia seniastra dus snezs davon en.
- 2) In tschanc ner entir cun corns, ureglia dretga in mugrin orasum davon en, seniastra fess.
- 3) Ina nuorsa alva, seniastra orasum davosenagi in snez e davon 3 snezs entraviers enagi.
- 4) In tschanc alv entir culla noda da nr. 3.
- 5) In tschanc alv entir, ureglia dretga ina furcletta davos en.
- 6) Ina tschutta alva cun tachels ners e noda sco nr. 5.

Gasetta Romontscha nr. 42, 21 d'october

1870

Ella cufla dils davos dis d'october havess in Cavegn da **Breil** gleiti anflau la mort sill'**Alpsu**.

Venderdis vargau ha el bandunau **Ursera** pér allas duas suentermiezdi. Vegnend sisum il lag, er'ei stgir ed el veseva buca pli ils parricars sco fastitgs dalla via. Per buca rescar dad ira surengiu ella stgiraglia, seresolve el da restar grad eri. El batta in toc buna via e va cheu a spass en tutta aura dallas sis della sera entochen las sis della damaun. Lura anfla el il stradun e va in toc vinavon. Nunpudend rumper via po el susentar umens da **Tschamut**, che vegnevan encunter ad el. Ella **Rheinquelle** a **Tschamut** pren el sin sia aventura in bien solver e dorma lu 24 uras e sededesta viscals e da bunaveglia.

Gasetta Romontscha nr. 44, 4 da november

1870

La fiera da s.Martin a **Mustér** ei ida meglier che quei ch'ins spitgava. Ina truppa marcadonts tudestgs e romontschs han fatg concorrenza e plirs ein i in grond toc encunter als tiers, che vegnevan menai sin fiera, giuviars entochen **Sumvitg** e siviars encunter **Tujetsch** e **Medel**. Sin quella moda ei vegniu vendiu bia vaccas per ulti bials prezis, gie ellas han pagau cheu circa 3 marenghins dapli che silla lavagada fiera da **Trun** digl october. ... Ils capomarcadonts da **Tujetsch** e **Medel** han semtgau in per bravas roschas stiarls per la tiarza fiera da **Ligiaun**. ...

Gasetta Romontscha nr. 46, 18 da november

1870

Annunzia da mort

Cun profunda tristezia fan ils suttascrets enconuschent ch'ei hagi plaschiu agl Altissim da clamar ord questa veta tier la veta perpetna nies car frar

Statalter Giachen Antoni Berther

El ei morts ils 2 d.q. provedius cun ils sogns sacraments e perduns dils moribunds en ina vegliadetgna da 58 onns. Nus recumandein sia olma alla pia memoria da tut ses parents ed amitgs.

Camischolas (Tujetsch) ils 8 da december 1870

Ils fargliuns

en malencurada

Gasetta Romontscha nr. 50, 16 da december

1870

Cloms da quen

Cadi. Tuts quens cul defunct statalter Giachen Antoni Berther da **Tujetsch** dueien vegnir dai en al curatur da massa Vigeli Jos. Berther a **Rueras**.

Gasetta Romontscha nr. 52, 30 da december

1870-1880

Baghegiu il sontget da **Dieni** entras Duri B. Berther da **Dieni**; las duas statuas da s.Giusep e da s.Vendelin ein vegnidas tschentadas en da Vigeli Giusep Berther da **Dieni**. – El sontget sesanflan duas cruschs, ina da fier culla inscripziun Giusep Maria Peder, 53 onns, il matg 1843 vegnius per la veta entras in squatsch lavina enasi sut il **Draus**. Ina crusch lenn si per la preit culs bustabs J. F. C. R. = Giachen Fidel Cavegn da **Rueras**, ch'ei vegnius per la veta da cavar cristallas enasi **Val Giuv** odem la stad 1872.

(Notizia da pader Baseli Berther)

1871

Publicaziuns ord il Fegl Ufficial

3) Tumaisch Huonder da **Rueras** ei ussa ugau da vieua Tresa Berther nata Jehli a **Pardomet** e da siu fegl Franz a **Cuera**.

Gasetta Romontscha nr. 3, 20 da schaner 1871

1871

Publicaziuns ord il Fegl Ufficial

Tuts quens dil defunct Vigeli Valier da **Tujetsch** dueien vegnir dai a siu liquidatur genau Gion Andriu Berther, fegl, a **Camischolas**.

Gasetta Romontscha nr. 2, 13 da schaner 1871

1871

(Correspondenza dil **Badus**) Denter las 10 – 11 dalla notg dils 12 sils 13 da fevrer ei vegniu observau a **Tujetsch** – **Sedrun** in extraordinari fenomen. Dil maun encunter mesanotg, sco nus numnein: **Strem**, **Caschlè** e **Mila**, sextendeva vid il firmament, schiglioc tut sereins e stellius, ina

maiestusa tarlischur semeglionta ad in schinum nau „nordlicht“. Igl observatur, secartend ch’ei seigi zana el vischinont cantun **Uri** in grond barschament, cloma neutier auters aspectatur ils quals eran dalla medema opiniun. Mo nunsavend nus novas, ch’ils proxims dis passai seigi stau barschament egl **Uri**, sch’ei evident, che quella glisch vegn dil nord, era sch’ella duess derivar mo dacheu, perquei che **Berlin** ha buca daditg sittau victoria sulla curdada da **Paris**. Ils perderts astrologs tscheu a **Sedrun** ein aber aunc en dispeta, schebein quei nimbus derivi da **Berlin** enneu, ni sch’el fuvi schiglioc schon el contuorn da **Cuolm de Vi** e da **Caschlè**. Pertgei tenor ina veglia detga fussen las strias serimnadas ualti stedi entuorn la platta dil barlot sil **Cuolm Caschlè**, essend cheu in oreifer bi prospect e favoreivel liug da saltar. Surschein pia alla madira ponderaziun da scadin lectur, da lignar sche quella glisch sura allegada seigi naturala ni sch’ei fuss mo stau las scuas da fiug dallas strias, che tenevan da quellas uras lur tscheiver.

Gasetta Romontscha nr. 7, 17 da fevrer 1871

1871

La vischnaunca da **Tujetsch** ha dils 5 pugns da recapitulaziun acceptau moo la taglia e taxa sin tgauns.

Gasetta Romontscha nr. 7, 17 da fevrer 1871

1871

Assicuranza da fiug

Naven da 1800 – 1870 inclusiv vein nus il sequent resultat:

...

Tujetsch cun 132 casas ei barschaunen 70 onns 17 casas.

...

il pli gronds barschaments ein stai: ..., 1822 ils 11 da fenadur ei igl entir vitg da **Camischolas** a **Tujetsch** barschaus giu cun 14 casas. ...

Gasetta Romontscha nr.11, 17 da mars 1871

1871

Annunzia da mort

Cun dolor e tristezza fagein nus cheutras da saver a tuts nos parents, amitgs ed enconuschents, ch’ei hagi plaschiu agl Altissim da clamar ord questa veta speranza tier la gloria celestiala nies pli vegl e car fegl

Lucas

El ei morts a **Friburg** dalla virola nera, la sera dils 10 d.q. provedius culs s. sacraments e perduns dils moribunds en ina vegliadetgna da 15 onns. Nus recumandein l’olma da nies car affon alla pia memoria da nos enconuschents e nus sez a lur cuntinuonta beinvulientscha.

Sedrun, ils 13 da mars 1871

Lucas Cavegn, bab

Onna Maria Cavegn,

nata Wenzin, mumma

Gasetta Romontscha nr.11, 17 da mars 1871

1871

Publicaziuns ord il Fegl Ufficial

Vieua Madleina Schmid e sias treis feglias laian ir scussiun e lur quens ein da dar en a statalter Gion Battesta Monn.

Gasetta Romontscha nr.12, 24 da mars 1871

1871

La jamna vargada ein ils prezis e la tscherca dils stiarls carschi zun fetg tut anetgamein. In marcadont uranès ei vegnius ella **Val Tujetsch** ed ha entschiet a cumprar si stiarls per bials prezis, el medem temps ei lura arrivau bervs dalla Italia, ch’ins spetgi leu sin d’atun tscherca da tiers. Quei

ha dau fiug, marcadonts da **Uri**, da **Tujetsch** e **Medel** ein spert dai dalla Surselva giu ed han cumprau si sfraccada stiarls e pagau tochen 8 marenghins il tgau, ferton ch'igl ei silla feira da **Ligiaun** dil davos october vegniu vendiu per 7 marenghins il pèr. Tgei miadada! In marcadont ha denton remarcau: In asen fa biars asens!

Gasetta Romontscha nr.14, 7 d'avrel 1871

1871

Quest atun havein nus fatg attents sil bi capital che la vischnaunca da **Tujetsch** hagi tratg ord igl ingant dil fein a pastg, ussa savein nus relatar, che tenor ina exacta statistica hagi la vischnaunca da **Medel** retratg igl onn vargau 1258 faschs fein a pastg ord sias muntognas; sch'ins quenta che scadin fasch vali 7 frs. obtegn ins in capital da 8800 frs. ...

Gasetta Romontscha nr.15, 14 d'avrel 1871

1871

L'inspeziun da taur a Trun ha cuntentau isl experts. Tratg premi per lur bos han: ... 6) Gion Battista Monn a **Tujetsch** 50 frs. ...

Gasetta Romontscha nr.16, 21 d'avrel 1871

1871

Annunzia da mort

Cun profunda dolur notifichein nus cheutras a tuts nos parents, amitgs ed enconuschents, chei hagi plaschiu agl Altissim da clamar ord questa veta terrestra speranza tier la gloria celestia nossa cara mumma, sora e quinada:

Misterlessa Barla Condrau, nata Cavegn

Suenter ina liunga malsogna da ½ onn eis ella morta ils 22 d'avel – 17 meins suenter siu mariu e 2 meins suenter siu pli giuven affon da 5 onns – en ina vegliadetgna da 41 onn e 23 dis, provedida cun tuts s. sacraments e perduns dils moribunds. Nus recumandain la defuncta alla pia memoria da tuts parents ed amitgs.

Mustér, ils 25 d'avrel 1871

Placidus Condrau

en num dils dus orfens e dils quinaì.

Lucas Cavegn, frar

Gasetta Romontscha nr. 17, 28 d'avrel 1871

1871

Elecziuns circuitalas

Sco derschaders ein vegni numnai: ... assitent Schemd da **Tujetsch**, ...

Gasetta Romontscha nr. 20, 18 da matg 1871

1871

La fiera da Sedrun

che curdas uonn silla fiasta da Sontgilcrest vegn tenuta il di avon q.e. mesjamna, ils 7 da zercladur.

Gasetta Romontscha nr. 20, 18 da matg 1871

1871

Uniun da Pius dalla Cadi

Ord la cassa dall'uniun vegn ei tenor conclus dau uonn in subsidi per il cant ecclesiastic a **Surrein** ed in per la biblioteca locala da **Tujetsch**.

Gasetta Romontscha nr. 21, 26 da matg 1871

1871

Publicaziuns ord il Fegl Ufficial

Barla Catrina da Josef Antoni Gieriet ha per ugau gerau Stoffel Riedi, omisdus da **Tujetsch**.

Gasetta Romontscha nr. 21, 26 da matg 1871

1871

Sterschau

Sin via orda **Medel** tochen **Tujetsch** 6 nuorsas bergamascas. Tgi che anfla quels tiers ei supplicaus da metter a mauns quels a genau Lucas Cavegn a **Sedrun** encunter ina bonificaziun da 3 frs. il tgau. Gasetta Romontscha nr. 24, 16 da zercladur 1871

1871

cuntinuar cun nr. 27

1871

Reha benedida raccolta da glin en **Tujetsch** 1871
(mira GR 1871, nr. 44)

1872

Fiug a Sedrun

Tenor ina nosssa corrispondenza dil **Badus** ei era il vitg da **Sedrun** ils 26 da fevrer staus en grond prighel da vegnir intschendrus per ina gronda part. Duront in ferm suffel ha suentermiezdi via ella aschinumnada „Casa alva“, in baghetg da quater cussadents, il fiug entschiet a fugar cun vehemenza ord ils quater uni tgamins. Alla curaschusadad d'entgins umens, che han stuppau ils tgamins ordado e cun dar in lavatgau sutsi culla sprezza ei reussiu d'allontanar il prighel, che duess esser in niev spieghel per procurar in bien cundrez da fiug.

Gasetta Romontscha nr. 9; 1. da mars 1872

1872

Prezi da tiers

A **Tujetsch** ei quels dis vegniu vendiu ina vacca per 20 marenghins – in schi ault prezi ei leu aunc mai vegniu pagau per ina vacca.

Gasetta Romontscha nr. 1; 5 da schaner 1872

1872

Emigraziun

Questa jamna han puspei circa 120 emigrants bandunau nies cantun per serender ella tiara dalla cucagna americana. Per nies cantun ei quella sperdita da forzas da lavur e da facultad da donn, e che plirs dils emigrants anflan buca la gronda fortuna, ch'els spetgan da tschei maun dalla mar, ei era ualti probabel. Ei legra nus, cura che vivon emigrai Grischuns vegnan puspei ord l'America sin viseta tier nus, mo ei displai grondamein, che els dattan caschun tier novas emigraziuns. El davos transport era ei 50 dalla **Cadi** ed en quei 28 da **Tujetsch** cun in um da 70 onns, che han intrasglauter purtau naven quasi 1000.– francs perin. En 20 onns ha quella vischnaunca, schegie ch'ei flessegia leu latg e mel en abundanza, furniu 160 emigrants.

Gasetta Romontscha nr. 15; 12 d'avrel 1872

1872

Cristallas

Ils cavacristallas a **Tujetsch**, **Muster** e **Medel** han uonn fatg buna fadigia. Els ein stai ventireivels egl anflar ed han era saviu vender bia ed ualti car. Igl ei vegniu discuvretg fuorns che han dau ora cristallas per varga melli francs in, in sulet toc vess ins saviu vender per 250.– francs. Ad Ursera, nua ch'ei dat bials cabinets da mineralias, per part oriundas dalla **Cadi**, ei vegniu purschiu 800.– francs per in cristagl, mo il vendider vul buca dar quel per meins che 1000.– francs.

Gasetta Romontscha nr. 35; 30 d'uost 1872

1872

Purgina

Dad ina schi ferma purgina el settember seregorda negin, denton ei quella tuttina buca stada schi nuscheivla sco quella ch'ei tenor igl urbari da **Tujetsch** stada in settember el 17avel tschentaner ed ha giu ruinau leu tut ils ers, aschia che 80 persunas, babs da famiglia cun dunna ed affons han stuiu emigrar ell'Ungaria per buca murir dalla fom.

Gasetta Romontscha nr. 39; 27 da settember 1872

1874

Quei onn haveva **Tujetsch**: rauba communal 173 500 frs.; rauba privata 980 200 frs.; entrada d'industria 9200 frs.; taglia virila 216 frs.

(Notizia da pader Baseli Berther)

1874

Tras ina contabilitad beinrugalada sedistinguescha denter autras era la vischnaunca da **Tujetsch** (GR, 1874, nr.2, 9 da schaner)

1874

Disgrazia

Dacuort ein dus pigns mattatschs da **Tujetsch** dai ell'aua en dus differents loghens e fussen stai ventschi senza spert agid. In da quels ei daus ell'aua si mises ed ei vegnius liberaus da siu resolut e curaschus camerat da 15 onns. Duri Huonder da **Sedrun**, che ha buca mo liberau la veta, mobein era tgrairu il blessau cun tut pusseivel quitau entochen che siu bab ei arrivau la sera.

Gasetta Romontscha nr. 29; 17 da fenadur 1874

1874

Nevadas

Odem il november ed all'entschatta da december 1874 ha ei dau duas grondas nevadas. A **Selva** e **Rueras** ella **Val Tujetsch**, eran plirs fugi ord casa per la lavina, mo per ventira ein els mitschai culla tema.

Gasetta Romontscha nr. 51; 18 da december 1874

1874

Circa miez december 1874 ha ei dau grondas nevadas el Grischun A **Selva** e **Rueras** ella **Val Tujetsch** eran plirs fugi ord casa per la lavina, mo per ventira ein els mitschai culla tema.

(GR 1874, nr. 51, 18 da december)

1874

Classena

En ina vischnaunca dalla **Cadi** ei vegniu claus 44 tschuncheismas lunghezias culla lenna fendida ord classena dus lenns; da far cun lattas vessien ins duvrau 100 da quellas. Speranza ch'ei vegni gleiti dapertut da quella da buca dar ora pli lattas per clauder, sco la vischnaunca da **Tujetsch** ei schon avon decennis ida ordavon cul bien exempel.

Gasetta Romontscha nr. 32; 7 d'uost 1874

1876

Lavina en Curnera

Lavina da **Curnera**, nua che dus umens da **Tschamut** han piars la veta ils 10 da schaner 1876.

Gasetta Romontscha nr.2/1876

1877

Bostger

Sin giavisch digl inspectorat cantunal han las vischnauncas da **Mustér**, **Tujetsch** e **Medel** seschau en da formar ensemen in revier forestal ed emploiari in bostger cun 1100 francs paga.

Gasetta Romontscha nr. 14 1877

1878

Difteria a Rueras

A **Rueras/Tujetsch**, grassescha la difteria quasi en tuttas casas. Igl ei miert leu dabia affons ed auters ein aunc buca ametsch.

Gasetta Romontscha nr. 3; 18 da schaner 1878

1879

Sur dil mèl da **Tujetsch**.

Mira Gasetta Romontscha, nr. 9, ils 27 da fevver 1879

1879

Catschadur

Il catschadur Gion Clemens Riedi da **Muster**, nativ da **Tujetsch-Selva**

Mira Gasetta Romontscha nr. 22–29 da matg 1879 (supplement)

1879

Fiug a Bugnei

Sonda vargada han in per affons a **Bugnei/Tujetsch**, dau fiug in clavau cun far termagls cun zulprins fosforics; cun spert dar neutier gliud han ins pudiu riscuder ils baghetgs d'entuorn. In niev avis da metter meglier giudamaun quels prigus zulprins.

Gasetta Romontscha nr. 31; 1. d'uost 1879

1879

Neiv

La jamna vargada ha ei en Surselva neviu giu tochen **Trun**, e las davosas alps han stuiu vegnir descargadas. Sils cuolms era ei nevada, e perquei ha la posta sull'**Alpsu** calau si avon l'entschatta d'october, ed ins ha giu gronda breigia da rabbitschar neu ils 29 e 30 da settember ils 60–70 cavals, ch'ils ustiers dad **Ursera** vevan priu si a tscheins per la stad en **Surselva**. A **Tujetsch** ein 76 nuorsas vengidas en ina lavina e ventschidas. Ils ers che eran aunc buca medi dapertut els aults, han leu danovamein pituu dalla neiv e purgina.

Gasetta Romontscha nr. 40; 3 d'october 1879

1880

Manteniment dallas vias

Discussiun generala el Cussegl grond sur il niev project per manteniment dallas vias. Il paragraf 3 sulla cunfinaziun dils pass alpins dallas vias da communicaziun: **Alpsu**, **Lucmagn**, **Albula**, **Bernina**, **Fuorn** e **Flüela** ha dau bia da far e cun 31 vusch encunter 30 ei sin proposiziun da Peterelli e Manatschal stabilii, che per regla duei vegnir considerau, ch'il pass alpin sestendi mo dalla davosa vischnaunca da quest maun dil cuolm tochen tier l'emprema vischnaunca da tschei maun dil cuolm.

Condrau ha garegiau, ch'ei duei vegnir quintau, che ils pass **Alpsu** e **Lucmagn** entscheivien buca per a **Sedrun** e **Platta**, mobein el vitg da **Muster** e quei tenor cunvenziun fatga cul cantun 1861. Il Cantun hagi quasi sfurzau si a **Muster** e **Tujetsch** la strada dall'**Alpsu** e sulettamein garegiau, che quellas duas vischnauncas sorprendien l'expropriaziun, il dar il material, menar la gera, mo ussa vegli ins far surprender ellas g'entir manteniment. Ella cunvenziun dil cantun serrada giu culla Confederaziun hagi il Cussegl grond claramain declarau da surprender il manteniment naven dil vitg da **Muster** tochen sils cunfins uranes. Per far la segira hagi la vischnaunca da **Tujetsch** aunc giu fatg dar il cumissari guvernativ in agen revers, ch'ella seigi mai e pli mai obligada da purtar pli grondas grevezias pil manteniment dalla strada dall'**Alpsu** ed ussa duei tut vegnir fiers dad ina vart. 1840 hagi **Tujetsch** dau en cullas autras vischnauncas sursilvanas sia scartira da mantener la via

nova e garegiu che quella vegni baghegiada tochen **Rueras**, mo la cumissiun cantunala hagi 1841 declarau, che la strada sursilvana mondi mo tochen **Muster**. Uss denton veglien ins far ir ella tochen **Sedrun** e quei en contradicziun cun convenziuns cul Cussegl grond e culla Confederaziun. Quei seigi in agen dretg statistic, che la dertgira federala vegni ualvess ad approbar pil cass d'in recuors. Dad aunc far mantener **Muster** la strada dall'**Alpsu** tochen sils cunfins da **Tujetsch** e quella dil **Lucmagn** entochen la punt sper l'uniun dil **Reinsu** e **Reinmiez**, vegni ei cargau si a quella vischnaunca il manteniment d'ina tenda vias ella lunghezia dad endisch kilometers! Cheu encunter ei vegniu allegau, ch'ins hagi a siu temps concediu memia bia a quellas duas vischnauncas, ins stoppi tractar ellas sco las autras, da **Muster** a **Sedrun** seigi negin cuolm, mobein ina biala vallada. Il davos ei vegniu, che la strada dil **Lucmagn** duei il cantun muort siu difficultus terren mantener naven dil vitg **Muster**, l'**Alpsu** denton per naven da **Sedrun**.

Gasetta Romontscha nr. 24; 11 da zercladur 1880

1880

Il niev project stabilescha che tiels pass alpins dallas stradas da comunicaziun, hagian las vischnauncas territorialas da prestar l'expropriaziun, schar prender il material, menar la gera e dar ils necessaris umens per gidar a rumper via ni nua che la comunicaziun vegn interrutta en cass extraordinaris. Gl'ulteriur manteniment ha il cantun.

Gasetta Romontscha nr. 24; 11 da zercladur 1880

1880

Dieschma

En ina questiun denter vischins e la vischnaunca da **Tujetsch** pervia dil modus co cumprar ora la dieschma, fatga pendentia tiel Cussegl pign, ei president districtual Tuor a **Rabius** eligius sco cumissari guvernativ.

Gasetta Romontscha nr. 36; 2 da settember 1880

1880

America

In emigrau Tuatschin, che sesanfla gia varga diesch onns ell'**America** ha dacuort notificau a nus, ch'ei seigi tras la Ligia Grischa da **Stillwater**, vegniu fundau ina nova colonia cul num **Badus** el territori da **Dakota**. Scadin commember dalla uniun grischuna ha stuiu pagar 15 dollars daner d'entrada e lu aunc in dollar per meins pil cuoz da 15 onns. Cun quels mettels han ins acquistau in adattau plaz per secollocar leu tuts ensemen. Quel ei vegnius anflaus ellas prerias da **Dakota**, 300 miglias el vest da **Stillwater**. Il mars 1879 ei lu setratg leu ina gronda partida, che ha entschiet a baghegiar casas amiez ils praus entuorn in lag. Igl ei cheu ranschau en ina ustria, ina stizun ed ina posta jamnila. **Badus** sesanfla denter duas novas viasfier en, ella distanza da treis tochen tschun uras. Las casas ein baghegiadas si cun aissas e biaras mo da tschespets, ch'ein leu fetg qualificai per material da baghegiar. En munconza da lenna vegn ei barschau fein e cotgla da crap. Igl ei vegniu construiu ina casa da scola, che survescha ad interim era per baselgia inagada il meins. Il liug **Badus** s'ingrondescha di per di e la Ligia Grischa ei renconuschida sco corporaziun, che ha ils dretgs da vender e cumprar tiara. Ils gronds e bials ers han leu stupenta paretta. Possi il **Badus** american crescher e flurir pli e pli !

Gasetta Romontscha nr. 31; 29 da fenadur 1880

1881

Resultat

Tenor ufficiala publicaziun ei il niev project pervia dil manteniment dallas vias vegnius refusaus cun 5810 encunter 5782, aschia cun ina majoritad da mo 28 vuschs.

Gasetta Romontscha nr. 25–23 da zercladur 1881

1881

Uors

En **Tujetsch** vulan ins haver fastitgs dad in uors che duei haver scarpau nuorsas en in per loghens. Quella vischnaunca ha vendiu uonn fein a pastg per circa 2000.– francs.
Gasetta Romontscha nr. 37; 15 da settember 1881

1883

Glin

Il glin da **Tujetsch** ei da vegl enneu renomaus e la raccolta da sem glin ei leu savens admirabla; uonn ha in vischin da **Rueras** en siu stupent glin anflau plontas glin, che vevan tochen 187 borlas, ditgel tschienotgontasiat borlas per ina.
Gasetta Romontscha nr. 38; 20 da settember 1883

1887

En benefeci dils donnegiai tras il barschament da **Cavorgia** ei concludiu da schar prender si ina collecta el cumin. Mira protocol da cumin nr. 18, pag. 138 sut datum, 21 da november 1887.
(Notizia da pader Baseli Berther)

1888

Barschament

Barschament d'ina casa e d'in clavau a **Sedrun/Gonda**.
Mira Gasetta Romontscha nr.36, ils 6 da settember 1888

1897

In solid giuven da circa 18 onns che capescha tudestg e sa ir entuorn cun cavals, anfla per la stad in bien survetsch. Da s'informar tier la Cruna a **Sedrun**.
GR 21-01-1897 nr. 4

1897

Annunzia da mort

Cheutras notificein nus a parents ed enconuschents, ch'ei hagi plaschiu agl Altissim da clamar ella perpetnada nossa cara consorta, mumma, feglia e sora

Barla Catrina Honder n. Jacomet

En ina vegliadetgna da 41 onn eis ella spartida ils 30 da schaner, suenter ina dolorusa malsogna, provediada cun tut ils s, sacraments dils moribunds.

La preziada defuncat vegn recumandada alla pia memoria da tut nos enconuschents.

Sedrun, ils 3 da fevrer 1897.

Per la parentella en malencurada:

Josef Florin Huonder, mariu

Vigeli Jacomet, bab

Er'en num dils affons.

GR 04-02-1897 nr. 6

1897

Dacuort ha signur professor Muoth purtau avon alla societad historic-antiquara a **Cuera** in zun interessant referat sullas relaziuns dils anteriurs uclauns e vitgs da **Tujetsch** in cun l'auter e cun l'abbazia da **Mustér** – in prodiuct da ses studis fatgs la cavanza vargada egl archiv ed urbari da quella vischnaunca.

GR 15-04-1897 nr. 16

1897

Venal in vadi mascal da 15 dis tier Gion Bistgaun Beer, fravi, a **Sedrun**.

GR 22-04.1897 nr. 17

1897

Encuretg pil vischinadi da **Rueras-Tujetsch** in mattatsch per far caver naven da far mundi tochen s. Martin. Da s'adressar ton pli sper tier Giachen Fidel Cavegn, **Rueras**.

GR 29-04-1897 nr. **1897**

Sin intsches da **Selva e Tschamut** ei dacuort aunc vegniu cavau ora entirs tocs truffels stai satrai en gl'atun dalla neiv. Muort il lev unveirn erien quels ellas plauncas aunc buns e bials e seigien immediat puspei sil toc vegni tagliai e duvrai sco sèm, ferton che quels en plauns fuvien per part smarschi dil bletsch. Quei mass matei ualvess mintg'unviern aschia, schiglioc fuss ei magari bein enqualga cumadeivel e practic per spargnar il sem.

GR 06-05-1897 nr. 19.

1897

Tschamut Rheinquelle

Ils 20 da matg arva il suttascret siu hotel Rheinquelle e racamonda quel a tuts passants sull'**Alpsu**, segirond bien tractament e raschuneivel prezi.

Carl Caveng

GR 13-05-1897 nr. 20.

1897

Annunzia

Il suttascret fa enconuscent al ludeivel publicum, ch'el seigi ussa pli habels tier il mistregn d'urer, e surprendi da reparar da tuttas sorts uras da sac e da preit, sco era da tuttas sorts vechers. Era san ins retrer dad el da tuttas sorts uras da sac, da preit e vechers novs. Garantend buna lavur e bunas solidas uras novas bienmarcau serecamonda

Luzius Antoni Soliva (1865-1902)

Ligiacadischs ed urer a Sedrun

GR 26-05-1897 nr. 22

1897

Ils straduns dalla **Bernina, Flüela ed Albula** ein ussa aviarts per carrs. L'**Alpsu** vegn questa jamna era aviarts.

GR 03-06-1897 nr. 23

1897

Stalter Paul Berther ei ugau dallas soras Barla Cristgina ed Anna Maria Muggli, tuts da **Tujetsch**.

GR 03-06-1897 nr. 23

1897

La fiera da **Tujetsch** vegn tenuta uonn el solit liug a **Sedrun**, ils 10 da zercladur. La suprastonza. GR 03-06-1897 nr. 23

1897

Encuretg in scolast patentau per la scola da **Cavorgia-Tujetsch**. Aspirants ein supplicai da s'adressar tier il cussegl da scola.

GR 11-06-1897 nr. 24

1897

Ina buna vacca da latg, ch'ha fatg vadi dacuort, enquera da prender si per la stad.

Carl Caveng, hotelier a **Tschamut**.

GR 11-06-1897 nr. 24

1897

L'**Alpsu** ei finalmein era da vart uranèsa vegnida aviarta per carrs mesjamna vargada, suenter che da vart grischuna ei schon stau aviart ils 2 da quest, aschia ch'igl ei ussa schon stradun schetg tochen sum. La posta **Mustér-Caschinutta** va ussa regularmein. Nos stimai convischins d'**Uri**

astgassen en general schon risguardar empau meglier lur convischins grischuns concernent metter ad uras maun vid dar pass e repass la primavera sur quei frequentau cuolm. Ludeivla premura mussa da quellas varts nossa regenza e speranza vegn quella pigl avegnir era effectuar, che sia collega uranèsa patratgi mintgamai empau pli baul vid quella lavur. - Oz ei era il **Lucmagn** vegnius aviarst per crotschas.

GR 11-06-1897 nr. 24

1897

La fiera da **Tujetsch-Sedrun** dils 10 da quest ha giu circa 50 armauls dils quals igl ei denter ils purs vegniu cumprau si da biars per bials prezis (15 – 15 marenghins). Amaturs han specialmein in triep bialas vaccas, catschadas si dil davos marcau **Glion**, anflau.

GR 16-06-1897 nr. 25

1897

Culs 14 da zercladur ei era la lingia telegrafica sugl **Oberalp, Mustér-Ursera** vegnid'aviarta cun ina staziun da telegrafica a **Tschamut** ed ina sil pass. L'erecziun da tala lingia ha ord quei motiv cuzzau pli ditg che quella sul Lucmagn, la quala ei vegnida aviarta schon onn, essend che sull'**Alpsu** ha il telegraf muort il prighel da lavinas stuiu vegnir mess sper il lac en sut tiara (sco cabel) ed ein talas liungas lavurs vegnidas interruttas baul gl'atun tras la schliat'aura.

GR 01-07-1897 nr. 28

1897

El bi lag da **Tuma** – la fontauna dil **Rein** sper il pei dil **Badus** – haveva avon tschun onns signur hotelier Carl Caveng a **Tschamut** tenor convenziun cun la ludeivla vischnaunca da **Tujetsch** giu mess en 4 – 500 litgivas per far l'emprova, sche peschs seviventien e semantegnien en quei lag en tal'altezia (2344 meters sur mar). In'inspecziun ha quels dis giu il legreivel resultat, ch'il lag seigi ussa schon populus rehamein cun peschs, denter auter cun tals d'ina peisa da $\frac{1}{2}$ - 1 fund l'in e d'oreifra qualitat. Damai ch'il cantun ha en plirs loghens schau ranschar en e subsidiau pes-cheras artificialas, ni cundrezs per cuis e tratga da litgivas (sco a **Tusaun** etc.) e ch'el dat gie sin damonda giu gratuitamein gronds diembers da quels cuis allas vischnauncas per puspei popular las auas cun peschs, fuss ei segiramein indicau, da seprofitar da quell'oreifra caschun, cunzun si ellas auas dallas muntognas aultas, nua ch'ei exista aunc negins peschs, ni nua che quels ein en consequenza da malauras considerablamein decimai. Ei gie la pesca ina buna resursa da daners ed en rehas auas da peschs ina segira fadigia. In ni l'auter savievel e premurau pescadur dalla **Surselva** duess era aspirar per ina tala pes-chera en nossa vallada, che vegness segiramein concediu dalla regenza. Il cantun ha avon paucs onns era creau las novas plazzas d'inspecturs dalla pesca, sul néz dallas qualas ins sa esser da divers meini; dil medem meoini san ins abera bein esser, ch'ei duei oravon vegnir mirau, ch'ei detti aunc peschs ellas auas avon che metter si inspecturs da peschs, schiglioc drov'ei buca tals.

GR 05-08-1897 nr. 33

1897

Dus asens (summaris) venda il pigurer da **Nalps** en **Tujetsch**.

GR 12-08-1897 nr. 34

1897

Barla Catrina Giacumet ei sut ugadia da Sep Florin Huonder, omisdus da **Tujetsch**.

GR 16-09-1897 nr. 39

1897

La gronda calamitad dalla cuntinuad'aura bletscha ha giu sia culminaziun la sera dalla Rogaziun federala, nua ch'ei ha bischau tochen **Cuera** e fatg descargar tuttas alps. A **Mustér** er'ei ils 20 mesa quarta neiv ed ils 21 mussava il termometer mo dus grads sur null. Per ventira para l'aura da

sevolver, ils 22 ei terrenau tochen **Mustér**, mo ils bials risdivs, truffels e la pumera han pitiu grond donn. Sill' **Alpsu** er'ei in meter neiv e perquei ha sia posta calau si siu cuors culs 21 da quest.

GR 23-09-1897 nr. 40

1897

L' **Alpsu** ei gliendisdis puspei vegnid'aviarta per carr, mo sentelli buca da nos stinai fratelli uranès, mobein da commerciants da vart grischuna. Denton drovan ussa ual ils Uranès il pli urgent passasch per turnar anavos culs cavals da tscheins, retrer lennas etc.

GR 23-09-1897 nr. 40

1897

Cun plascher notifichein nus, che signur Stiafen Berther da **Camischolas, Tujetsch**, hagi dacuort fatg cun bien success siu examen final sco miedi sill' universitad a **Turitg**. Gratulamur!

GR 09-12-1897 nr. 51

1897

A **Cavorgia (Tujetsch)** tier Luis Hendri in ansiel grisch cun saclin, dretga fess en fuorma da furcletta e dus snezs davos en.

GR 09-12-1897 nr. 51

1897

A **Sedrun** tier Giachen Antoni Soliva in botsch tgietschenalv, dretga giudasum ed in snez davon en, seniastra fess ni forsa furcletta, sin ils corns barschau en S M.

A **Bugnei-Tujetsch** tier Tumaisch Curschellas in tschanc ner cun corns buca tundiu, dretga in snez davos en, seniastra in snez davon en.

GR 09-12-1897 nr. 51

1898

Sep Florin Huonder ei ugau da Rosa Macolin, omisdu **Tujetsch**.

GR 13-01-1989 nr. 2

1898

Il suttascrèt venda ina partida badugna frestga da diever el vitg **Sedrun** per in raschuneivel prezi. Cumpraders dueien s'annunziar ton pli spert tier

Alfons Jagmet a **Sedrun**

NB. Fetschel aunc da saver, che jeu vendi la badugna per in raschuneivel pagament era a quels dus umens, ch'han selubiu da sepatrunar d'in ton badugna sin mes funs, ils 19 da november 1897, la quala els ston forsa pagar pli tard.

GR 20-01-1898 nr. 3

1898

Milsanavon porta quella gasetta (*Bündner Monatsblatt*) meinsila igl interessant artechel historic sulla **Val Tujetsch**, purtaus avon da signur professor Muoth 1896 alla Societad historic-antiquara a **Cuera**. Cun quella caschun fa igl autur attents, che quella vischnaunca, che dumbravi 1850 aunc 979 habitonts, vevi en consequenza dall'emigraziun tiella davosa dumbrada da 1888 mo 768.

GR 20-01-1898 nr. 3

1898

Venal: in vadi mascal giuven tier Giochen Deflorin a **Rueras**.

GR 20-01-1898 nr. 3

1898

Producziun teatrala a **Sedrun**

Gievgia grassa, ils 17 e dumengia ils 20 da fevrer vegn menau si:

Il fegl scumbigliau ni calger stai tier tiu laisch

Cumedia en treis acts. Denter ils acts musica. Avertura a l'ina e mesa suentermiezdi.

Entrada: I. piazza 80 cts.

II. piazza 50 cts.

Affons la mesadad

Tier numerusa frequenza envida gentilmein

La societad da musica **Sedrun**

GR 10-02-1898 nr. 6

1898

Ils dus minorents frars Stiafen e Gion Fidel Schmed han per ugau Hans Giachen Caduff, tuts da **Tschamut**.

GR 17-02-1898 nr. 7

1898

Annunzia da mort

A parents ed enconuschents purtein nus cheutras la tresta nova, ch'ei hagi plaschiu agl Altissim da clamar ord questa speranza tier ina meglia veta nossa preziada sora, quinada, onda e cusrina

Maria Augustina Caveng

Suenter ina liunga e per part dolorusa malsogna eis ella resignadamein morta ils 2 da quest en ina vegliadetgna da 27 onns e 10 meins, provedida cun tuts s. sacraments dils moribunds.

Nus recumandain l'olma dalla cara defuncta alla pia memoria da tuts parents ed enconuschents.

En num dalla parentella en malencurada:

Sedrun, ils 2 da mars 1898

Carli Caveng, frar

GR 03-03-1989 nr. 9

1898

Annunzia da mort

En profunda dolor notifichein nus a parnets ed enconuschents, ch'ei hagi plaschiu agl Altissim da clamar ella perpetnadad nossa cara mumma, tatta, sora e sira

M. Catrina Muggli

Nata Condrau

Suenter ina liunga malsogna e provedida cun tuttas consolaziuns da nossa sontga religiun eis ella spartida ils 25 da fevrer ell'aulta vegliadetgna da 85 onns.

Nus recumandain cheutras l'olma dalla preziada defuncta alla pia memoria da nos parents ed enconuschents.

La parentella en malencurada:

Rosa Muggli-Muggli, feglia

Barla Decurtins-Muggli, feglia

Mengia Wenzin-Condrau, sora

Hans Giachen Decurtins, schiender

er'en num dils auters parents.

Sedrun e Regensburg, 28 da fevrer 1898

GR 03-03-1989 nr. 9

1898

Annunzia

Per l'alp **Curnera a Tujetsch** vegn ei priu si per la stad genetschas per in arvè da 15 frs. ina e mutgs per 10 frs. in. Da s'adressar tier Emanuel Deragisch. Ligiacadischs a **Tujetsch**.

GR 10-03-1898 nr. 10

1898

Sill'exposiziun da taur a **Trun** ei stau catschau 40 tocs, dils quals sis ein veni premiai en I., 9 en II.

ed 8 en III. classa ed appartenevan als suandonts proprietaris: ... II. classa: Gieriet Cristian, **Tujetsch**, in stierl 60 frs, Caduff Hans Giachen, **Tujetsch** III. classa: ... Berther Gion Andriu, **Camischolas** per mutgs 50 fr.

GR 14-04-1898 nr. 15

1898

Venal ina biala vacca giuvna, che fa il matg vadi, tier Giachen Antoni Wenzin a **Rueras**.

GR 14-04-1898 nr. 15

1898

La vischnaunca da **Tujetsch** enquera da prender si en sias alps da schetgs per la stad proxima enzacontas genetschas per il prezi da 15 frs. il tgau e pustretsch inclusiv. Ils tiers vegnan pri a mauns entuorn s.Gion, ils 24 da zercladur.

Tujetsch, ils 15 d'avrel 1898

La suprastonza

GR 21-04-1898 nr. 16

1898

Annunzia da mort

Cun profunda dolur notifichein nus a nos parents, amitgs ed enconuschents, ch'ei hagi plaschiu agl Altissim da clamar ord questa speranza tier ina megliera veta nossa cara mumma

Onna Maria Ursula Berther

Nata Schmed

Ella ei spartida resigandamein ils 28 da quest en ina vegliadetgna da 77 onns, provedida cun tuttas consolaziuns da nossa sontga religiun.

Nus recumandain l'olma dalla cara defuncta alla pia memoria.

Sedrun, ils 28 d'avrel 1898

Ils combrigiai affons:

Thomas Josef Berther, plevon

Pader Baseli Berther, OSB

Maria Ursula Monn-Berther

Vigeli Giusep Berther-Deflorin

Maria Turtè Berther-Berther

La sepultura vegn fatga sonda allas 9.

GR 21-04-1898 nr 16

1898

In bien fidau cavagl, empau passaus vi, vegn tschercaus da prender si naven digl emprem zercladur entochen miez october. Da s'adressar tier la Cruna a **Sedrun (Tujetsch)**.

GR 28-04-1898 nr. 17

1898

Annunzia

Dr. med. Stiafen Berther da **Tujetsch** ei sedomiciliaus a **Mustér** e habitscha en casa da signur professor Carigiet.

Uras per audienza: Mintgadi dallas 7 – 8 avonmiezdi, dallas 12 – 1 suentermiezdi.

Las dumengias 12 ½ - 2 ½ suentermiezdi.

Mustér, ils 4 da matg 1898.

GR 05-05-1898 nr. 18

1898

Annunzia da mort

Cheutras notifichein nus a parents ed enconuschents, ch'ei hagi plaschiu agl Altissim da clamar ella perpetnada nossa cara onda

Dunna Fausta Muggli

En ina vegliadetgna da 70 onns eis ella suenter liunga maldispostadad, duront la quala ella ha repetidamein retschiert ils s. sacraments, nunspitgadamein spartida oz a **Rabius**. Nus recumandain cheutras la preziada defuncta alla pia memoria da nos parents ed enconuschents.

Per la parentella en malencurada:

Rabius e Rueras, 11 da matg 1898

Cristian Muggli, nevs

Rosina Cagienard Muggli, niaza

Cristgina Muggli-Beer, niaza

Maria Cagienard, sutniaza

La sepultura ha liug venderdis, ils 13 da quest circa allas 9 a **Sedrun**.

GR 12-05-1898 nr. 19

1898

Las vischnaucas da **Tujetsch** e **Falera** han menau en l'assicuranza da biestga. Bene!

GR 02-06-1898 nr. 22

1898

La fiera da **Tujetsch**

vegn tenuta sonda proxima ils 4 da zercladur a **Sedrun**. Per tuts tiers menai tier, sto vegnir presentau bulletta.

La suprastonza

GR 02-06-1898 nr. 22

1898

La fiera da **Tujetsch** dils 4 da zercladur ha giu entuorn 80 armauls, mo buca marcadont, tonpli che l'**Alpsu** ei aunc buca aviarta e ch'ils Uranès han muncau, ils quals devan pli baul gronda vivacitad a quella fiera. Tonaton ei ei aunc vegniu marcadau empau denter ils purs per bials prezis.

GR 08-06-1898 nr. 23

1898

Finalmein ei l'**Alpsu** era vegnida aviarta per carr da vart uranèsa e ha il cuors postal entschiet a cursar culs 11 da quest. Era il **Lucmagn** ei aviarts.

GR 16-06-1898 nr. 24

1898

Avis

L'alp **Curnera** vegn cargada ils 28 da zercladur.

Tujetsch, ils 16 da zercladur 1898.

Emanuel Deragisch, ligiacudischs

GR 16-06-1898 nr. 24

1898

Tractandas guvernativas. Las statutas d'assicuranza da **Breil, Peist, Tujetsch, Castiel, Trun, Valzeina, Feldis** e **Schluoin** vegnan approbadas.

GR 23-06-1898 nr. 25

1898

Encuret in buob da 12 – 14 onns per pertgitar in cavagl cun pulein sin pastira da casa tochen d'atun. D'entrar en survetsch ton pli gleiti. Ulteriur sclariment dat Gion Andriu Berther a **Camischolas**.

GR 23-06-1898 nr. 25

1898

In buob da 12 – 15 onns vegn ei encuret g per in' alp da nuorsas. Da s'adressar tier Josef Maria Albin a **Tschamut**.

GR 21-07-1898 nr. 29

1898

Ella **Surselva** ei la zoppina plinavon rutta ora a **Tujetsch, Schlans, Castrisch** ed a **Surcasti** etc. Sco bien meid encunter la zoppina recamonda in inserat dil Tagblatt d'unscher las plagas cun „verdünnte Carbolsäure“ ni „carbolsaurer Kalk“ sco era da stiarner ellas stallas frina gep. Il principal mied ei, sco gia savens recumandau, da tener schuber.

GR 18-08-1898 nr. 33

1898

La sonda sera ha il caver da **Sedrun** notificau alla suprastanza da **Tujetsch**, ch'ei sesanfli entadem la **Val Strem**, in toc sut igl ault dil **Kreuzlipass** giu, sper il trutg, il cadaver d'in um, il qual ei sin immediata expertisa seconstatau. Il medem temps ein era gia dus amitgs ed il quinau da quei disgraziu vegni sur tal pass per encurir fastitgs da quel, essend ch'el havess schon dapi 4- 5 dis puspei duu esser turnaus anavos a casa, haveva giu dau negin rapport e ch'ins saveva da sia projectada rutta. Era fuvan tuttas retschercas telegraficas stadas senza success. Il disgraziu fuva in cert Albert Müller da 36 onns, oriunds dil **Turgau** ed emploiau a **Turitg** sil biro da controlla dalla Nordostbahn. Sin sia bara, che sesanflava en posiziun durmenta, sper la senda, han ins anflau ses daners, proviant e siu diari tut en uorden. Tenor il davos fuv'el serendus gia la dumengia avon allas 4 dalla damaun naven d'**Amsteg** e fuv'arrivaus pér las 5 dalla sera tiella crusch dil **Kreuzlipass**, pia pér en 13 uras, ferton che quei viadi selai far en 5 – 6 uras. Entochen leu havevan cavers uranès mussau ad el la via. Da quell'ura naven cala siu diari si, schegie ch'ins ha anflau sia bara in toc sut igl ault dil pass giu. Ad **Amsteg** havevan ins advertiu igl um giuven da buc ir sul **Kreuzlipass** ni silmeins buca senza guid, buca perquei che quei pass fuss grevs ni malsegirs, schegie da vart uranèsa ensi empau strapazius, mo plitost perquei, ch'il disgraziu Müller fuva da fetg fleivla constituziun ed havev'aunc combas mendusas. Ei fuva perquei fetg temerari d'in tal um da serender sur in cuolm e lu aunc persuls. Sco ils cavers uranès raquentan, stuevi Müller tier scadina pendenza empau pli ferma seruschnar sin tuts quater, che vegn era confirmau tras il visum repertum medicinal. Tenor quel ha ei plinavon seschau constatar negins particulars indecis dalla caschun dalla mort da Müller, aschia ch'igl ei ord tut dubi, che quel seigi da fleivlezia buca serebitschus vinavon e hagi stuiu suttacumber al strapaz a mesa via. Era ei ei da supponer, che quei pupratsch hagi aunc stuiu survivor si en quels aults la stravaganta notg da neiv e dracca dils 8 sils 9, che havess purtau la mort al pli ferm um en tala situaziun. La bara ei vegnida transportada ils 16 da quest a **Turitg**. La comunicaziun dalla Neue Zürcher Zeitung, ch'il cadaver da Müller fuv' tut smuttaus ei faulsa, essend ch'el purtava neginas blessuras e fuva buca ruclaus.

GR 18-08-1898 nr. 33

1898

Il davos Fegl Ufficial nr. 33 cuntegn in diember brevs da hipoteca ord ils protocols da **Mustér, Schlans, Sumvitg** e **Tujetsch**, ch'ei tier la respectiva revisiun dils protocols da hipoteca dil cumin dalla **Cadi** buca stadas dadas en, ni dallas qualas ins ha schiglioc buca saviu eruir il proprietari. S'annunzian ils crediturs hipotecarics da talas brevs buca tier ils protocollists enteifer dus meins, sche vegnan quellas brevs annulladas. Cheutras ei lu la revisiun da quels schi impurtonts documents publics finida e vegn dacheudenvi speranza manteniu bien uorden, cun far cassar dafertontier brevs pagadas giu ...

GR 25-08-1898 nr. 34

1898

La superexpertisa per la taxaziun dils uauls ei finida e seresultescha ei tenor detagliu rapport dil

respectiv expert, ferster Meier, ina sbassada totala per 2'623'106 frs. digl anteriur schazetg da 1896. Per **Tujetsch**: schazetg 1896: 171'400 frs.; revisiun 1898: 125'000 frs.

GR29-09-1898 nr. 39

1898

Damai che la zoppina ei ussa silmeins ellas cuntradas nua che'ella ei rutta ora gl'emprem, sco per exempel ella **Cadi**, varghentada e ch'era il contumaz e las desinfecziuns dils nuegls ein cheu ualti alla fin, speran ins senz'auter, che nossas autoritads vegan immediat a far tut lur pusseivel per far arver ils pass al commers da biestga ...

GR 06-10.1898 nr 40

1898

Il cuors local sull'**Alpsu**, ch'ei dapi entgins onns tras intermediaziun da nossa direcziun postala vegnius concedius duront l'emprema mesadad dil zercladur e la secunda mesadad da settember cun taxas d'unviern, ha era uonn giu fetg gronda frequenza, in mussament, ch'el fuvi in basegns, ferton che l'allegada posta nocturna purtava mo mintgazacu in dormulent passagier. Ins spera perquei ina midada da quei cuors!

GR 06-10-1898 nr. 40

1898

Las suprastonzas dallas sis vischnaucas dalla **Cadi**, ch'ei libras dalla zoppina, han sin iniziativa d'ina libra radunonza a **Mustér**, petiziunau telegraficamein tier la regenza, ch'ei vegni immediat aviert silmeins il commers da biestga sur il **Lucmagn** e l'**Alpsu**, ch'ei vegni schau tener las fieras regulars e las exposiziuns e ch'ei vegni publicau quei commensuradamein. Per part ha la regenza, sco ins vesa ord al hodierna respectiva publicaziun, corrispundiu a quei giavisch.

GR 13-10-1898 nr. 41

1898

Signur Stiafen Berther da **Camischolas**, che ha dacuort fatg igl examen da miedi sill'universitad da **Turitg**, ha quels dis era obteniu leu il doctorat dalla medischina. Gratulein!

GR 13-10-1898 nr. 41

1898

Ils frars Kellenberger han quels dis viagiou la **Cadi** e cumprau a **Medel** 46 genetschas ni vaccas per 13 – 21 marenghin l'ina. Per mediocras genetschas han els pagau intagliauter 16 e 17 marenghins. Cun **Tujetsch**, che ha megliers tiers ed ha tenu la dira, han els saviu marcadar nuot, era pauc a **Mustér**. Denton ein ils sura prezis tenor rauba aunc adina andants. La mesjamna ha era il marcadont Fellmann digl **Aarau** catschau giuviars 25 vaccas ord **Tujetsch**, tut rauba da bienmarcau. Ils stiarls paghien uonn 1 – 2 marenghins pli pauc ch'onn.

GR 20-10-1898 nr. 42

1898

Annunzia e recumondaziun

Il suttascret fa cheutras da saver ad in ludeivel publicum, ch'el hagi en bien stan sias maschinas da scarsinar launa e scarsini per 15 cts. il fund. El ha in depot a **Mustér-Raveras** tier soras Fontana e vegn inaga per jamna leu per la launa. Empermettend buna e sperta lavur serecamonda

Anton Gisler a **Sedrun**

GR 20-10-1898 nr. 42

1898

Tiers jasters

Tier stalter Thomas Schmed da **Cavorgia** sesanflan sequentas nuorsas vanzadas tiella zavrada da **Tujetsch**: 1. In tgisch ner, dretga giudasum, in dentresgia ed in snez davos en entraviers, seniastra giudasum. 2. In tschanc alv, dretga scurselau davon ora, ina ruosna e dus snezs davon en. 3. In tschanc ner cun corns, dretga in snez davos en, seniastra giudasum. 4. In tschanc alv cun

corns, dretga ina furcletta orasum l'ureglia, in gavigliel davon ed in snez entraviers davos en. 5. In anugl ner cun corns, dretga ina furcletta orasum l'ureglia, seniastra dus snezs davos en.

GR 20-10-1898 nr. 42

1898

A **Rueras** tier Lezi Antoni Brugger in grond e bi engarschaun, ina liufa schubergiada da dus onns.

GR 20-10-1898 nr. 42

1898

Tiers jasters

A **Cavorgia-Tujetsch** tier staltier Thomas Schmed sesanfla in anugl grisch cun corns, ureglia dretga ina furcletta orasum ed in snez davon en, seniastra ina furcletta orasum e dus snezs davos en.

GR 27-10-1898 nr. 43

1898

Dr. med. Stephan Berther a **Mustér** ei per quest unviern absents. Tuts davers vegn ei supplicau da pagar a signur genau Gion Andriu Berther a **Camischolas, Tujetsch**.

GR 17-11-1898 nr. 46

1898

In vadi ed ina vadiala tier Gion Fidel Berther a **Rueras**.

GR 24-11-1898 nr. 47

1898

Tiers jasters

A **Sedrun** tier Rest Flurin Monn duas ansolas culla medema nota: dretga tagliau giudasum e fess, seniastra pala. A **Sedrun** tier Giachen Antoni Soliva in'ansola buca nudada.

GR 07-12-1898 nr. 49

1898

Dus marcadonts bavarès han cumprau si in triep bunas vacas e genetschas en **Tujetsch** e pagau 19 – 26 marenghins l'ina.

GR 15-12-1898 nr. 50

1899

1900

Dumbraziun: 193 fiugs, 809 habitonts, 399 umens e 411 femnas.

(Notizia da pader Baseli Berther)